

新安文獻志

年五之九十一  
乙

行實 史記 遺流





新安文獻志卷八十五

程端明

行實

宋故朝請大夫主管成都府玉局觀賜紫金魚袋朱公權行狀

程端明

本貫徽州休寧縣千秋鄉千秋里朱公諱權字聖與年若干朱氏出顓  
帝周封于邾其後子孫出邑氏朱世居沛國相縣唐末有避地新安者  
居歛之黃墩十六世祖春始家首村父朝議慷慨有尚志尊禮名儒篤  
意義方公生而岐嶷童丱若成人六歲入小學一日偶失所業課冊先  
生頗有愠色曰毋多慮某能盡默記乃追寫之他日得故帙一字不舛  
八歲能屬文讀書率夜以繼日寒暑不少替鄉之南有山曰顏公其高  
三十里上有精廬館其上手編諸家易說凡百餘萬言作為文辭自成  
機軸淳熙庚子秋試遂魁鄉薦十四年登進士第授迪功郎調隆興府  
分寧縣主簿未赴任丁朝議艱服闋調福州連江縣主簿須次間工部



侍郎宋公暉顏帥廣西改辟象州連山縣尉兼主簿留攝幹官盡忠毗  
畫多所裨贊慶元五年以舉主關陞從事郎調紹興府會稽縣丞邑當  
東浙會府之下三司委送紛沓判決晝夜不倦前後連率如辛公棄疾  
李公大性李公決皆敬賞之開禧元年調秦州如臯縣買納鹽場考舉  
及格嘉定七年改宣教郎知饒州餘干縣邑當孔道敗闕不可為之數  
其至也適當災歉之時極力撫字雖上司督賦急於星火而以身當之  
不忍一毫擾民百姓感之相與繪像立祠十一年轉奉議郎賜緋魚袋  
十二年秩滿赴部朝廷以作邑有聲差監行在左歲東庫時金虜渝盟  
歲幣積於左帑幾二百萬足窺有損腐公條具上之明堂變通闢隘因  
時制宜朝廷從之民以為便金韉相攻山東歸附方講備邊之策遂陳  
七事一曰用人望夫一世人材自有公望如漢用趙充國討羌羌人已  
知其善為兵唐用郭子儀也涇陽回鶻見之下馬羅拜我仁祖用范文  
正公帥陝西西賊破膽大抵人望所屬遐邇具孚雖不勞設施人自服

畏以其信服有素也方今荆襄制帥衆望所歸則虜人不敢犯其境間  
常窺伺旋即敗退蜀道前此緹騎非一及朝廷揚制命起已試之舊人  
付以宣司之柄則轉亂為治易於反掌是皆朝廷之上處置得宜則四  
方萬里莫敢不服者也今兩淮重地防秋及時倘圖任威望素隆不減  
蜀荆宣制之材者授以制使之權委以藩籬之重則九重之顧憂可寬  
矣其二曰計戰守自殘虜游竟困敵猶圖談者每以戰乃危事而諱道  
以守為全計而同辭是固愛國保民之善意然自古對敵守境未有不  
能戰而能守者孫氏保有江東以周瑜能戰而敗曹操於赤壁也劉氏  
全有巴蜀以諸葛亮出師而魏人畏之如虎也前者殘虜寇蜀嘗入興  
元事大安矣以我師勦其類而後止又嘗寇淮犯濠梁逼安豐矣以志  
其擒其首而後退則是能戰而後守之明驗也宜明飭宣制司沿邊  
諸將整軍經武繕甲治兵如漢將之行必為戰備如唐將之練卒常若  
寇至平時則防閑謹謹烽燧明斥候固不輕舉以微戰功如或虜人犯



塞必更相倚角設伏掩擊出奇制勝使匹馬隻輪不返則虜必懲創縮  
畏不敢輕於窺邊而後可以言守也已其三曰講備邊之至計前者殘  
虜寇隄守臣率多閉壁不出是致醜類橫行肆侮旁若無人驅殺人民  
殘破鄉邑劫掠積聚焚蕩廬舍爲守將者如越人視秦人肥瘠未嘗過  
而問焉迨夫封豕長蛇盈巖溪壑徐徐引去亦不聞出兵追躡問之則  
諉以獨力不支是以若此嗚呼是可不深懲前失而亟爲後計乎當蘇  
秦之爲從也約六國連衡之衆以抗強大虎狼之秦秦兵不敢出函谷  
關者十五年夫六國至難合也蘇秦掉三寸舌猶能合之爲一家而獲  
效若此今以我國家自有之天下而行吾所得爲之事宜無不可者矧  
殘虜番亡不足以望強秦之萬一乎宜行下兩淮帥司疾速契勘諸將  
屯戍之兵覈其事力方略有如他日虜或犯淮東則使其處兵制其左  
某處兵禦其右某處兵營其前某處兵掩其後既以遏其剽掠且伺其  
可乘之時而擊之其於淮西亦准此規專命制帥司主其事設有緩急

立以羽檄調發所合應援之處遣兵會合如逗留不進者國有大刑必  
罰無負規畫一定則長淮之勢如常山之蛇首尾相應虜苟送死破之  
必矣其四曰興屯田之大利蓋千里饋糧士有饑色輸邊一石費三千  
鍾我國家中興高宗嘗因營田官候對曰營田就緒庶可少寬民力朕  
頃在會稽嘗書趙充國傳以賜諸將孝宗乾道中制曰欲營軍食之儲  
必講屯田之制尺籍所錄日有增加邦賦所入歲有定類既不可剝下  
以取給固不若興田以雜畊此聖明留意屯田之家法也今戍邊之兵  
連年不解轉餉不已民疲可知况兩淮荆襄素多曠土宜明飭制帥司  
及州郡並開屯田張官置局專庀其事相地勢闢草萊具牛犂辦糧種  
各修實政毋得具文春則具墾闢頃畝耕作人徒秋則具稼穡登成收  
穫斗斛詳悉申上朝廷考其績用之成否歲入之豐耗而行殿最賞罰  
之法庶乎屯田之利可見而軍食自此裕矣其五曰收民兵之用人皆  
謂自民兵之分而民不可使爲兵殊不知此可言於安寧無事之時不



可言之有盛多事之日如漢是錯所論唐李抱真所行今不必縷數我  
真宗時陝西歲取邊力人爲弓箭手而無所給曹瑋以塞上廢地募人  
爲之皆爲精兵仁宗時元昊叛范文正公以延州點集鄉兵令刺其手  
此我朝用民兵故事也蓋沿邊之民風聲素習剽悍果敢馳馬荷戈乃  
所素習彼其父居士著家室墳墓牛羊豕豕相皆爲子孫之計憤疾胡虜  
之心人皆有之特患莫爲之倡率糾合耳官司倘有以言其心力作其  
志氣互保齊并誰不樂從宜明飭制帥司於荆襄兩淮州郡皆團結民  
兵用三丁擇一之法聯爲隊伍擇其首長授之器械教之戰法仍行招  
誘激勸之道使樂爲吾用則其人皆良農也皆精兵也不虞於官而數  
十萬之衆可具何憚而不爲哉其六曰堅忠義之心夫中原遺黎皆吾  
赤子彼見天亡殘虜襁負來歸國家撫之以恩結之以信莫不感激思  
奮志感讎虜或者乃以來歸者衆糧餉難辦爲慮殊不知古人惟患人  
之不吾歸未聞以歸我之多爲病秦民歸心於漢祖所以創大業漢民

歸心於光武所以濟中興故曰得其民斯得天下矣今來歸者皆山東  
人迫於殘虜之虐爲避災之計吾惟有以爲之主宰治有政令寬其刑  
役反其田里安其生業何患衣食之不給哉今忠義之將功效既著宜  
以所得城邑悉使領之彼得憑國家之威靈非特建功於一時且將宣  
力於後日垂勳名保富貴固所樂爲其志於國家未無窮矣其七曰定  
乘機之策嘗觀戰國時魏使龐涓伐韓齊遣田忌將兵救之孫臏教田  
忌引兵疾走大梁龐涓聞之去韓而歸齊遂大破魏兵而龐涓自刎古  
之大梁則今之汴也古之齊則今之山東也使殘虜不敢爲寇則已如  
敢入寇第使山東忠義之衆疾走大梁衝其方虛攻其必救虜人烏得  
不速返以護巢穴返則如龐涓之敗明矣此安邊破虜之奇策也十三  
年正月差克省試中門官四月差克御試對讀仍兼初考官十四年三  
月轉承奉郎監行在都進奏院八月轉朝奉郎十五年正月差通判常  
州未赴差知惠州五月轉朝散郎初抵郡飛蝗甚熾乃默禱諸神且燦



自刻責之以身代百姓受害是夕大雨水漲明日忽有鷹隼鳥雀以千  
萬計相與喧噪驅蝗赴江而斃其為政崇正學獎善類先教後刑勸農  
寬賦凡利民之事知無不為一考之後郡計稍寬即損已俸以助公帑  
自城壁倉庫解舍橋梁祠廟皆一新之百度修舉是時東廣諸州寇賊  
嘯聚劫掠鄉井或數百為群或數處俱發兇焰所至村落為墟其渠魁  
曰曾官蘇况等皆驍勇一可當百朝廷屢放省札下本路重賞收捕公  
察僚屬中可委任者密授方略且多予金帛使遣間諜務知其蹤跡設  
伏掩捕果生擒渠魁數十赴帥司梟首傳示餘黨悉平一路以安廣帥  
應公純之上其功得旨褒美轉朝請郎誥詞云爾之為州也政以安民  
兵以除盜恩威之施各當其宜帥臣謂不一之盜發之他州而爾能悉  
取之使濱海以南今皆晏然則爾之功實被乎數州矣豈止一境之清  
哉姑進爾階以煇明陟公拜命曰賊盜安民職也其敢言功十七年龍  
飛覃恩轉朝奉大夫解任而還郡人惜其去為之攀送者數百千人至

有泣涕者其得人心如此是歲年七十嘆曰吾少赴舉不減年以啟君  
今當謝事豈宜復入修門即上章乞致其事寶慶元年七月差主管紹  
興府千秋鴻禧觀三年六月任滿再乞致仕又差主管成都府玉局觀  
紹定二年累章力伸前請九月得旨特轉一官致仕進朝散大夫因言  
素癯瘠間關踰嶺每自揆不能久于世今年踰七十澤及三子足矣舉  
家務以付諸子所居前挹清溪喬木脩竹隱映綠秀乃即其地築室曰  
芳洲樓曰景星亭曰濯纓曰拂雲日與賓客徜徉酬唱其間四年正月  
覃恩轉朝請大夫賜紫金魚袋五年五月下泝忽感胃疾時長子官浙  
東次海陵季待銓中都家人招醫不許曰脩促數也作三書以報三子  
不及其他惟勉以廉潔公勤而已投筆瞑目時六月朔旦也公天性純  
誠表裏若一處已接物正直而謙和內蘊聰明不自表暴居官清介常  
俸之外毫髮不取訟牒紛至裁決如流不可干以私服食器用取其僅  
足不務奢華雖仕致五馬人以爲榮真自處無異寒素訓誨子孫惟以



清理讀書為急人有嘉言善行稱之不吝口未嘗言人過失喜愠不形於色樞密程公卓除工部侍郎時舉以自代其詞曰朱某為士時嘗讀書蕭寺居深山窮谷人跡罕到攻苦食淡如是者數年出其所學遂魁一郡之士繼取科第後生晚進多師承之迹其居鄉心恬氣和未嘗訟人于公庭亦未嘗謀利於私室鄉之老稚起敬起慕逮試邑鄱江以詩書行撫字無迫切峻厲之政有寬裕優游之美邑人相與安之為立生祠其古之所謂循吏者歟迺今分職在帑出納惟謹臣知之既詳信之甚篤舉以代臣實允公議平生大略可見於此嗜學追致仕不廢方冊待次學者來從不遠千里率百餘人隨材誘掖後多知名之士每言人心不可一日無用昔賢運甓可以為法平生著述有訥言十篇末議四篇默齋文集二十卷藏于家塾初朱氏聚族甚盛然未有以儒學起家者公始入大學登儒級已而分符竹列班行由是族之子弟益知向方姪申從姪况相繼登科而詩禮之風衍矣公生於紹興乙亥十月十日終於紹定壬辰六月一日享年七十有八娶程氏先十五年卒累贈恭人子男三人長沂儒林郎辟差監紹興府石堰鹽場汝從事郎監泰州丁溪劉莊鹽場汝將仕郎女二人進士吳去非程明其婿也孫男七人錫鑰鎮鑄錢鑑錡女七人未笄期以紹定六年四月二十二日歸窆首村西山之原一子復居故里皆治命也璵方營下松峒而孟季朋來示以行述顧居同里仕同朝誼不容辭也乃因其辭列其狀于右俾來者有攷焉

通守陳公慶勳傳

陳定宇

公諱慶勳字志問世家海鹽之陳村曾祖嘉聞始遷五城祖仁傑父克紹皆不仕叔唯深春秋紹熙壬子冠鄉舉慶元丙辰擢第調德安府應城尉而卒公生於淳熙癸卯甲子年甫二十有二以詩經貢于鄉五試春官紹定壬辰徐元杰榜擢丙科年已五十矣授廬州舒城尉端平甲午全子才主選之師入河南謂中原可指日復制府委公董餉汴京米



以石計者萬有五千載以舟百自合肥部舟至京口又裝涉湖而江又  
沂河而淮北過徐泗南過盱眙歷濠梁抵壽春未幾敵決潼關水灌軍  
事有大謬不然者公亦匹馬南馳與吏士皆飢疲采野瓜柿梨棗代食  
幸而得還公在任日嘗率士卒獲盜二十有一人相視山寨數十處教  
之備禦邊氓獲入堡安集皆鈔粟之士所深避不敢爲者端平丙申替  
歸授嘉興府華亭縣浦東監鹽場嘉熙己亥之任庚子霪雨大疫且大  
饑亭戶四百五十有奇僅存百九十貧不聊生坐是課大虧度臺初索  
公績歷寄庫繼察公廉勤無所歸咎陳于朝令公解見任別注一等合  
入差遣奉旨特依淳祐辛丑也公在任姦民蕭元輔者以亭蕩二萬以  
冒獻于御馬院公親詣度臺條陳源委利病乞奏于朝石卿孝淳備以  
公言敷奏得旨以元蕩還亭戶石公令公代撰碑頌以垂不朽焉公嘗  
上書有曰淮西之餉汴海東之疫饑皆百年所無之事而某任敬則  
當之任驪局則當之豈肯相寒苦而然邪三授韶州權官淳祐七年

月之任先是獲盜賞典屢陳未行左司徐公榜下士孤寒無援爲言於  
朝下未吏部符下轉儒林郎改次年合入官方公之在任也以劄子言  
二事才部使者其一言寺院之弊其一言州縣之單曰官因常住之多  
寡立爲措息之定額利措息之入開告許之門大率常住有千緡之入  
則措息收千緡之半今日僧請增輸則乙可攘申之據明日許其小過  
則丁可毀天之據是官與僧同盜常住也乞委本路監司覺察當緣請  
住有及于此同以賊論言兵事有曰廣東諸郡多與章貢柳桂鄰溪峒  
縱橫時乎出沒相據而起遂至震驚始畏張皇而卒至滋蔓以兵不足  
故也昔儂智高之禍可監矣一二年來如韶有九峰之擾章貢有寧都  
之擾懲之於前則宜防之於後策將安出曰填補官兵措置民兵是也  
何謂填補官兵諸郡廂禁有名無實昨行招補奈招之易而養之難然  
以韶一郡言之雖無生財之道而有出息之計竊見江浙郡縣全籍酒  
課而獨不行於廣南民擅權酷之利者日以富官困非泛之給者日以



貧儻許官自設法與江浙一體施行官酷界外不妨民酷則酒息可助  
招補矣廣南隣郡自鬻鹽今本郡有寄椿省錢萬緡倘借此錢以充官  
鬻本柄與隣郡一體施行而於官鬻界外不妨鈔客則鹽息可助招補  
矣本州有萬緡解庫歲有出息約二千緡倘許以此出息亦充衣糧費  
則解息可助招補矣合此三者以資招補於民無損於兵有養闕籍補  
以強壯老弱代以子弟委監司以撥元額飭郡守以嚴教閱則廂禁虛  
名庶幾可革何謂措置民兵陝西義勇兩淮萬弩手皆民兵也二廣號  
爲樂土土曠民稀所以處流民置兵籍猶有可議者試以韶一郡言之  
冒占戶絕之田無時無訟不闢不耕之地茅蕪相望凡若此者倘自朝  
廷行下官不許鬻民不許請盡行根括籍爲官田稽其畝步以處江上  
之流民而徙耕之所過州縣量行資給爲之室廬資以牛種復其租役  
家籍一強壯爲半年軍春自耕耘秋冬教閱自縣而一郡郡而一路籍  
田可處萬家則得萬人爲軍矣今江上流民動以萬計與其使耕於沙

之危以資敵之向導孰若使耕於二廣散處於有餘之地與其使冒  
之萬弩手焉夫以出息養州兵以爲緩急城守之備以閒田養民兵以  
爲緩急調發之備二者官無養兵之費而坐獲養兵之利不猶愈搏手  
無策乎凡此皆鑿鑿可行韶守張公貴洪舉公曰燭姦搗偽如見肺肝  
吏服其公民懷其惠湖北漕蕭公逢辰舉公曰性資純恪學問老成權  
第二十一年一寒自若邑民嘆服有清靜無欲之化當職得之親見初非  
溢美戊申赴班僅授鄂州蒲圻丞辛亥五月替歸五授簽書威武軍節  
度判官廳公事兼西外宗正簿福建提刑胡公穎知福州陳公昉交章  
舉公最後知福州陳公德與有曰稟資樸茂蒞事恪勤人以爲不誣寶  
祐乙卯替歸六授荆湖南路轉運司主管文字方漕使章公清孫之赴  
召而去新使洪公壽之未來也有旨命公護印時兵興雲屯待哺招糴  
給運省至嘗以減糴數申朝省且以書言之鄉哀程公元鳳論度牒登



仕誥難售程公復書有究心職業之稱與裁減誥數即暗減糴數也繼  
有旨湖南和糴二十萬石寶慶全三郡乞蠲免公恐上江四郡紛紛援  
例所糴數將於何敷之別白利病曲盡其事丁巳九月省劄下云湖南  
運管陳宣義申述詳明極可嘉尚付湖南轉運司嚴督之戊午八月漕  
司瑱闢試士史漕嚴之委公董試且俾飭考官命題立說主於正大是  
舉取士允穆輿言公有力焉九月出院替歸開慶已未以請得通判武  
岡軍未幾改注福州倅景定庚申也公嘗簽判是州去思在人光聲所  
騰士民鼓舞遽以二年辛酉六月七日謝世公自少負雋聲叔姪弟兄  
自爲師友與應城公治經雖不同而學術淵源則同崎嶇州縣之職垂  
三十年非無功而仕止於是然謹畏自持終始水蘖沒之日田畝不盈  
百人多以老且貧爲公惜焉公自歷官職分必盡賞不酬勞譬之於物  
早遲巨細時節分量一聽於天菊之香晚不羨梅之先春鶯鳩之捨榆  
不羨雲鵬之搏扶吾方以壽考安貧爲公幸而不以老且窶爲公惜識

者當有取於斯言循轉自迪功至宣議以官年少拘礙遂不得上贈二  
親公爲文長於論事有陸宣公之風五七四六皆典重純雅惜遺逸者  
多櫟於公爲族姪孫不忍公之沒沒無傳也隨所見聞追而爲之傳泰  
定元年春二月二日戊子櫟謹書

元故奉訓大夫江淮等處財賦都總管府副總管鄭侯昭祖墓  
誌銘  
虞文靖公

侯諱昭祖字孔明姓鄭氏徽之歛人曾祖悅祖南鳳故迪功郎江東提  
刑司幹辦公事父申道故宣教郎君生十一年而孤善事祖母能自樹  
立成其家至元丙子江南初入圖籍致貢賦郡中無敢署劇職者君年  
一十六獨以材推擇得管庫上計江淮行省比訖事以明敏稱年二十  
七用薦者言除將仕郎廣南西道儒學提舉不赴家居十餘年年四十  
四有司以姓名上聞天子爲下璽書用爲承事郎保定等路管民提舉  
又一年詔置江淮等處財賦都總管府遂加奉訓大夫擢副總管在官



踰年而歸年四十九又一年而卒得年五十至大庚戌十一月也夫人許氏先卒子二淵又名也先承事郎平江等處財賦提舉深以父任得官今夫人羅氏子二以文以忠女一適程極孫男一女二以延祐五年夏四月乙酉日葬其居之獅潭西北十五里烏石岡許夫人附獅潭者嘗有仙人羅君居之得道跨白狼超潭東巨石上飛去不復見蓋神明所遊山川奇會處也故其生物也異而託體者寧鄭氏素著姓於此至君而不顯其仕也起家一命而為勸學使者再命而爾書實來三命而大夫是拜可謂榮矣皆君命及門而未嘗出干祿也其居家也官有繇役命家隸立具無或後歲不足能周其鄉里未嘗出謁長吏有賢者則見亦無所干請喜藏書教子前進士鮑君雲龍明朱氏之學著書曰天原發微時人未之知也君獨愛其書刻諸木而傳之嘗自署其齋居曰敬通議大夫建德方侯回博學有重名同郡人也為君記其說其志而君之名蔚然縉紳聞矣其婚娶尤尚門閥許夫人高陽令族羅夫人

此已遠哉銘曰  
孰揭揭以趨奔其馬車我舒舒以居荷紫拖朱不出里閭禮儀尊書出試緒餘食貨用儲事木盡能弗競弗矜溯其本原支流可徵石之岑岑潭之黔黔生乘陽并歿藏寧陰允利不騫繁後昆之心  
從仕郎揚州路通州判官弗齋先生陳公直孫行狀

曹弘齋

公諱宜孫字行可號希齋中脩五弗措之義姓陳氏徽州休寧人其先唐廣明時自桐廬遷徙居縣南之藤溪以一姓蕃大家為陳村稅籍仕譜儒業文聲推于一縣公高祖始邑居生必達曰默軒公放懷山水有詩聲默軒生觀觀生登曰瀉涯公公父也詩似其祖書翰端麗老於文學再上橋門不利乃委社于公羊神秀儂變時炯然其為文落筆驚



人戊午遂貢明年取第送對已在乙科偶策議失權貴人意得同進士  
出身授迪功郎江州瑞昌縣主簿沿江制副葉撰汪公立信改辟蘄州  
廣信簿兼制師兩幕吏能綽著厥聲甚都明程勉恩二親封承務郎孺  
人孺人吳氏也族里以爲監丁孺人憂服闋廣德知軍賈公著世欲辟  
爲令東諸侯爭欲出其門以親病俱不克就歲辛未月山趙公日起鎮  
姑孰以節制司幹官刻辟侍親從之訟牒獄辭多以諉公衆健其決月  
山奇之將露章于朝以階清切遭承務公之變號既護履還家終喪循  
文林郎授常州州學教授需次間時事急郡守存畊王公積翁辟知太  
平縣事改知婺源縣事未及上爲至元丙子闔邑草竊起如沸糜公殫  
竭已力激勇裒智勉相保聚以俟王師之至上功外省遂知休寧縣事  
守土難在鄉土尤難革運之際又大難也公才識絕人不懼不暴拉強  
拊柔扶傾葺壞事無遺力功不勝紀其抗言于郡令本邑得以秣米代  
輸杭之窘最爲長便居三年鄉邑大治本道按察奧屯竹庵公始行部

以譽望知公請爲郡文學自乙亥兵興堂堂學宮以駐戍卒四壁闕空  
蹂爲園涵幾不可以託身立足公究圖之如堂如構爲既爲茨復侵田  
新器具齋扁鼎創先賢閣文其梁板刻之徽學之大壞而重新公之力  
也辛巳入覲授將仕郎開化縣尹衢俗獷悍開化爲劇公至爲說利害  
使知避就乙酉秋民劉元五等倡亂焚掠擒其渠魁十餘人戮之以次  
招收不費一矢邑學毀于兵風厲其徒逆復舊觀奉宣寬條蠲其徭役  
至今有去思焉再請選江西道儒學提學缺集賢翰死諸公列薦公使  
補其處命且下會特幸被罪公意亦闕竟授通州判官以歸甲午秋宣  
司以維揚路昏鈔委解汴省爲錠一萬七千有奇公無所辭泮淮泗沂  
河入汴不半月竣事廟宮未忝城郭人民一足覽慙賦萬歲山而還明  
年授代歸行李蕭然元貞乙未三月也公未至通州時築宅一區不爲  
窮峻加宏敞焉一堂深靖軒櫺翼之旁有隙地畦花藝竹每曰以是佚  
吾餘年亦可矣鍾鳴漏盡而猶行乎頻年曠勝間停飲爲楚遊止復作



丙申特甚入丁酉有加謂二子曰吾年六十有七仕近四十年遂收准  
浙薊汴之身以從先人丘墓之側有何不可而又求長不死乎吾一生  
平心直道粗可無愧以此遺汝輩應未為拙勉繼吾志而已言訖索水  
盥漱端坐而逝二月初九申時也公之生亦以申時其年月日為紹  
定辛卯之九月十二惟公少負俊聲壯老如一在承平鉛槧之士避其  
鋒值危難章句之徒伏其略為子弟修敬父兄為父兄據憊子弟於考  
德問業有教善之忠於喜慶急調有通財之美體用該常變一武文合  
庶幾乎全才而惜也止於州縣之勞公娶吳氏同生辛卯歲與公媿德  
男二人元方前浦城縣丞季方前休寧縣南五嶺巡檢俱能仕足紹其  
家女三人末春縣主簿朱彭休寧縣學教諭吳家安縣主簿朱宗周  
壻也孫女三人元方等將以大德己亥三月三日甲申翼事於邑南嘉  
善鄉善慶之原前期走書曹涇以行實為托夫行狀門生故吏子弟責  
也予得第遲然公試大院予就別頭有<sub>二</sub>般燈燭之雅入仕淺然公領

郡學亭長紫陽有異時同僚之契其生也又少公三年然則於公固第  
行也知公為詳狀公行為宜乃不辭書之謹狀

徽州路治中汪公元龍傳

洪杏庭

汪治中元龍字雲甫婺源人由太學登第授迪功郎紹興府司戶德祐  
乙亥兵興奉憲檄勸鄉邑劇賊遂知縣事歸附授朝列大夫本路治中  
績溪祁門盜起議者欲悉殲之元龍止戮倡亂數人全活甚眾弟元圭  
字功甫武學舍選淮閩李庭芝辟克幕屬咸淳末授承節郎徽州兵馬  
鈐轄踵兄元龍知婺源縣事兵火之餘人多逃徙元圭悉心撫字咸復  
其業申請免買屯田牛折收夏稅絲綿輕賚凡可以便民者必力為之  
授奉直大夫饒州路治中未赴卒元圭子二人良臣監察御史良厚嘉  
興路治中程文憲公婺源山萬壽靈順五菩薩廟記五顯神莫知何所  
始在徽之婺源吳楚闕越之間皆祀之累封號甚尊顯宋德  
祐元年燬于寇時聖人汪元龍守鄉郡元圭為邑宰復拜之施田若  
十畝奉時祀曰景福世祖既定天下禮百神奉香幣致祭至大四年  
再燬元圭之子僉廣東肅政廉訪司事良臣某路治中良厚首朝正殿  
衆爭獻貨幣門庶樓觀庖庫之屬皆成焉壯麗宏大甲于郡初朝州



林寺寺亦再興再構皆出汪氏延祐元年賜廟額曰萬壽靈順五苦薩  
內所共聞而廟有再興之功汪氏為大不唯神在國初元龍兄弟保民  
之功尤多仕官至治中伯朝列大夫仲奉直大夫良臣實為益察御史  
有能聲是為記

饒州路治中汪公元圭墓誌銘

方虛谷

古之立德立功立言而死者雖歿不朽士大夫歿而至於不朽難矣吾  
州婺源篤生太師徽國文公不朽人也其夢奠慶元庚申於今九十三  
年矣其四十七年丙午而州之紫陽書院與焉郡守韓公補實為之其  
八十八年丁亥而縣之晦菴書院與焉縣尹汪公元圭實為之紫陽之  
書晦菴之學前有光先聖後有功來哲而創二書院者俱大有功斯文  
足與文公同不朽嗚呼盛哉徽婺源回嶺汪氏世大族公字功甫晚號  
月山老人曾祖晉臣祖大才迪功郎知永平監娶倪氏生長子琰蚤世  
是為公所後父公所生父鄉貢進士應雷其從兄也公三歲為永平所  
祝又八歲永平卒母潘氏教育之讀書務通大義文耻締繪雕篆然議

論是非利病前輩輒退舍性至孝事先請後行嫁女兄二人遭內難與  
生父艱骨立毀瘠慎事節用年二十五六遂饒於財而能施嘗以軍國  
十策獻舊朝特補承信郎初監嘉興澉浦酒丁卯請兩浙漕舉浙東安  
撫使王霖龍辟充準遣再調侍衛馬軍司幹辦公事乙亥除江東兵馬  
副都監徽州駐劄虞盜周勝等嘯聚據邑公與同產兄松坡知郡元龍  
生擒之件于郡遷武翼郎擢江東兵馬鈐轄松坡早入太學回同年壬  
戌進士稍忤權貴十餘年不調至是以迪功郎黃州司戶權婺源縣尉  
知縣事至元十三年丙子正月十九日杭舊大臣納國土于大元二十  
五日徽城歸附公兄弟全民彌盜力保鄉井會有一李之變亭木魯敬  
軍至嘉公兄弟功多呈省換授公江東軍馬總管而以松坡知徽州事  
以公代知縣事是歲李已降而附閩視徽為首時出鈔擄公扼險置關  
寇不得犯其冬張九元帥征閩兵所過民震恐公迎送贈賂以禮他軍  
假道者皆然將士敬嘆不敢為暴境內耕藉刈穫如承平時初領縣人



疑公嘗治軍旅行重典而公斂威用恩寬嚴適中萬山間采柘鮮絲  
續惡有司苛責公詣省乞歲折楮幣名輕贖六縣民至今便之祠廟寺  
觀燼于火者換質具材新倍於舊或產去稅存或有田無賦貧窶富吞  
弱役強避一切釐正十五年江東道提刑按察副使與屯行部興學公  
大喜延名進士九江文天佑主文衡拔儒彥出稅帑立賞格免徭給廩  
士萎復振官造舡番陽期會峻急丁匠多斃公所部時其飲食人用盡  
力辦蚤費省工善物堅十七年代者至民挽不聽去至哭泣悲思則投  
牒借留以千計走都省選曹乞公再任十九年勅牒授承務郎婺源縣  
尹惠愛日益加名譽日益隆事爲日益著爲館驛爲水廳爲尹解更鼓  
樓過者咸曰壯哉縣而費皆不仰於官歲四月八日四方民詣五顯神  
爲佛會天下商賈輻集自額辦官課外公絲髮無取至如書院一事關  
風教甚大更郡守二十餘人非無賢守而郡之有紫陽書院自韓守始  
更縣尹三四十人非無賢尹而縣之有晦菴書院自汪尹始本道提刑

按察副使疎坐廬公擊深嘉之呈省起里人吳覺江雷爲山長皆名進  
士公爲山長屋百楹田六頃書萬卷先聖殿居中文公祠講堂坐序居  
左右回爲作記此公之大節也既受代宣命授奉直大夫饒州路總管  
府治中而疾篤弗起公同產兄二人長松坡初以省符知鄉郡後宣命  
換朝列大夫徽州路總管府治中先公四年卒次英發前登仕郎第一  
人雲龍前禮部進士省符龍興路同知述公行俾回銘者也公非於奉  
已飲不涓滴內無姬侍衣穿綴淡而分膏腴田於族兄弟則弗吝代民  
輸酒課及下戶一稅歲率數千緡尤弗吝可謂富而好禮不止於無驕  
者矣生癸巳二月十九日卒庚寅二月十七日年五十有八夫人詹氏  
後公八月亦卒生同歲歿同年夫賢知婦閭懿此不書子男二人良臣  
松坡子三歲爲公後前國學進士從仕郎都昌縣尹遷承務郎番陽縣  
尹良厚詹夫人出承事郎江東等路木綿提舉換宣授揚州營田提舉  
女一人來弟適同縣將仕郎建寧等路木綿提舉俞文翁孫男四人安



孫壽祖與祖愛孫女二人長適休寧武岡金主簿孫幼在室卜三十一  
年甲午十二月二十日合葬公與夫人于縣東長田源治命也銘曰  
世有一善行優於百善行者乎曰有之星源之有晦菴魯之孔鄒之孟  
也祠之塾之立天地心生民命也發于倉無飢民傳一燈有賢人我謂  
此愈於彼長田源之原子子孫孫

歙鄭令君安廟碑

程黶南

鄭令君廟者歙人祀其故令鄭君子廟也鄭君名安歙西鄉人以一言  
解屠城之師令歙三年民大治其沒也思之數十年不能忘至有祀之  
者父老且死戒其子孫鄉人曰微鄭君吾屬無噍類矣且鄭君正直後  
必爲神蓋相與祀之廟毋祠于家於是共立香火于城西之懋棠庵尊  
之曰鄭令君父之以爲未稱崇禮之意即庵旁立廟會郡太守不悅於  
民斥其請民大謹事上行中書行中書按令君功德應祭法且下縣令  
聽民立廟以時致祭如請民大悅則又以庵旁廟臨大道煩置祀非神所

居下遷之吉乃踰溪二里營高敞地近令君之墓更作新廟云歙人之  
祀令君也不敢慢恒以歲仲春中旬卜日刑牲醞酒大會廟下陳簋簠  
邊豆張樂歌舞拜薦以娛神禮畢醉飽神賜闔戶而退仲秋之日亦如  
之正月十五夜則奉衣冠出游燈燭簫鼓香花滿野稚童歡呼爭持紙  
金銀錢迎道望拜親之畏之儼如今君之復生也飲食必祭出入必告  
懷私負曲者不敢禱于令君之廟廟成之歲風雨協和疾厲不作盜賊  
屏息五穀大熟連三歲民咸曰令君福我哉具石請于新安程文書其  
事刻廟中以傳永久文惟東南之山川奇秀絕特者莫如歙其鎮之最  
大而遠者爲黃山山之峰三十有六而其最高者爲天都世傳黃帝嘗  
臨是山故名環城若問政紫陽披雲金紫靈山諸峰林立如畫川流奔  
悍數百里蕩爲浙江故其間風氣所薰在人則賢在神則靈而人之  
生往往沒而爲神上古遠不可知近代大而負出世之資開繼聖之學  
享國家千萬年之祀於天下小而列夫孝女仙翁釋子之見祠於其鄉



及其徒與在外縣者不論論自漢以來有功德於茲而血食不絕者東漢贈尚書令方豎侯廟在白羊山村後三百餘年有陳儀同程忠壯公廟在黃墩又百餘年有唐越國汪公廟在烏聊山最顯又四百餘年有宋錢氏兄弟廟在汝溪又百五十餘年有鄭令君焉是皆所謂生也有自來逝也有所為而不為偶然者嗚呼盛哉漢之盛為縣令若卓茂之於密魯恭之於中牟朱邑之於桐鄉得祀者蓋不少而皆非其鄉土及其季世以諸葛忠武侯之沒蜀人屢求立廟不聽至祭于道陌之上賴習隆向克抗章上言久而得立廟沔陽嗚呼又何其難哉我國家之崇明祀順民心款人之報功德厚風俗皆足以昭往古耀來今而今君之威靈赫然流行於兩間以為國家生民無窮之庇休有不可掩者矣廟起於後至元某年月日遷於至正某年月日屠城事載郡志及翰林學士揭公所撰墓碑茲特紀立廟始末而系以迎享送神之詞其詞曰靈山兮青青沙水兮泠泠中有原隰兮衍以平樹木總總兮花真真庭

戶敞深兮虛牖孺几席儼布兮崇豆登懸鍾鼓兮兩楹待令君兮不來佇屏息兮肅以聽倏奔雲兮擁霧令君翩兮其來下駕鶴翼衛兮使雙鳧先路馬鬣闕兮珮珊珊從之兮祖父酒注罇兮肉載俎恭獻進兮拜區俯繁音發兮紛屢舞絃絃兮坎坎撞鍾兮擊鼓神欣欣兮顧喜口若言兮自若視予上下帝所兮司福祉錫豐年兮驅厲鬼無遠四方兮矧茲邑里飄風颯兮神以還我民報祀兮于永年朱大同續志鄭安獻縣况欲分財異居不能止悉讓之寸田尺宅無所取宋亡之明年李世達叛李未魯敬驛兵昱嶺以徽反覆將屠城民亦自相焚殺安曰不可乃杖策謁軍門而言曰將軍承天子命攻城略地欲弔其民亂者世達一人耳既而敗走民爭具牛酒以俟將軍民亦何罪而欲屠之且將軍殺人以立威孰若不殺人以得衆殺乃許之兵不血刃民皆安諸將上其友攝郡事以安為教縣令就職未幾年而邑治將代民請府請留上其事始更賜銅章真命為從仕郎尹錄既歿鄉人思其惠請立祠祀於其里

竹溪方公貢孫宰鄉邑記

黃國論

祁門望邑也有山東聳峰巒雄峭祁山也清溪南奔石崖對峙閭門也重岡列岫隱隱隆隆四外繚繞蜿蜒扶輿清淑之氣融結其中名賢間



出必以功業自見承平則興禮樂以陶民心患難則攘奸兇以衛宗祏  
不虛生也邑治經始於唐之末秦因巨盜猖獗撫黔歛間挺禍東南里  
豪士長史吳公率衆勦滅州刺史上其事代宗嘉之授朝散大夫石州  
刺史賜金紫明年析黔六鄉及鄱浮梁地置爲縣合祁山間門名之曰  
祁門就以長史爲令今方令尹複製錦于祁門前後相距五百年一邑  
盛事如出一轍名世之生有數存焉方爲祁門望氏世植陰德代有興  
者秋崖先生詞藻擅名家機軸流芳猶子令尹舉進士第奉常初筮金  
陵吏官滿調毗陵節推繼而東淮餉臺辟真幕府沿檄來歸適值時事  
搶攘令尹之未歸也人望之旣歸也人悅之時則邑宰遁居民散并邑  
爲墟群剽于朝俾領縣事公於空匱休迫之際極力撐柱處之晏然號  
令嚴明鋤奸去暴縣境爲之帖息歸附後丙子春三月邑南有乾討虜  
突入所過殘滅逼及城郭民不堪命公於是遠迎三萬戶輟食亟往如  
拯溺救焚不旋踵而收捕拘繫者縱釋流離者安集民皆按堵如故秋

七月鄰邑之黔強梁煽亂焚戮劫掠撞塘震撼蔓延于祁之砂溪公又  
嚴加防拓昭揭文榜以理撫諭于時盜賊聞風銷弭彼黔則生靈魚肉  
室廬煨燼而吾祁則化刀劍而牛犢脫塗炭而杜席果誰之力歟嗟夫  
祁之民始而魚驚鳥逝携老扶幼於深山窮源旣而得返故家相咲語  
廬旅孰不舉手加額曰不圖今日復有相見之期此吾父母再生之也  
昔長史吳公平一隅崛起之盜民到于今稱之公當四郊頌洞獨能鎮  
靜保護鄉井戶口無虧方之長史之功豈偶然邪公器宇軒昂襟度融  
豁德望穹而才幹敏鼎新縣治掃除宿蠹賦役均詞訟簡遇有公上之  
需類皆不擾而辦至於勸課農桑則田野加闢俾得以桑麻春郊雞豚  
秋社者皆公賜也凡事有不便於民者必親告於上勤勤懇懇不憚其  
勞求以便民而後已公之爲政六事悉備當路薦舉有曰奉公畏謹處  
已廉明闔邑士民莫不愛美荷歎休哉可謂下不負所學上不負所知  
矣有大抱負必有大設施行將展所蘊以福天下蒼生要非鄉邑所能



私者邠人德公之惠而請書其事于石蓋將以傳之不朽云公名貢孫  
字去言竹溪其號也時至元十七年十月望日儒學教諭黃應旂記

進義副尉徽州路休寧縣尉程君隆墓表 于壽道

此故休寧縣尉程君之墓其孫曰子峴以予嘗官新安走書請文其墓  
石予不覺慨然嘆曰是故嘗有功於鄉邑不可泯者因追述其事而表  
之曰昔至元丙子春丞相伯顏受詔下臨安惟時宋都統制李銓舉徽  
州以降副統制李世達殺戍將拒守丞相特分萬戶李木魯敬一軍而  
西破昱關以臨徽州世達敗走閩所在兵起萬戶急下令屠歙休諸縣  
於是歙人丘龍友等率父老詣軍門言亂者世達非百姓意請全活之  
以廣弔伐之仁萬戶許之且議徽險遠宜得其土之賢者分守庶安集  
其民人遂承制以龍友權知徽州事前紹興司戶婺源人汪元龍佐之  
歙人鄭安權知歙縣事前常州教授休寧人陳宜孫權知休寧縣事君  
及趙象元佐之元龍弟元圭權知婺源縣事邠門人方貢孫權知邠門

縣事程克柔佐之蓋兵不血刃政不踰時亂者復業四境安堵諸君子  
有惠烈于鄉邦甚大邠人頌之至於今不衰焉君諱隆字君熙休寧陪  
郭人性疏爽不群喜問學從故弘齋曹公遊與邑人金革朱煥齊名時  
號三俊然屢試有司不利迄不得施嘗上書郡守王公應麟趙公必槐  
論時事數萬言兩公奇之莫能薦會王公積翁繼爲守始廉部中名士  
得君與歙人鄭天麟遂辟君休寧典史天麟歙州路鈐居數月俱以才  
局聞而宋杜屋矣方世達之變也君請故宣參畢公祈鳳王縣事力相  
保聚亂定而畢公去不復出君又請宜孫主之邑賴以全且念瘡痍之  
秋摩撫備至征科不煩獄訟稀少盜賊屏息部使者稱其能方是時縣  
之人若埜山孫元京黃原吳達齋輩皆宋遺民高潔而婁君一一存恤  
之識者尤以爲難居三歲以疾卒君之先居歙黃墩曰元譚者當晉東  
渡爲新安太守有善政爲民所請留太守之後曰靈洸梁陳間起鄉兵  
討侯景歷官鎮西將軍開府儀同三司謚忠壯忠壯之後曰雲唐季復



起鄉兵拒黃巢歷官歙州都知兵馬使子南節定居休寧陪郭傳五世  
至宋開州團練使全禦金人于池州時伊川子孫避亂州中遂相通譜  
全後以節死子先誓不仕生三子長永正帶御器械居臨安次永奇號  
格齋先生從學朱文公次永彰宋鄉貢進士即君五世祖也格齋四世  
孫圍無子而伊川七世孫榮秀實繼之故君之族於伊川爲近識者又  
以爲程氏世有功于徽而忠勲所成遠有端緒若君亦可謂克紹祖風  
者矣君高祖琬仕爲宣議郎曾祖茂官至臨安府磨勘司主押官祖梓  
父陵俱不仕母凌氏宋忠臣徽猷閣待制唐佐之族孫娶何氏有賢行  
生子二人長忠甫蔭授休寧永盈庫副使次清甫建康路玄妙觀提舉  
孫五人子觀子峴子善子華子美墓在縣之一都斷石村心榮秀於君  
從弟也延祐中歷官江浙儒學提舉子文貴亦以薦爲饒州路德興縣  
銅冶場提領與忠甫清甫竭力修復先業而子峴尤繼其志捐田以贖  
塋續譜以鳩族且念君之墓久未有金石之刻乃以榮秀之狀請予書

之子嘉其志而元龍之孫行諸路金玉府副總管恩禮安之孫玉象元  
之孫汝各以書申言之通家之義藹然可想故著其功之大者于首而  
詳其官行世次于下方以詔其子孫及鄉之人且使後之秉史筆者亦  
於是乎有攷焉

元故青陽縣尹汪君

維祺行狀

家乘

君諱維祺字壽甫姓汪氏其先居歙之唐模自唐越國公華以來爲鼎  
族宋紹興初有贈金紫光祿大夫諱叔教者自唐模徙潛口長子將作  
監丞若容少子秘書丞若思相繼登進士而中子若虛克家不仕生福  
州福清縣令淮淮生鑄鑄生師儉又自潛口徙信行與秘監之後聯居  
君即師儉之子也性穎敏嗜學凡書史過目輒記不忘爲文古雅所作  
取有補於風化尤以剛介自持所居之東榜曰介菴宗老尚書文節公  
過其家爲大書揭之其爲時所重如此膺薦授石峽書院山長所甄  
者率皆成名陞杭州路儒學教授嚴立條約以身示教值歲凶學廩有



負欠年終不足者吏白請置之獄君曰貧家晚歲其父母獨不望救水之奉乎乃以已俸代償釋之欠者多感惠無再負者秩滿擢池州青陽縣令蒞事一以公勤邑曠險多盜民懼不敢行君下令省諭或有犯者稍給資本使治生產鬻販盜由是息張氏兄名奄有其亡弟之貲而誣其婦以姦狀又邏者捕盜而賊不符其主數獄皆已具君獨審其有冤而持之間行訪察悉得其情而白之乃已歲饑民大疫君不待請發廩賑之召醫診視日往撫恤活者甚衆民惟戴相語曰汪尹再生父母也居無何以親老請致仕民相挈渡道攀餞鳴號動地雖古循吏殆不是過云君既歸朝夕不離親側服食非手薦不進暇日取秘監竹野怡吟集編次成帙以傳祖墳菴曰金紫院僧利他姓募捨將割其祀之半以供君毅然不可曰院乃制額以奉先大夫者異姓何預焉率宗人重建公之力居多親歿葬大富山廬于墓傍葺屋祀祖若父寓守者於側自號富山主人有富山餘藁四卷以歲丙寅某月某日卒享年八十有

新安文獻志卷八十六

乙集

行實 吏治

元中憲大夫浙東道宣慰副使程公相墓銘 揚志行

公諱相字仲和姓程氏徽州歙縣人宋咸淳初以從祖丞相吉國公元鳳郊祀恩奏補登仕郎及朔南旣一禮部尚書謝公昌元用故官薦得信州錄判方踰年以母病去改徽州路司獄轉從仕郎婺州路蘭谿州判官調承事郎台州路寧海縣丞轉承直郎臨江路清江縣尹轉奉議大夫常寧州知州兼勸農事遂以中憲大夫浙東道宣慰副使致仕至順三年二月丁卯以疾卒年七十七環谷其自號也曾大父諱放宋贈太師魯國公妣吳氏魯國夫人大父諱元定於吉公爲同母兄登進士第仕宋爲朝議郎父諱宏祖仕宋爲浙西發運大使司主管機宜文字以公故贈中憲大夫漢陽府知府上騎都尉追封廣平郡伯妣胡氏諱淑能追封廣平郡君所生父諱有能仕宋至提刑司幹辦公事吉公以



兄朝議子死無後取公於族以爲之繼妻汪氏諱德繁宋樞密使綱之  
孫女前進士望江縣尉琦之女子男燧以公蔭授進義校尉兩浙運司  
石堰場司丞女三壻曰池州路儒學錄汪之純曰曹州人匠官汪完澤  
曰鄭以文孫男五宗觀玄觀祐觀元觀山觀女三公幼而端重寡言吉  
公竒之謂必能亢其宗及爲司獄時囚滌濯衣食意曲盡察其枉者白  
出之在職八年舉重輕咸陰飲其施大德丁未飢蘭谿在浙東諸郡爲  
尤甚公旣勸其州富民發有以賑行省有命發移粟以濟蕭山時疫方  
熾人莫敢往公聞命不辭訖事而疫卒不及後舟道蕭山泊夜有羣盜  
謀而來舟人舉燭盜見公驚曰是固蘭谿州判嘗移粟以活我者邪即  
棄去州有婦通所私而殺其夫以尸藏乃剗其腸并褫所衣衣遺道上  
若爲虎所噬者以不得骸殖告公視婦無戚容給曰若夫不幸死虎取  
其遺葬足矣婦旣去陰遣人躡之則道與一男子相耳語擒鞫之得殺  
狀且獲其尸人以爲神寧海人以挾私鹽得因殺幼女誣羅卒卒長以

私怨榜卒承公視其傷與詞異立直之清江有無田而輸糧者歲爲石  
萬蓋自宋靖康時權假於民以給軍刻石具存經理行郡欲舉其數加  
民爲已功公力爭不聽守震怒權辱將誣以罪公不顧徐曰吾爲民死  
無恨會上官至白之卒如公言盜起寧都軍需星火急公以夜繼日力  
取給訖不乏而盜平廉訪司委以覆邑早皆懷金以伺公躬履民畝取  
其不早者罪之一私莫干邑小吏非名補者乘公出雜然入邑縱操事  
莫能輯公歸法之終其任一迹無小民時時以逋負殺子女誣債家邑  
官每以爲利公得其誣蔽之罪俗遂革行省命以郡糧數萬石運真州  
旁邑官皆行賂免公獨不辭出江風大作舟危覆公適酣寢夢神人長  
丈餘語之曰若心合天當護若以出險毋恐旣覺而舟已平及授常寧  
即以年迫休致遂告老在官一不以財賂自晚苟利民無劇易必力爲  
不自顧望沮止所植卓然蓋其官業所由來者有自雖不獲大施於時  
以及柄用迪前人光然旣休官貌日加豐中舒外澤步履不衰夜書細



字如五六十歲人與其兄承直郎松江府判文彬尤友愛遊處必偕妻  
賢子孝孫息滿前被紫橫金華焜宗鄙優游娛佚以享其年則天之施  
報何如也嘗豫卜藏穴深以金帛累身爲切戒疾旣革即櫛浴更衣端  
坐而逝遂將以卒之二年某月某日葬之歛東潛川前事致其里人奉  
政大夫前饒州路總管府治中方君存心之狀謁銘於予遂爲之銘銘  
曰

程氏之先顯有遐承迨戒周旅伯休著稱煌煌史牒後系前仍暨茲元  
滌有烈無朋振身田閭配食陳庭本隆支茂宜蟄宜繩天球在宋遂相  
昭陵統官惟百吉國徐興稽立攷成名勲具登疑彼中憲志追前能佐  
州歷縣序進年升何艱不任靡重不勝卒參使節官以才弘一縑弗翳  
璧瑩淵澄篤易和適以佚餘齡尚羸康祿垂施孫曾有蔚者阡流融峙  
疑最其世榮末奕幽局按宋丞相吉國文清公世居歙槐塘而有別業  
在績溪仁里公兄朝義子運機宏祖宏祖子宣  
魁相相子嗣承後也宣慰此詩經兵變失之予嘗閱中秘書而得之干

特制用齋乘中因書

元龍泉主簿胡公湔墓誌銘

胡汲仲

延祐五年二月戊午前吉安路龍泉縣主簿胡公卒家婺源州十一月  
已未葬其州高倉里龍泉族父炳文具書前進士江雷所次行狀一通  
授龍泉從子宗海抵嘗所識求康胡長孺建昌謹致辭伯父棄捐子弟  
之明日實奉奔走請銘會先生考試江右歸未到宗海旣還復西走此  
土惟是羸焉諸孤哭踊伏聽鞠屬言置耳猶涉彌千里歷五程會朔請  
事嚴勞非敢云長孺與禮讓已告曰是書固言然何忍終拒遂述志作  
銘龍泉名湔字安國其先龍西李氏唐諸王子朱溫將篡屠滅宗室畧  
盡先是淮南將高駢死楊行密徐知誥相承纂緒保有淮江東西地徽  
故歙州僻險絕與吳越鄰溫莫敢覬闚亡人樂奔焉有昌翼走婺源就  
考水大姓胡隱義之變從其氏舉明經中第南唐時不復公族姓矣是  
爲明經公云八世孫朝散大夫權知無爲軍事仲與兄伋登紹聖四年



進士第文章號棣華集無為最有聲故元符間太學為之語曰江南二  
寶胡仲汪藻兩公皆州人無為從子朝奉郎通判南康軍事特與兄搏  
舉紹興十四年鄉貢進士登十五年第南康登龍興元年第是為龍泉  
六世大父曾大父自厚朝奉大夫權知瀘州軍事孫太學登開禧元年  
第大父知先號經訓翁父萬太學中舍生龍泉個儻卓越企慕漢丞相  
武鄉忠武侯視瑣委猶埃燼沮澤將至濺已畏惡不敢近賦江左臥龍  
詩據憤鬱時天下初混一未設科官莫敢喻教肆行道終日無聞琴書  
聲龍泉請於其父若其伯父次歿於明經公書堂二父為師集里子弟  
講經涉十年遂皆知聖學為發易十疑遠迹來析剖其義至千餘卷學  
徒受成謀於族父炳文弟澄徙西山之麓建明經書院宮室樞制視岳  
麓白鹿洞有加具養田三頃約三分租入以一供義學食費族父為之  
長譚經日聽者盈千人集賢學士吳公澄幼清記焉遂上名數于官猶  
未籍禮部州學置為道大成殿浮梁州百八十里徽饒境上曰太白渡

維鐵聯舟二千尺有奇買田給葺補養守祠公又作長壽橋明經橋也  
中建甘泉湖山二亭滄茗煮水飲行客初太學嗜山水故時花藥種竹  
樹鑿池架亭富春芳塢間稱兩山翁龍泉日設酒棧請公所敬愛賓客  
嬉遊歌吟其中公預期八十且盡取歲粟周貧未及期沒猶以是年散  
財施米如昔言龍泉早失周姓母事繼母吳如實產已兄弟同食飲五  
十年無忤色遠言族無疎戚貧老月有養資鄉賢老時有遺傍近民畏  
病相救恤鬪訟爭可義理辟曉從容一語立解至龍泉縣詣學惟詢訪  
先賢子孫諸生說書為文字少異其曹雖稚齒亦與抗禮膳士田為天  
寶桑林二僧坊貪賴府縣取證故藉將復歸之學吏顧賂謝不即予至  
則索文書授之翫體多不能屈折事入上官長吏不樂咄咄弗休嘆曰  
主簿尚可為哉即日謝病歸二月丙辰夢火光彌室旦眇夢告子弟曰  
死日其在戊午乎吾生歲行適周矣是日果死嘗創書月高樓其家藏  
郡書寫疏廣教子孫多財賢損志愚益過置室壁平生論議疏曠而處



事詳密生計裕如而持己纖嗇食羹淡泊而奉客腴醲此其意固非在財利以私其身家子孫者也娶同里周架閣公孫女銘曰力嚮經術欲淑諸人敬教勸學是近於仁勇棄己私繫人其利飲枯濟深是篤於義世右盛氣浩然崇高侮言違道安得為豪病痺弗知殊涂詭轍匪融一家何足為傑允矣龍泉篤義近仁既孝既睦超邁不群志事有稽銘言無刺堂歸山存碑猶傳信

劉彥明德智墓誌銘

柳文肅公

彥明諱德智字彥明姓劉氏世家于歙曾祖諱元佐祖諱儒望父諱震皆隱德不仕鄉里稱善人焉初彥明之父以張為後於劉生彥明四歲卒而張氏父固在實為之經紀家事教育彥明至於成人張五子其一夭而其家素裕彥明尤大父所深愛將使還後天者彥明泣對曰劉氏無子故以吾父後今既歿于劉氏明其為劉矣德智以一身繫劉氏之宗誠不敢重獲罪於吾父與劉氏也大父感其言而止彥明少知自屬

學好讀孫吳兵法旁究釋老方伎之書嘗因是感疾已乃大悟求之書浩有所得久而下筆為文覺其來源源纏纏遂得由序序選為建德路儒學正會教授闕進攝其事守郡者諷使文致直學之罪彥明不為勤俟間覆為辨說考滿入教授銓翰林院方薦為其屬而彥明翻然歸矣尋授東順等處軍民安撫司儒學教授未上中書刑部辟為其部令史官有齎怒於同列而將黜之彥明日無厭將及我投筆謝去於是都水監復羅而致之稍進壽福院掾壽福出納五臺諸寺錢糧其田入隸浙西數郡比歲浙西被水有司按實當檢放而院猶責償未已彥明適從其判官出行江南視其牘歎曰官民糧已罷徵吾院田能獨無傷乎悉命弛之諸使怒其專擅而卒亦無能奪其議者嘉興有豪民誣占寺田二百畝左證甚明而院所遣使速賂莫能決及彥明來請鬻路絕乃卒歸其田考成得將仕佐郎衢州路常山縣主簿滿歲江西省有知其為者辟為掾新執政至杖一掾而掾實無罪彥明竟歸曰吾唯不能



隨俗俯仰以至於是可再辱邪進將仕郎為平江路總管府知事平江  
劇部案積叢勝彥明處之以無倦取其犯名義者一二事稍釐正之不  
激於奇不毀於隨暇則却騎入閭巷訪求耆舊聚茗縱談猶書生故態  
也閱再歲卒官下得年五十五天曆二年七月十四日也談者例嘗儒  
生為政迂闊於事情而不知聖人之法制具於經儒能據經義法故達  
權而知變彼隨時重輕觀勢向背以竊取過人之名者豈所謂政哉彥  
明得於所學歷試內外階是以無失身敗名亦未為無所見於世也彥  
明之配李氏姑女先卒子男二燿煜女二長適徐梅次在室卜地得建  
德之淳安縣開化鄉駝馬原距家餘百里將以其年某月某日窆先事  
其子煜具書世出爵年為狀從其鄰杜某父乞子銘其言曰葬而不得  
銘猶無葬也子當識彥明京師知其為人而杜君又不輕於許予是可  
銘已彥明始字千里謂其取義之未廣也易以今字晚又號知非子其  
詩文曰紫溪集鄉先生方公回為序而箴之于家家有仁本室鄉相程

公元鳳大書揭之而陵陽牟公憲記之彥明之祖程公塲也所謂仁本  
者彥明固服而行之矣銘曰  
守經為本制變為通通故能介承之自躬彥明本仁由學以克及試於  
事事為之中考其成績尊有始終天不畀年歸于堂封有德有言遺後  
者豐尚百十年安此幽宮

貞白先生鄭公千齡行狀

程默南

公諱千齡字耆卿姓鄭氏徽之歙縣人故歙令鄭君安之子也其先有  
諱球者始居歙之雙橋里以貨雄鄉里號雙橋鄭家自曾大父孝全大  
父文政尚德樂義好施予至鄭君行之益篤嘗徒步千里歸內兄黃嬰  
盡推其家財與二兄寸田尺宅無入己者淮帥秦琳聞其賢辟符離尉  
不起至元中唐鄧均三州招討使李木魯敬帥師臨徽討叛將李世達  
敗走進兵是嶺關城且屠鄭君奮起杖策詣君門揖白招討亂由世達  
非百姓罪招討固奇鄭君聽之不屠城因署鄭君令歙三年有功德於



民民祠之號鄭令君公幼卓越七歲聞人講呂東萊春秋退即能衍其說從令君行沙上仰視飛鳶即問曰是何所憑依邪稍長師上鄉先生魯齋鮑公一以躬行為學及壯從令君入京師出入諸公貴人一時翕然稱許禮部尚書謝公敬德吏部尚書劉公伯宣侍郎夾谷公之奇交薦之於朝署公秩八品宋降臣留夢炎新用事吏部以白身南人例黜公待調行省丁外艱大德元年始板授寧國路太平縣弦歌鄉巡檢時徐道者以妖術惑眾弦歌之民皆徙市登山妄言禍福公擒其魁得誣罔狀眾盡駭散設布方畧察姦防盜民安其業始買地為官舍旁為屋榜曰弦歌書院日無事討論典籍後進視以為師六年遷鎮江路丹陽縣庭陵鎮巡檢首謁吳季子廟召父老謂曰昔季子薄千里之吳而不王百世之下遺風猶在其民矧肯為盜乎公等幸為我戶致此意勿陷刑辟即月旦十五日率吏卒謁拜祠下遠近化服水決練湖郡檄公督治公負畚鍤以身先士卒連晝夜風雨不倦水以不害丁內艱至大二

年調處州縉雲縣美化鄉巡檢劇賊金卒二嘯聚無賴往來溫台處婺間白晝鈔掠吏莫敢誰何公募遣聚石道旁山上匿壯士草莽中伺賊過飛石擊之賊驚走草中壯士大譟從之賊窮感圍之盡俘其黨皇慶二年調建康路江寧縣江寧鎮巡檢流民數千過丹陽市持弓矢刀槊殘害居民民不堪起而敵之眾數萬人擊散圍之使不得去公聞疾馳至解其圍單騎入流民隊中呼其長數之曰汝等皆天民不幸流移本欲逃生乃更速死殘害吾民何也叱其為亂者數人縛之拘其械器驅其徒眾送之渡江適野見婦人哭而哀公使問故婦人抱嬰兒前拜曰妾孀也家貧唯一子尔有田若干與執家連執家偽契奪有之毋子無以為食是以哀也公曰盍言官乎曰執家不可言也有死而已他日公召執家語之且開以禍福執家感悟謝過遂歸孀婦之田有負篋暮投主人宿者主人方垂設榻堂下戒之曰東壁敗缺宜謹視篋中藏東鄰之老見焉是夕亡其篋意東鄰之老吏執而訊之其子自外來面毀衣



裂若穿穴隙之爲者吏喜得盜獄成公曰其跡是其情非也緩之無何他郡獲盜乃嘗盜篋者也衆乃歎服去之日百姓遮道不得行公舉手謝之咸拜泣而去延祐六年始命于朝爲建德路淳安縣尉淳安介萬山中多長林深谷盜賊之所出沒守禦者並緣爲姦利公至盜賊稍稍引去而千戶汪元瑤貪酷病民公曰盜在是矣即條上其罪府若省元瑤坐罷境內晏然尉署傾圮公撤而新之取孔子荅季康子語扁其柱事之堂曰不欲署之東舊有梅隱軒西有桂笏軒皆廢公皆起之立朱子之祠表錢公之墓修淳安志書舉邑士吳君暉洪君震老夏君溥充試有司後皆知名泰定元年調徽州路祁門縣尉祁門亦鄉邑難治公集長老好諭之曰爲我約束鄉閭勤固門戶謹守望慎毋犯法人亦素服公威望人人自重縣曹失文書一櫃無所蹤跡檄公詰盜公曰是非盜也必愚民有獄不解計出無聊故爲是以滅跡尔即問吏有獄事在官最重者誰乎吏曰某鄉某公即馳至其家搜無有也唯一棺焉發之

文書果具在縣民馮華甫以孫壻爲後俗謂之補代馮歿二十年矣其族人訟之十年矣官不能決公攝縣事舉春秋莒鄆之義立馮氏子有僧言其徒育於已十八年其叔欲奪而歸之以爲後者公曰民無後後其兄弟之子禮也法閒民爲僧故有覆實之文謂非爲人後者今叔無子後其兄之子所以廣占籍明人倫僧柰何欲絕之命叔償其衣食之資歸其姪以爲後或訴康氏兄死不爲立後而有其資者公召問狀且云有毋公曰天下之愛其子者莫毋若也子死無後忍之乎召毋問故毋謂子死時七歲公曰殤子不當立後其訟遂息大修縣學建明倫堂門廡齋舍皆高壯宏麗尉署爲風雨所壞公發已帑新之其屬爭先趨事公曰必完必固無憂後人祁門與石埭青陽浮梁太平諸縣接壤奸民數以僞鈔事誣連吾邑公燭其奸折以文移至十返卒不逮一民一日日起從數卒東馳不十里奄入山中民家衆莫測所爲至則縛其人搜其家得僞鈔及器具以還旬有五日復入山羈其孽秋豪無擾所過



民相率拜道上及代歸老稚扶携送郭門外者十餘里不絕至順元年  
陞從仕郎泉州錄事是時廷臣有言泉南並海多諸番寶貨宜擇廉能  
吏爲守令者故起公馳驛就職公歎曰吾老矣毋以負介取辱即手署  
致仕章上之明年夏四月感疾臥杭州傳舍三日子玉侍側從容語曰  
吾思平生心身無可愧者可以見先人九原矣瞑然而逝身無遺衣物  
布被破靴而已其友宜興王仁源爲貸於所親得錢具棺衾以斂玉持  
喪歸舟過淳安淳安人皆哭迎送曰我公不復得見矣五月壬午奉柩  
歸于家之正寢且卜葬嚴陵吳縣尹敬涿郡張副使士弘太原王教授  
皆與其徒合辭言曰明公德行明潔正直不回請私諡曰貞白先生明  
年里中父老白于有司請改善福里爲貞白建里門立石刻辭以表著  
公德又明年朝廷以公前致仕章贈承事郎徽州洛休寧縣尹妻汪氏  
贈宜人命始下公矍然長身顏自清古性恬澹無所嗜好衣布衣如錦  
繡啗糲食如梁肉鄉鄰有貧病患難救之如不及與人語休休孝義忠

愛不飲酒對賓客有餘歡入郡縣不騎馬蒼顏白髮行市井間唯一童  
自隨初欲與兄弟義居嫁聚喪祭各有儀式及志不得施則悵然取田  
之磽瘠器之弊陋者退處於偏而讓其正居於昆弟居鄉如處女當官  
臨事則剛毅奮發而有爲不阿長官不承風旨僚吏莫不敬憚之部使  
者行縣皆曰鄭尉長者必加禮貌公前後爲捕盜官四十年未嘗任親  
民一攝祁門令旬日間人稱其神明之政所至禮儒先興學校舉廢墜  
功績反出縣令丞上旣去有去思惠愛之碑職專勢微德不及大施材  
不獲盡展也公生於宋景定六年十月甲午歿於皇至順二年四月癸  
亥享年六十有七娶同里汪氏即宜人先公十四年卒子男二人長曰  
玉次曰璉女一人曰柔貞嫁同郡吳虎孫玉柔貞宜人出也孫男一人  
女一人以元統二年甲戌歲十一月壬寅葬於里東方村之原宜人汪  
氏同墓文郡諸生也始拜公于京師之旅邸即辱知愛數與公之子玉  
游及爲黃竹寨吏當祁門道上聞祁門人言益信公平生德政又得公



之客胡默先生所記遺事頗詳謹序次如右玉將來諸立言君子乞銘以圖不朽焉

長樂縣程令君頌學行狀

趙東山

令君諱頌學字希聖別字節卿徽之休寧人其先自晉新安太守元譚以治郡有績錫褒詔賜田宅于郡因留家焉十三傳而至忠壯公父子以義節顯於梁陳廟食其鄉子孫蕃布天下而休寧之族尤繁衍多聞人君上距忠壯二十有六世十二世祖南唐檢校中丞灑始占居邑南以川會祖大明祖自得父逢午字信叔再領鄉薦一爲魁不第即棄去舉子業弗爲家居教授所學日益精詣族父勿齋先生雅敬之每過公所談論輒竟日數郡交薦版授紫陽書院山長著中庸義說數萬言益暢朱子之旨以爲教學者多所發焉秩滿授嘉興路海鹽州文學命下而卒追贈承事郎徽州路同知婺源州事母吳氏追封宜人子二人令君其嫡長也少卓犖有奇志憤交游重然諾以行義自砥礪甫冠游京

師鉅公名士莫不傾倒嘗黎明與其友出郭外道過大第友人謁諉令君少俟比出已暮令君猶儼立不去蜀人趙公忭職秘府聞而嘉之即造令君與語大悅即日挈行李過其館授漿焉居無何有旨修職方氏書趙公亟薦令君入書局書成同輩俱被優用令君獨後久之乃擢從事數十人惟令君爲南士毅然特立儔列不敢慢嘗奉旨將段帛勞諸侯王之戍和林者後以王事屢往來嶺北不以艱遠辭也秩滿調鎮江路司獄旦暮出入行狴察其寒飢瘦疾者而時其衣食嘗歎曰彼固罪人然或以非罪死則豈天討之謂哉比滿幾無以爲歸適有詔下府公乃以令君宣詔諸邑時使者所至郡邑皆歛諸民以爲之贖府公夙敬令君欲以是爲歸計也比至屬縣卒事吏以常例致贖令君呵曰我以賫詔來而取民財以去乎督其還諸民而後行比至他邑亦如之遷湖州武康縣主簿明法令申約束革其弊政豪右武斷者媚之相率重賂大府俾令君以他役入京比還則以憂去職矣服除轉循州長樂縣尹



循介閩廣之交遠宦者蠻夷其民弛法廢度肆其貪虐依託官府剝下  
歸上者縣率數百人而長樂以僻遠尤甚居民迫漁奪困征斂率逃竄  
他郡其尤桀黠者負險隘操鋤耗以自衛間有出身奉上不避徭者賊  
猾利其資產中以他禍足涉城市而家破矣君始至則盡得其姦黨巢  
穴發以他事悉斷遣還其鄉里整飭案牒申明德意植貧弱寬徭賦分  
遣耆老入其鄉申諭朝廷治意民信其所為流亡之衆來歸者不可勝  
紀縣治所寓生聚日蕃漸可比內郡都邑乃建先聖廟于治之西南勝  
地擇其士之有學者爲之師山谷之民大冠長裾來游來息彬彬然見  
先代之遺風焉時上司人往來屬邑輒託散土宜以釣重賄邑則培諸  
民以贈之君獨却不納而自割俸簿贈之人知君風裁不敢受而遂不  
復來矣如在他邑則間道不敢令君知之邑有賴某妄訴黃某劫掠財  
物事連數十人黃被訟不知所爲舉族逃匿已五載矣州移檄下索罪  
人甚急黃聞令君至即詣公庭自歸君呵曰汝盜也而逃邪黃泣訴曰

某與賴爭擲場耳非盜也不逃即舉家齏粉矣今聞邑有賢尹願得自  
明君曰汝竄者甚衆今一人來安能明乃與刻日令盡領同竄者至黃  
諾而上司以君擅縱強盜問罪黃所領先期至郭外聞之皆散走黃獨  
嘆曰我寧死不忍累程縣尹也乃受逮州嘗以他名色斂民財憤君不  
受命欲因此中傷之令黃誣君前嘗受賕黃曰某陷非罪不能自明寧  
忍賊陷忠良邪考掠備極酷毒至死終無一語涉君州猶訊連坐十餘  
人會部使者詹侯行郡直其枉君乃免民有死非命者其妻訴不願理  
君呵曰此即殺人賊也一訊即服事連富人請以萬金贖君君不納富  
人懼重賄大吏移鞫他縣輿得行已志且以成君罪君仰天歎曰使殺  
人者皆可以財免罪則有財者皆可殺人矣天地鬼神其可欺乎他縣  
果問如富人意吏抱成案將署忽大雷雨書晦棟折瓦墜官吏震駭失  
文書所在竟實不敢復問羅江五峽諸獠時出掠邊境大府發兵捕治  
畏盜不敢逼遣介誘諭令納缺折弓刀即以獲寇反命豪酋視官府如



無為暴益甚民其苦之會有郡撩入鄰境劫財物殺人盈道郡邑吏不敢問反致羊酒囑使他去盜果入長樂境君自領卒要之於道縛其渠魁七人餘悉散走邑簿尉懼變盡室宿舟中視緩急為去留君不為動曰寇來吾自當之集吏民授以方略使各分守隘要益遣卒捕逐其餘撩大懼終君任不敢涉足長樂境邑素多火災民言城隍神衣朱所致請易之君曰火災由民不謹尔乃下令浚溝池修火具廬舍苦蓋者易以瓦在職五載火不復作民以為神相之矣長樂去家數千里僅以一僮自隨五六年間介然如一日也秩滿歸舟行至廬陵之十八灘以疾卒時子植在侍遂歛以時服元統乙亥年六月十七日也君生於至元丙子五月四日壽六十歲植奉君柩歸葬于里之深坑源後十年甲申君之執別駕王公伯顏察兒來官于徽訪得君之子講通家之好比滿謁選于京求得君歷仕政績于吏部明命以承直郎直定路中山府判官致仕寔至正八年六月也今石氣凜剛明資貌挺特而操行清苦且

承故家令德凡游交皆國初老成鉅公其所薰陶以成就者為有自來故歷官中外忠而不諛勤而不擾廉以自持誠以接物又明練法律以輔之是以遇事有立不以禍害變其所守而宰物者亦赫然臨而鑒之非其操心行事不愧不作者能如是乎君沒後客有游江西虞公伯生之門者公聞令君已沒歎曰斯人有用世之才若在今日急緩可仗惜其年未甚遠位不足以展布其才耳其為當世名流所知類如此夫人滕氏贈宜人令君無子弟幼學早卒于男女四人君拊之如已子植其季也遂為君後孫男二性上經孫女三人訪雖不獲識令君而締交於植且聞君家世及君持身海官之實為詳切謂於古循吏無愧也故為述其梗槩俾上之太史氏以圖不朽焉

新繁胡大尹壽安傳

趙輔之

胡侯名壽安字克仁世家新安相傳安定先生之後也洪武庚辰秋領鄉薦書入成均歷事天曹筮仕河南信陽令大著能聲尋調真定之獲



鹿政聲益著未再暮丁內艱未樂甲午冬服闋復宰新繁視篆初首詢  
民瘼事有不便於民者罷之有益於民者舉行之每歲初自巡視鄉村  
勸民播耕遇田畝荒蕪或垣屋摧壞者詢其窘乏之由必捐俸資給常  
以古靈先生教民之言諭鄉耆里甲俾知親睦安分之道率皆從化侯  
性清儉在官惟糲衣糲食如韋布士嘗眠一紙帳自題句云紫絲步障  
簇春華臥雪眠雲自一家雪又不寒雲又暖扶持清夢到梅花其雅淡  
之情槩可見矣永樂乙未夏數月不雨田疇龜裂侯齋沐禱於神二日  
果大雨後圃種蘆菴數畦使客往來者採之以供盤飴或爲餽遺之禮  
人呼爲菜知縣其子從新安來省兩月烹二鷄侯怒讓曰飲食之人則  
人賤之矣吾居官二十餘年常以奢侈爲戒猶恐弗能全始終之志爾  
今好大嚼詎不爲吾累乎其一服訓亦其淡泊侯三宰大邑未嘗携妻  
子之任或曰子之名固美矣其妻于何侯笑曰此庸者之見也吾豈無  
糟糠之義而不念乎嘗於之忘之爛熟耳且夫吾輩昔讀聖賢書論居

言治民之法孰不欲砥礪名節以操守爲志及登仕路則以耳目玩好  
聲色之物敗身家者比比焉矧婦人小子輩其性猶水有以金珠錦繡  
搖目之物盡其心彼必欺吾而竊取之借使僥倖不露吾去任後人必  
詈笑曰胡某外佯廉而內實貪以是計之故不欲妻子之累身也是時  
彭邑故令魯姓者寡妻王氏本戎家女年少而容艷資產千計常慕侯  
之才德欲嫁之懇所親導意以諷侯侯曰吾將五旬未嘗爲失節事今  
若娶此失節之婦受此不義之財則吾亦爲失節之人行止掃地矣言  
者大愧戊戌春侯將考績囊橐罄然惟畜一馬欲售爲程途費馬忽病  
命醫醫陳其治之數日弗愈其家人來報曰汝妻死矣待汝歸方殯陳  
聞哀慟良久曰妻已死我至家安得生我宰公平日粗衣糲食撫民如  
子未嘗取我民半錢更不敢欺我里甲無敢擾我俾我民安於耕鑿皆  
宰公之恩也今赴京而馬病若此我若離去馬必危矣宰公以何爲路  
費乎我寧負三妻不可負宰公乃遺書諭其子曰喪具稱家有無日吉



則窳劣毋候我歸也侯祖帳日繁邑之民遮泣於道者千數雖婦人小子如悲親戚民以贖者皆念之詩僧解定素為侯所敬以布帛數端黃蘆葦十枚鮫餽再四侯雅重定惟取蘆葦一枚餘皆還之者民臣榮宗等強留雙靴以昭重愛至今存焉

故沂水知縣鄭君肇墓誌銘

趙子益

君諱肇字太初歛之豐邑人其先居律村至諱再能者有子八人胤嗣最盛曰惟簡其後有之純與朱子同榜進士官德興尉曰惟政其後有義宗自律村徙豐口義宗七世至諱元昇者君曾祖也祖宗勝父時兩世業儒地氏繼妣謝氏公生而溫厚有志操幼被選為郡庠生治詩經書史研經學漏三載成達旦不寐業大進然蒙與弗偶未幾丙戌以員登太學自治經外雜書札之事尤精會有一詔修宋樂大典君復被選為學官自於裁而不多愛之書成受賞勞宜勳久之授濬之處州遂昌知縣時古廉李先生方在翰林以文送之而勉其遠大君律

已廉慎泣事寬簡政不宜於民者即更張之而尤以敦厚風化為務遭歲旱齋沐禱諸神祠雨應期至歲復大穰民以為誠意所感修葺學校課試諸生而躬較其優劣士風益振君以二親在堂遠不克就養以瞻雲名軒邑士夫多為之詠歎會前尹坐事者復職君例還京師臨發之日民遮道涕洟不忍釋隸事冬官受命賞勞漕運官軍于兩淮事竣無擾尋易山東莒州之沂水持身愈謹施政愈密民樂從化一如遂昌時方營建北京役事嚴迫君督起所部夫匠焦心撫綏上不稽事而民亦無怨且念僚采董工日久勞逸宜均身往代之居無何遘疾不起水樂戊戌四月十六日也長嗣璿奉喪南還君生洪武甲寅九月四日享年四十有五娶徐氏明慧溫恭號稱賢配子四人長即璿次璿次璿次璿次遂昌尚幼女三人長適汪士仁次適閔士成次適程志方孫三人曰鵬曰莊曰和以宣德四年十二月二十五日與徐合葬于豐溪之原璿等以狀詣予泣拜請銘璿從子游敏而文璿璿謹飭亦皆嗜學予知鄭君



之有後也遂為之銘曰

卓哉鄭君幼負氣節奮身郡庠精妍儒業尋登太學纂修文淵出宰家  
昌德化是先視民若子民視猶父遭時孔艱靡一失所謂尹沂水治政  
如初趨命赴工奄然而殂歸葬豐溪山奇水秀君子勒銘有燁其後

故進士知上虞縣事鄭公行簡行狀

鄭騰海

公諱汝敬字行簡姓鄭氏以字行居歛西貞白里其先當宋天禧中有  
諱球者始來居之至公凡十六世以儒業相授受高大父諱珪師山先  
生從兄弟也會大父諱紹從學定宇陳氏有民功民祀享之妣金氏以  
節聞大父諱子初從學師山自號易求居士妣汪氏父諱希用以學術  
受知郡太守三山黃公母鮑氏會昌同知仁之女公生而秀異夙知向  
學里舉充縣庠弟子負攻書綴文日出人表尤善為詞說明白委曲以  
達聖賢立言之旨郵使者至有司輒引之進講無不愜服嘉獎然屢赴  
秋闈弗利入太學年甫二十有九時胡公儼為大司成一見奇之教之

問學大進公退請人曰吾得胡先生講明所學僅三月爾雖讀書三年  
弗及也未幾運舉未樂乙未進士第觀政秋曹適吏部掄選天下候銓  
官先後倒施物論不平公曰進賢不能以公其如天下士何遂以疏聞  
詔從其議吏部滋不悅然朝廷由是知公名命往督陝右糧儲公性  
嚴毅所過有司督責無少貸多忌之者遂中以罪坐役北京公平居與  
兄迪簡弟懋簡極友愛至是皆傾會赴難先後死遂依聞者悲之縉紳  
多為詩歌以道其事者役滿除知順天府永清縣事永清為畿內大邑  
號最勝公治之有方不煩勞而事以次理嘗有中貴人臨縣索賂甚急  
公不為動遂給入見縉紳之欲置之死士民遮留解還公即以狀聞

太宗皇帝怒欲置中貴人罪會

朝廷適有大役工部復命公監

仁廟嗣位赦免無何公得代去  
有大臣得罪而服役者前官置之公曰此非所以存天怒也請役之  
乃已既又謂工不宜久與勞民亦便上言負其役調紹興府上虞縣先



是為令者適以負冗去民素知公名皆踴躍歡送載道公亦樂民之向  
方也為之抑豪右劾農桑賑饑窮治興梁棧道而大興其學官官無愆  
期之需獄無留嘆之訟居二年邑大治監察御史尹崇高號嚴厲有司  
多望風引退獨加賞公嘗問紹興守六邑令孰優守曰惟鄭令清介肯  
為但其人氣大爾公曰人惟有氣斯能生聖賢能養是氣故充塞宇宙  
可無氣而為人乎守不能答既而考浙江七十二縣令置公為第一凡  
別邑有疑訟不決者多付公理之公亦悉心民隱不遺餘力然同僚猜  
忌日甚先是邑有者儒曰柳南仲賢而有文公雅敬之聞其貧贈以綿  
絮南仲捐介亦不欲直受令君惠以錢百文素詩為謝公辭錢受詩而  
同僚卒以是誣之議者不覈將左遷公公曰是尚可以仕乎且毋夫人  
年高無以為養遂自解職歸上虞人請留不得相與擁泣而去其居家  
也首躬祠堂朔望奠祭一用朱子禮日坐太夫人堂上菽水盡歡訓諸  
孫讀書以無墜先人之業暇日幅巾長裾逍遙泉石間或引觴賦詠世

事一切不以介意閣老陳公循尚書徐公琦孫公原貞通政畢公昌知  
府張公巖累復起之力辭不出天順己卯某月某日以疾卒享年七十  
有五配畢氏子男二長曰綬次曰綰綰先卒女二孫男五鸞鳳鶴鵲  
始公捐館綬以貧不能襄事喪留于家凡六年成化丙戌十二月某日  
始克葬于巖鎮之塔菴官道傍嗚呼吾歎古稱多士然未有第進士者  
至公始以麟經取第人莫不以遠大期之公亦自奮迅思有以自効君  
子謂公使當風紀之任必能繩愆糾繆以輔  
上德揚清激濁以振士風可以踵桓鮑趙唐之風而不忝然卒坐窮以  
死是雖公之不幸亦士之不幸也謹狀其實如右載筆君子覽焉因其  
言而知其行即其行而思其心庶表墓有碑誌墓有銘託以不朽云

奉直大夫泰安知州施公守正墓誌銘

成太史

公諱泰亨字守正其先東魯人九世祖諱禮有膽畧從宋高宗南渡為  
參軍始居新安之休陽洪武初有白伯起者由白沙巡檢善武事授民



是為令者適以負冗去民素知公名皆踴躍歡迎載道公亦樂民之向  
方也為之抑豪右劾農桑賑饑窮治興梁棧道而大興其學官官無愆  
期之需獄無留嘆之訟居二年邑大治監察御史尹崇高號嚴厲有司  
多望風引退獨加賞公嘗問紹興守六邑令孰優守曰惟鄭令清介肯  
為但其人氣大爾公曰人惟有氣斯能生聖賢能養是氣故充塞宇宙  
可無氣而為人乎守不能答既而考浙江七十二縣令置公為第一凡  
別邑有疑訟不決者多付公理之公亦悉心民隱不遺餘力然同僚猜  
忌日甚先是邑有者儒曰柳南仲賢而有文公雅敬之聞其貧贈以綿  
絮南仲猶介亦不欲直受令君惠以錢百文索詩為謝公辭錢受詩而  
同僚卒以是誣之議者不數將左遷公公曰是尚可以仕乎且毋夫人  
年高無以為養遂自解職歸上虞人請留不得相與擁泣而去其居家  
也首躬祠堂朔望奠祭一用朱子禮日坐太夫人堂上菽水盡歡訓諸  
孫讀書以無隳死人之業暇日幅巾長裾道通泉石間或引觴賦詠世

事一切不以介意閣老陳公循尚書徐公琦孫公原貞通政畢公昌知  
府張公巖累復起之力辭不出天順己卯某月某日以疾卒享年七十  
有五配畢氏子男二長曰綬次曰綰綰先卒女二孫男五鸞鳳鶴鵲  
始公捐館綬以貧不能襄事喪留于家凡六年成化丙戌十二月某日  
始克葬于巖鎮之塔菴官道傍嗚呼吾歎古稱多士然未有第進士者  
至公始以麟經取第人莫不以遠大期之公亦自奮迅思有以自効君  
子謂公使當風紀之任必能繩愆糾繆以輔

上德揚清激濁以振士風可以踵桓鮑趙唐之風而不忝然卒坐窮以  
死是雖公之不幸亦士之不幸也謹狀其實如右載筆君子覽焉因其  
言而知其行即其行而思其心庶表墓有碑誌墓有銘託以不朽云

奉直大夫泰安知州施公守正墓誌銘

戚太史

公諱泰亨字守正其先東魯人九世祖諱禮有膽畧從宋高宗南渡為  
參軍始居新安之休陽洪武初有曰伯起者由白沙巡檢善武事授民



兵萬戶兼管德興銅冶沂州判官權高唐州事撫安人戶八百二十墾  
田地三千七十九頃子姪皆尚禮義邑人咸曰萬戶家此公之伯祖也  
祖伯凱父孟敬隱德弗耀妣金氏有淑德生子三人公居仲爲兒時重  
遲不戲恒若有所思計畫及壯材貌魁岸有大志永樂甲辰有司以茂  
才舉授鬱林州判官未幾轉泰安州判官爲政一以愛民爲心而絕私  
賄理詞訟以情不爲文刻在任九年俗大成帛餘於庫粟餘於倉人樂  
田廬謳歌載道旣去任州民千餘抵京請留侍郎王公上其實陞泰安  
州知州正統九年以母孺人在堂陳情

上嘉其孝思特許省祭居家未及三月孺人歿哭泣盡哀正統十年四  
月賜勅命褒其政成贈父同其官封母太孺人妻孺人正統十二年  
服闋將有陞擢泰安之民間之資糧奔走不約而會于  
京師者五百餘人稽首闕下

天子憫其情允之復除泰安州政益勤澤益廣民愛之若父母景泰二

年考滿以疾致仕日以泉石爲娛足跡不入公門天順元年六月十二  
日卒生洪武甲戌九月初八日春秋六十四以天順二年十月十三日  
葬于車由原先塋之次公內外行完潔白奮勵居官民不怨其去居家  
人稱其孝悌是無愧爲君子者矣元配葉氏繼孔氏先聖五十八代孫  
繼趙氏子男三人末奇末貴末秀女三人婿蘇珙汪儼金驥孫男某旣  
葬之五年卒已其孤末奇泣告于其縣尹餘姚邵公走書幣并狀來乞  
銘邵予姻也弗能辭爲序而銘之銘曰

良才舉世經涂闢三益奉符諱嘉績 龍章煥爛自

天錫民不怨違街厥澤甲子又四及玄宅作詩孔昭賢貞石

通奉大夫河南左布政使程公泰墓碑銘 家乘

成化庚子秋予居先少保襄毅公之喪聞人傳吾河南左布政使用元  
以七月一日終于官爲之驚怛曰噫噐宇間學行檢才識在一時負公  
輔之望如用元何可多得而遽至此豈造物者之乖乎是歲冬予以



賜葬 恩入謝遇其觀邵伯河下旅次不能為禮言其孤而別暨予南還則用元葬矣孤旦奉邑人前監察御史康君永韶狀請銘其墓上之石嗚呼其尚忍銘吾用元也哉惟程氏自東晉新安太守元譚以善政為民請留始家歙墓墩至梁將軍忠壯公靈洗起兵拒侯景廟食于郡忠壯十四世生唐檢校御史中丞湊又起兵拒黃巢凡再世有全郡之功其居祁門善和里者祖中丞長子檢校戶部尚書仲繁用元所自出也居休寧陪郭者祖中丞季子歙州兵馬先鋒使南節予所自出也故予之族於用元為近尚書十八世孫德堅 國初以行樞密院都事守景德鎮是為用元高祖曾祖汝楫祖景華俱不仕父顯起鄉貢進士官至 韓府左長史進朝列大夫毋齊氏封宜人用元天分最高喜問學初長史公以春秋名祁門用元受經所得最深又旁通諸經史正統中長史公教諭河間任立而予家先以尺籍隸河間襄毅公每往來叙宗姪雅愛用元以為是必允其宗者歲丁卯領南畿鄉薦登嘉泰甲戌進

士第觀政戶部乙亥奉 命犒師宣府總帥厚饒悉卻之都憲葉文莊公方督邊餉與語大悅天順改元授戶部江西司主事己卯犒師陝西時尚書年公待部屬嚴甚獨禮用元三載以績最聞 賜救命督餉淮安一年代還上書乞歸省分祿養親從之癸未會試用薦充同考試官儀曹奉內幣踵門用元力辭免禮部尚書姚文敏公歎曰超出流輩遠矣未幾進署福建司負外郎督負徵于天津諸處甲申實授成化改元進署郎中丁亥實授三載復以績最聞 賜誥命是歲用兵遼東遣用元給軍實師賴以濟庚寅遣視山東災上書言四事曰存漕運以防民飢整兵備以衛民生減養馬以安民心增接廩以紓民力事多舉行比還擢廣西右叅政安南以地界不定數近邊用元冒險往定之乃已理焚修墜政漸以成壬辰以齊宜人憂歸而長史公卒喪葬以一禮拓先祠以謹時祀輯先德為世芳集以傳眼閱改河南右叅政奉 重書專理國儲定轉輸遠近適均法以便民又以其暇時葺二程夫子



闕里祠宇以風其士人戊戌進右布政使明年進左布政使律已守法以倡察屬一方晏然欲自引章具未上而疾作矣所部黷然聞者愕眙以爲善人之不幸距生永樂辛丑正月一日享年六十以壬寅春二月二十日葬里之宅裏塢用元爲人恂恂謹恪口未嘗及人之過巧佞者或竊笑之然其中涇渭極明有確然不易者平居恬澹寡嗜好疑若不柰繁劇而所居官理不亟不徐喜功邀譽者反出其下蓋人陰被其惠澤甚多而世亦未盡知之爲學不事詞藻雖時賦詩寫竹以適其適而緘其藁諱其名終不以自見也用元初娶祁西汪處士景淳女贈宜人再娶 趙府長史同邑胡公永興女封宜人三娶故吏部侍郎淳安項公文曜女俱善持家以佐夫子子男四人長昂醫學訓科汪出次旦攻舉子業次泉儒學生皆胡出次昌項出孫男三人長鏞次銓次鏗女四人俱幼銘曰

惟我程氏世顯新安有譜振振有廟桓桓自歛之祁垂休委社大集于公策名進士造屬司徒幾二十年巡撫四方犒師三邊擢領藩宣或副或正桂管遺思洛省晉慶祖我循吏以惠其民宗我師儒以迪其人名與業崇宜位公輔庶需厥施以澤下土堪乘而培中棟而戕士類孔傷予懷曷望宅塢之原山水明秀竚有遺芳式在其後



新安文獻志卷八十七

乙集

行實 遺逸

梁胡太常 明星傳

續圖經

胡太常明星字太白新安縣人梁天監初為國子生時有詔定正雅樂  
 選生徒數十人肄其聲容明星與焉樂成授湘東王府法曹參軍入為  
 太學博士值修五禮僕射沈約請五禮各置學士一人令舉學古者一  
 人自助乃以平原明山賓河內司馬聚建平嚴植之山陰賀瑒等分掌  
 瑒舉明星以自助累遷尚書祠部郎八年春高祖祀南郊詔諸儒議禮  
 始服大裘寵封禪明星悉與其事九年視學命皇太子及諸王皆入學  
 以明星兼太子家令五禮成遷太常丞十三年耕籍田祀先農明星奉  
 引深有禮容高祖嘉之拜通直散騎侍郎除秘書監遷太常卿高祖晚  
 年崇尚釋氏詔宗廟用牲牢有累冥福宜皆以麩為之朝野諠譁以為  
 宗廟去牲乃是不復血食明星與侍郎周捨等上疏極諫不聽未幾捨

新安文獻志卷八十七

行實

乙集



新安文獻志卷八十七

行實遺逸

梁胡太常明星傳

續圖經

乙集

胡太常明星字太白新安縣人梁天監初為國子生時有詔定正雅樂  
 選生徒數十人肄其聲容明星與焉樂成授湘東王府法曹參軍入為  
 太學博士值修五禮僕射沈約請五禮各置學士一人令舉學古者一  
 人自助乃以平原明山賓河內司馬聚建平嚴植之山陰賀瑒等分掌  
 瑒舉明星以自助累遷尚書祠部郎八年春高祖祀南郊詔諸儒議禮  
 始服大裘寵封禪明星悉與其事九年視學命皇太子及諸王皆入學  
 以明星兼太子家令五禮成遷太常丞十三年耕籍田祀先農明星奉  
 引深有禮容高祖嘉之拜通直散騎侍郎除秘書監遷太常卿高祖晚  
 年崇尚釋氏詔宗廟用牲牢有累寘福宜皆以麩為之朝野諠譁以為  
 宗廟去牲乃是不復血食明星與侍郎周捨等上疏極諫不聽未幾捨

新安文獻志卷八十七  
 行實遺逸  
 梁胡太常明星傳  
 續圖經  
 乙集



坐事免朱异代掌機政朝儀祀典多所改易明星譁之不得遂棄官歸  
縣隱居橫岡時普通六年也後累以遺逸徵不起明星里居過黃姑壑  
見郭外多荒田未闢詢之云不通溝洫也明星惻然親究水源傾貲募  
工穿二渠約十里許導城北溪水逶迤而南溉民田千餘頃歲屢有秋  
其卒也鄉人感其惠立廟橫岡歲時祀之歷代不廢元初齊孫京重建廟事載洪炎祖新

南唐汪處士台符傳

羅鄂州

汪處士台符歙州人博學能為文好王霸大畧唐末見天下方亂力耕  
不出南唐先主輔政移鎮金陵台符往書陳民間九患大率以富國  
阜民為務先主善之且加條問而宋齊丘疾其才高屢加詆訾齊丘始  
字超回台符貽書譙之曰聞足下齊先聖以立名超亞聖而為字齊丘  
大慚改字子高後使親信誘台符乘舟痛飲夜縛其口沈石城蚘蛟磯  
下先主聞而惜之昇元中檢校民田物產高下三等科其均輸為定制

又使民輸粟請鹽罷其科借商旅實富則征之過者則否舟行無力勝  
之稅郡縣吏胥降而有限凡數十年民得以小康皆自台符發之所為

宋汪長者廷美傳

羅鄂州

汪廷美婺源人孝友純至義居數十年聚族四百口旦暮食必同席有  
未至者不敢先廷美節嗜欲身衣縑布非因祭不食肉親喪盡哀不應  
賓客遇忌則終月齋肅祥符中東封赦減天下賦十之二廷美亦減其  
佃者租十之二乾興頒遺詔哀經號慕營佛齋者七日幼為鄉官人嘗  
賀以一縷後悔倍償之嘗以秋冬賑糶或勸須春廷美曰家欲蓄藏待  
價貧人之食於爾安乎遠賈有鬻香者去後發其裹得金追而還之嘗  
使兄弟子鬻繅帛進賢界中買銀數百兩以歸廷美察其贗不復言他  
日袖而奔之淵里人或竊其鵝問之曰夏至將以祭先廷美曰彼貧乃  
有孝心助以魚酒又有從質麥種十石者過期遇之給言種敗無所救



廷美還其質更遺麥三石以償其費性不嗜殺牛罷老不堪用者終飼養之子姪諸孫有過未嘗形言但訓以自昔興替之家嘗有抵辜匿者吏以爲當坐家長廷美時年六十九或言稱七十宜免廷美曰吾失訓又增年以免罪是誣官也不可會有赦遂免郡守欲奏表門閭力辭時號汪長者將終徧爲書別親舊翌日而卒年八十九慶曆中知縣秘書丞蔡巽據其事刻之石

取上丈人汪君 紹傳子存

汪路教

取上丈人汪君紹字子傳唐侍御史瀆之六世孫嚴重好義崇德樂施父歿七第二妹冠笄婚嫁皆如禮宗族貧病喪葬隨宜周急人稱曰取上丈人嘗於其居之南闢義學教授鄉里子弟曰四女堂捐田三百畝以贍師生學者無裹糧束脩之費四方聞風踵至婺源縣簿呂廣問值靖康之變不能還留以爲師廣問嘗遊尹公彥明之門與聞二程之學君之子存方以西京文學辭官歸養遂得與呂公游益稜其說初驛道

由里中以達休寧之黃茅曲折沿澗谷水暴發則橋道皆壞鄉人病之君言於郡府願以已資闢芙蓉對鏡驛道直抵黃茅較舊路近十有五里且無水患娶朱氏韋齊先生之從妹家庭間親屬六十餘口義居雍睦君二子長卽存字公澤次仔字公育存元豐七年領鄉薦時年十五明年獻書禮部不報元祐三年戊辰與仔同入太學知名試每魁諸生而廷試累屈不肯媚附權貴人勸令少損答曰存不敢獲罪聖人之門他非所知也旣而授西京文學上封事極言時政得失不報辭官歸養招延四方士予以講學焉學者稱曰四友先生政和八年復遊京師值躬耕藉田獻頌上悅賜束帛又上書訟知州王愈之屈復其任初愈以修撰知信州禦方臘有功宰相王黼害之坐軍被折貨歸田里存辨之愈得復知無爲軍省府咸重其名交章薦聞六館之士請於朝願得存爲師存終以所言不得行堅辭歸胡仲狀其行畧曰才氣剛毅言行端恪其志弗獲施故深造自得真儒林之豪傑後學之楷範也門人王炎



贊其遺像曰學淹博而趣約識高明而旨微文雅健而有法行修潔而無疵生民之望後學之師其施不遐其蓄不貲道與時背志與願違九原不作吾誰與歸孫全字仲協治周易政和五年入太學開府張公琮見而奇之妻以女靖康初金虜圍京師諸生棄城全在其間倡上章任李綱以却金虜既而隱避不居其功欽宗即位上表與免解三試禮部志弗獲伸高宗中興紹興郊祀許免解就殿試而全見奸邪並進舊疆未復翻然歸老扁其讀書之所曰叢桂軒隱居教授與公有同居孝悌義讓乎遠邇人稱曰叢桂先生按四友先生私淑二程之學淵源可考而張公琮所作墓銘畧不及之豈當時洛學之禁方嚴故不敢公誦之邪

環溪翁程君墓表

朱文公

環溪翁者先君子韋齋先生之內弟程君也諱鼎字復亨徽之婺源人少孤從先君子學於閩中因得講聞一時儒先長者之餘論而心悅之抄綴誦習晨夕不少解先君子愛其勤敏於其歸書六言以贈之皆事

親修身爲學之要君拜受其言以歸益自樹立務記覽爲詞章思所以大其門戶者然君爲人坦直不事脩飾好讀左氏書爲文輒效其體不能屈意用舉子尺度以故久不利場屋家故貧至君益困終歲奉親徙居窮山中自號環溪翁山田數十畝環堵蕭然無以卒歲而君處之泊如也晚益不得志因自放杯酒間酒酣調左氏書雜以國風雅頌之篇聞者聳然傾聽俯仰疾徐之間頓挫抑揚如有節奏至於放臣孤子怨夫寡婦之詞又未嘗不三復感慨而出涕流漣也庸夫孺子從旁竊觀或笑侮之君整然不以爲意蓋其中所抱負有不得聘者故托以自遣至他行事則其不合於理者固鮮矣乾道元年年五十九以疾卒後十年君夫人胡氏亦歿遂合葬于懷金鄉福臨里允泉之原蓋新安番陽信安諸程皆出梁鎮西將軍忠壯公靈洗其家婺源者又自歛之黃墩徙而來譜牒具在聞之先君子忠壯公葬黃墩以石爲封今尚在也君家自其大父翔始與鄉薦父著亦以郡學上舍嘗貢京師皆不幸



早卒至君學益勤而其師友淵源所漸者益遠顧亦不逢以及其世而有子曰洵好學而敏於文君奇愛之曰是足以成吾志矣既又屢薦不第今乃以特恩授信州文學識者恨之然洵故嘗從熹論為學大要意其所以成君之志者在此而不在彼也熹祖母君之姑因謂君叔父勿從先君子在臨安時時見君來先君子或留與飲君必盡醉而論說衣衾不能自休既長歸鄉里又得拜君而君辱教誨之則君益以老矣然得酒輒歌呼談噱意氣猶不衰也今又三十餘年洵乃以書奉君學徒李縉之狀請表君墓慨念始終顧二父於今皆不可見而熹與洵孤露之餘亦俱老大乃流涕而書之蓋以重歎君家之不遇又予潦倒無以副君疇昔之意而自悲也嗚呼尚勉之哉淳熙八年八月乙卯表姪宣教郎提舉江南西路常平茶鹽公事朱熹述

此尚有少曲折異時得面論而後下手乃為穩當觀此則朱子於外尤先德慎重如此 幸齋先生適經後亭序廣平程鼎宇復亭謂予於外尤從子游於闕者二年予語以安適憂患知之詳矣將歸省其母及其祖母其可以無言可徒文子問於予思曰親喪三年未葬則何服子思曰

三年而未葬則服不除也故告之一曰葬吾舅而後加吉服夫子失魯司寇將之荆先之以于夏申之以典有曰喪不欲其速貧古之君子以失位於諸侯曰喪不扶自直植之榛莽則委靡然故告之二曰非爾居以寧爾親蓬生麻中不扶自直植之榛莽則委靡然故告之三曰非爾父之類者勿親也江州岷山自荆之楚洋千里而至於海者大川三百川三千以為助也故告之四曰廣學問以資見聞宴安鴆毒不可懷也君子非獨惡懷也故告之五曰勿懷安男子生則以桑弧蓬矢射天地四方示志也夫以不貴之軀豈浮沉鄉里而名不稱故告之六曰無忘四方之志夫齊之善味者淄澠之合能辨之淄澠之合均是水也子歸矣他日執經而來問予能入於常流而不變其味乎尚能為君游之宜

鍾山先生李公縉行狀

程克菴

先生緯縉字參仲姓李氏世新安婺源儒家也會大父蒙大父居注皆隱居不仕父鏞始游太學知名建炎初以累舉補官為南康軍之建昌尉饒州司法參軍太平州軍事推官以沒先生推官公之長子也少穎悟讀書日千言詩易禮皆畧成誦而尤精春秋左氏傳屬文敏甚自朝廷設元祐學術之禁士非王氏書不讀宣和禁稍弛而遠方人士徃於所習未盡變也婺源又居重山復嶺間見聞尤狹陋逮兵興四方雲擾



賢士大夫多避地其間於是有呂公兄弟曰和問曰廣問者和靖尹先生高第傳伊洛致知篤敬之學又有俞公靖者亦里儒先也多識前言往行其學出入坡洛之間先生與里人滕公愷悉從此五君子遊滕公長先生六歲負才氣不肯友不如已者獨器重先生目爲小友嘗將閩中所刻東坡先生文章號大全集者相與讀之歎其編次無法真贗相雜奮然取朱黃盡塗去不類者滕公見之驚曰子後生敢尔邪他日得蘇氏家傳本校之果皆非也益竒之乃出一編書示之曰好文而不知道空文也此書吾得之羅公皆河洛遺言公戒勿輕示人吾今日爲子發內府之秘矣先生受之以歸口誦心惟默若有省間有所疑又從諸公質之於是學問日進復侍推官公官南康遊廬阜識隱君子祁公寬亦和靖學徒也聽其言多相契者然猶疑其未也出入釋老求之者數年知其說不出乎吾宗乃益自信遂厭科舉之習卜築雲山間爲隱居計名其山曰鍾山榜其室曰中林常曰兔置武夫微賤之人而中林人

所不見之地也以微賤之人處人所不見之地而能持之以謹齊之以德則可以爲公侯之腹心然則人可怠於自修邪自是優游涵養學益成行益尊鄉人宗慕之然先生讀書不務多爲訓說獨嘗著論語西銘解義山家業書數篇而已有來學者隨其資誘之循循不倦其言曰敬者心之閑轡也心有不敬焉則馳矣敬而不已則明明則誠故學者致心之道敬爲要又曰禮義廉耻是謂四維勇於棄廉耻則勇於廢禮義一維苟絕四維皆滅理之相牽聯者也四維張其心康其身昌四維不張其心荒其身滅亡故學者持身之道知耻爲要又曰學者於道能致知以玩索之篤敬以涵養之久則見面盎背氣象日別非聲音笑貌所能爲也又曰道有遠近學無止法近者道也遠者亦道也學者見其近而不見其遠遽止於見則陋矣惟於見處更加功夫進進不已自然所造深遠而其成也宏矣其發明後學大指類此雅好文詞既老不衰嘗曰文者所以載道言之不文行之不遠而世儒或以文爲不足學非也



顧其言於道何如耳每爲學者誦眉山之言曰物固有是理患不能知之知之患不能達之於口於手辭者達是而已矣以爲此最論文之妙故其爲文指事析理引物託諭要以達意所欲言者而詞采自然如風行水上如浮雲遊太空中姿態橫生可喜可愕晦庵先生常評之以爲筆力奔放而法度謹嚴學者所難及也至他所爲詩騷閑肆俊偉畧皆稱是工書得顏蘇筆法人有得其簡牘者多珍藏之其爲人長不踰中人而貌古骨強神觀粹清言皆粲然成文聽者亡倦事推官公及繼母向夫人以孝聞友誨諸弟綺緘甚篤縉舉進士高第嘗教授福建二郡士人多推稱之然與緘先卒諸子孤露先生扶植教養如已子男婚女嫁皆有成立蓋自推官公之歿先生主家事者二十年閨門肅睦生計日贍內外未嘗有間言也其接賓客奉祭祀節之以禮儉不及陋租賦之入常爲鄉里先雖在林下而事邑大夫不廢桑梓恭敬之節親戚故舊或以緩急告往往爲之排難解紛而不受其報或譏其既無求於世

何苦爲是拘拘者先生曰如是烏知吾心夫以傲爲高以放爲達以自私爲有守吾不爲也且禮與仁不可須臾去身況爲士可以去之乎郡守徐侯誼聞其風高仰之馳使奉書幣迎致郡庠使諸生矜式焉先生不得已強爲一行然亦竟不爲留也嗚呼若先生者學該而守約志獨而愛周一介不以與人而不以爲嗇一介不以取諸人而不以爲矯其古之人歟古之人歟紹熙四年先生之年七十有七矣八月二十有六日以疾終于家屬續之夕其言琅然不亂於是人益知其所養果有過人者也娶同郡朱氏再娶董氏王氏子男三人汝極季札叔相皆種學績文有家法女一人嫁迪功郎江州德安縣尉王泰發進士王其孫男三人諸孤將以某年某月某日葬先生某鄉某原以書來告初先生之少也嘗從洵先君子學後洵復受業先生之門先君子之喪先生實狀其行以授晦庵朱公爲之銘今先生之喪諸孤以爲近而知先生者莫若洵遠而知先生者莫若朱公故復屬洵論次遺事將請於朱公洵自



惟晴昔從先生遊時年未二十今行年六十二而於公亦已老矣嗟日月之逾邁悼前輩之彫零其可以文詞不工為辭乎乃雪涕為之書紹熙五年三月十三日門人修職郎吉州錄事參軍程洵狀鍾山先生季胤奉其先君子之行狀一通通不遠數百里謂予於建溪之上拜起而公與公而聽其餘論心固已始知其賢然其鄉人而客於建也久矣與公而聽其餘論心固已始知其賢然其鄉人而客於建也久矣年復歸而再見公然後從竹樹密時命予與鍾山所住為將老焉計矣兩林之間渠清沼深竹樹密時命予與鍾山所住為將老焉計道義談說古今而深流厚嚴移刻乃出其平生所為文詞使予誦之則皆高古奇崛而深流厚嚴移刻乃出其平生所為文詞使予誦不能久留以日相與追逐於東阡西陌之間也既別而歸書疏不絕其後數年聞公物故予以憂患疾病之西不寧不能一往哭公而公之諸不以為罪更以不朽為託至受其狀而讀之則公之賢掌可復得顧雖不敏其何敢有發於言乎乃以病衰心力凋耗把筆欲下而神已不俱來矣遂無以塞季子之意而姑記其篇末如此以見先夫之狀果無辭予雖多作亦不能於文詞亦其師友淵源之有自也慶元元年十月人子癸巳冬所居清遠閣

汪居士萃傳

李以申

汪居士萃字叔耕休寧人自幼不羈寢長卓犖有大志不肯降意場屋聲病之文乃退安立園讀易自廣凡韜鈴之書釋老之典靡不究習屏居黃山稍遂高蹈意嘉定間會下詔求言遂三扣天閣論天變人事民窮吏污之弊行師布陣之法不報慈湖楊公簡見其書曰真愛君憂國之言也時朱子召赴經筵未至萃逆通書言財不待先生而富兵不待先生而強惟主上父子之間諸公所不能濟者待先生而濟若憚於為父子深愛之本而利於為體貌臣工之末以是為治未有能久者今日之事先生建明稍緩切恐言者已伺其後是非不能為天下學道者之地亦恐不能為後世學道者之地朱子深重之用其言西山真公德秀在直院日嘗欲其俯屈以訪諸賢其自重如此徐貳卿誼帥江東謂其履行素高移檄本郡使備書史筆札抄錄著述欲以遺逸引薦于朝不果築室柳溪之上園以方渠自號方壺居士每醉必浩歌賦詩以宣其鬱積有柳塘詩詞傳於世西山真公德秀在直院日嘗欲其俯屈以訪諸賢其自重如此徐貳卿誼帥江東謂其履行素高移檄本郡使備書史筆札抄錄著述欲以遺逸引薦于朝不果築室柳溪之上園以方渠自號方壺居士每醉必浩歌賦詩以宣其鬱積有柳塘詩詞傳於世



好賢欲徵服今直院曾侍郎秘書少監劉宗酒及館中三數士皆名  
德秀如老泉以上正文後山以坡公至於韓子蒼之流皆不辭科目進  
唐居士遇文公於慶元遇西山於嘉定而訖不遇豈三公不能為歐蘇  
哉予觀西山帖欲居士俯屈以訪諸賢則其自重難進之節非招不往  
豈時俗之過榮矣慈湖朴實之訓實先臨之掌書貴其猶咀其華而  
踐其實昔耕之而今獲矣重光協洽歲仲  
秋月朔浚儀王應麟伯厚父書于歙郡齋

康範汪處士碑墓誌銘

呂左史

淳祐四年夏午叨除柱史七月朔日鄉之處士汪君處微父之子燾不  
憚老火數百里來訪于京懇懇致辭曰燾不天先君子棄諸孤八年矣  
昔者窀穸事嚴未克乞文納諸壙不孝之罪無以自贖今子秉史筆敢  
疾馳再拜求墓道之銘庶俾潛幽賴以不泯不則歲而不得記猶不葬  
也一念純孝令人感動詎可無以塞其請矧處微父之賢午論聞習敬  
之其學術行誼足以防範名教其典刑風流足以標表區宇此漢文苑  
逸民唐卓行孝友所傳之儔而所謂有道之士也國史且宜傳如之何

不銘乃即其門人所狀及午所知者愈之君名暉處微其字以紹興壬  
午歲二月二十二日生少長風貌魁梧儀集凝重已不類凡兒九歲即  
遭父喪哀慕如成人事母以孝聞尚逮事其大母群從兄弟且同居承  
順篤睦家庭無間言實翁稱之從鄉先達直閣汪公文振學蔚有文  
聲力慕高遠凡國治官民政俗靡不究期為有用之學也慶元癸亥會  
其長兄賜以五舉得官竟不受以死君即感傷無用世意至開禧丁卯  
猶竟舉闕下時方用兵事日復異慨然嘆曰是尚可求仕也歟哉不就  
舉而歸盡棄所業偷然不以名第介意嘉定壬申元妃胡氏亡手營一  
丘縣南五里許山如玉環因想唐人盤谷之趣結廬其中名曰環谷更  
作堂以靜觀扁之取明道程子萬物靜觀皆自得詩意自非疾忌無日  
不徜徉於斯君時年五十既不事科舉即取六經諸子旁及二氏之書  
研精覃思窮理盡性求所謂自得者安於貧約飯藿羹藜一飽飲有餘  
喜以修時望花隨柳四時吟不足處家尚雍肅曾無疾聲遽色奉先務



嚴家慶者慢心惰容墳墓之有侵伐必禁族姻之有慶弔必辭以孝悌  
則睦訓家之子弟以忠信篤敬詔里之後生急難相求者援之顛連無  
告者卹之解禁益之忿爭扶欲破之義後凡利可興害可除者無不盡  
其情由是德意善國里俗不變人至不犯於有司誠心貫通水旱禱禳  
神亦無往而不格是豈僥倖於一日者哉年逾六十學益老道益充深  
有得於孟子養氣之旨復於先虞書堂榜以善養而居之曾中之浩然  
者可想也給事袁公甫守徽日雅聞君名至紹定間持江東常平節一  
路夫侵君獨能為邑區畫勸分貧富得所袁公行部造門未見君以  
編氓困窮哀公歎息而去更欲狀其事以聞諸朝君又謝不可余政真  
文忠公德秀亦久知君端平中二秘監奉公過通寧是邑責公屬求君  
言行之實將以名氏薦未及刻而真公薨人莫不為君抱憾君則曰天  
知我厚矣李公之在邑也政有所不通事有所可疑多咨取於君至公  
退餘閒又未嘗不詩酒相倡酬也後君薨遂奉公入問君咸無所屬賦

如夢令一闕而逝時嘉熙丁酉四月二十有六日得年七十有六里人  
追哀而聚哭之李公率僚屬致祭文為之誄稱君清不絕物和不失已  
相與私謚曰康範處士咸以為知言噫若處微父可不謂之有道之士  
乎汪氏為吾州著姓派實本英濟王績溪則王所毓之地故支屬尤著  
大君之曾大父敵三拔鄉薦以南廊恩授文學元豐間黃門蘇文定公  
為邑宰與之遊甚相得娶古靈陳氏大父文中娶崔氏繼大梁孟氏該  
淳熙慶恩封孺人父二錫本伯氏安中季子祝氏所生文中命以為嗣  
祝氏於徽國朱文公母夫人為諸姑三錫娶葛氏繼滕氏章敏公曾孫  
女君勝出也既生有淑質復得二三外家休光餘慶照映沾丐故其學  
行風節端確淳明如此君為文多律傑吟詩率成咳唾間平生著述有  
曾子子思子二卷為全書他文未成集娶胡氏即先葬環谷者至是奉  
君柩而合兆焉是為良安鄉杭村之原時嘉熙己亥四月十一日也子  
男四人長開蚤世次即壽也次點俱業儒學然亦蚤世女一人未及嫁



而亡孫男二人寅啓午竊惟清而不激和而不流昔張君喟以稱邵堯夫先生清不絕物和不失已今李公遇以稱吾處微父稱吾處微父如稱堯夫夫誰曰不宜午祝氏之館甥也接是則於君家嘗有一日之雅今又獲讀君行編而知諸公之推許者若是其與荀淑戴良郭林宗輩之於黃叔度何以異使午得為君傳亦必述李公之辭贊之今姑即以爲銘銘曰

夷清惠和俱聖之儔隘與不恭豈聖未優去就若殊望望由由聞風者興天地同流吾處微父淵乎其似清不絕物和不失已將可比堯夫之不激不流亦上師夷惠之廉頑寬鄙故生也安貧樂道能康濟乎一身沒兮樹石表行善範模於百世

吳益謙自牧墓誌銘

呂左史

新安文風尚矣至近世程文簡公大昌棣華二吳俯儼皆學博才高文追古作得其傳者名大學冠南宮項背相望爲時聞人勝菴朱先生又

以道學倡天下戶外之屨常滿吾鄉秀彥固有親炙之者而未多見豈以爲東家丘邪文公自享齋徙居建徽在萬山中士安所習不憤負笈遠遊往往有聞而知之耳東閣許兵部文蔚在上庠刻意斯學爲司成葉公適所知以上舍解褐教授于家靜菴吳益謙實爲門人高第益謙諱自牧世居歙溪南曾祖某祖某父某皆隱德弗仕益謙幼敏悟受業鄉先生王令君便蒙鑒賞尚書金公安節亦以年稚文健未易量稱之後慕東閣之學盡棄其學從之游年十四已有聲場屋稍長俯視輩行不肯徇流俗爲時文嘗取鄉薦三上春官輒不利益謙不以爲意退講究問辨益自信其所得作講義史評雜著數百篇皆有理趣執經來學歲百餘人有預鄉書登蘭省者嚴陵詹駕草民亦師東閣於益謙爲同門友洎來守新安首尋訪道舊興嘆處以學職四明李寺丞以制與其弟以申相先後爲郡博士咸知敬重由錄而正領袖多士其文學淵源如此益謙事親孝居家儉謹以處身和以待人救災恤貧爲宗族里鄰



所信愛諸父將分異具載書益謙願受數少者此書上縣令疑其不均必致訟後竟無辭新安人士日盛歲貢額極狹端平甲午科舉有詔益謙率士友告州申朝廷員得增二丙申頌履畝之令州委舉職議益謙奮筆乞減免尋獲旨佳科此其行義大略自學問中來也益謙於所居號靜菴又創堂闢軒曰風月曰青紫皆自為記發明動靜之旨浴沂之意格物之學為時貴有識所稱許晚記可軒亦足軒以示訓家庭皆非苟作者益謙經史淹該旁通百氏嘗自營藥哉之立於大富山窻奇偶二室以俟息焉又為屋以寓守者扁曰伴遊且書其棺之簞曰斂手足形枕簞之安原始及終是為達觀一日蚤作命子若孫來前曰爾曹立身行已之道平昔言之熟矣生死之理真同夢幻吾將逝矣其以明年十月九日吉辰奉吾柩藏之母忽言訖而逝實嘉熙丁酉四月二十日也享年七十有七娶程氏先卒子勇四人長起莘次起宗繼從叔後次起蒙起黃女四人適進士程誠進士胡希孟進士方子回進士謝炳孫

男應辰業進士孫女五人適進士汪銓進士鮑鑑餘尚幼曾孫男全壽誥誥未艾是必有能昌其學者矣起莘等從治命奉襄事前期具行實來求志銘每念益謙與其弟益欽俱以文行高月旦評號溪南二吳其學晚無師獨一難一見以為可語遂為忘年友文場燈燭同之某偶先登既而益欽以不克成卒今益謙又以不克成卒成不成何足計顧前輩零落殆盡後生莫見典刑感今懷昔為之隕涕謹叙而為銘銘曰大溪之南爰伉其門大富之山聿新其墳師友淵源不墜斯文經訓蓄奮貽厥後昆慶元嘉定間兩鄉貢馳聲甚都親昆季也季曰釋齋先生先十五年而貢貢之二十六年試南廓授文舉未及銓注而卒得佳于所居之南二十里曰長虹葬焉踞坎挹午四望適停廷表可十畝佳山水也歲嘉熙庚子厥孫景深翁附焉去之六十六年為元大德乙巳曾孫君實翁附焉其配汪氏壽藏附焉伊川左昭右穆之圖呂氏婺州明招山之例有相似者同里讚之里以鬼饗始謂之備乃即東偏築屋未也古不墓祭重廟祭卜兆之次繼以鬼饗始謂之備乃即東偏築屋奉三祭之祠而曹涇為之記涇聞之先賢莫為於前其美弗彰莫為於後其盛弗傳藉翁由科舉登名立門戶軼發輒折微有欠憾未宅協吉命相補除神靈安子孫成慶事始未有一堂揭妥為今日之祠遂當與此



止此山為水或相映帶後之為何如哉昔徐氏之思亭餘姚氏之存菴  
何如言而惜也涇之筆力弱也因歸來長虹苟有以烹後兮寧其勉射  
翁聞開分詞鋒正南兮北風歸來長虹苟有以烹後兮寧其勉射  
竟來兮深翁花黃兮青驄而梁放熟兮道窮歸來長虹視乃厥祖兮事  
將無同竟來兮實翁早孤而立兮晚壽宜隆足見先人兮夜臺西東歸  
來長虹後百年兮德耀依鴻亂曰水遶兮山重  
千載兮斯宮案察兮盛豐百祿兮來崇是為記

宋江西轉運幹辦公事程公 墓誌銘 方虛谷

予守睦屈休寧程君克紹簿遂安尋為直代去不復仕蓋詩禮之學有  
自來今得汪君宗辰所述君先公行實觀之乃知子之賢父之教也公  
諱晞尹字聖在號隱莘居士少負大志若昔阿衡曾祖儼祖莘考際自  
忠壯公靈洗後世為新安望姓家地名大富營吳以口十餘里故端明  
殿學士程公秘所居也端明器公以所親吳氏女妻之公性簡訥重然  
諾從師取友聞博見新舉動不凡早失怙借內子事母孝事必稟命不  
擅食必親進不委婢如疾必親嘗藥曉夜不解帶毋飯乃飯毋安乃安  
風木疚懷練祥猶慕姊嫁而省生養死藏視甥如子完其一家中表能

治生者貧不取贏疎且遠待而舉火者不一晚欲依范文正為義田  
年與意違由家出以口兩岸夾澗險阨迫窄寒病涉潦望洋椎擊煖燒  
破折崔嵬去阻就夷頽穹益卑杠梁成輿馬通靡溺靡跌凡四世歲不  
輒工權衡斗斛守高曾舊物斂散平均無他人輕出重入之弊里之為  
富者責進租息子倍本公惟征定額久則毀券以其才足負荷斯世而  
名場齟齬授承節郎江西轉運司幹官壯心灰矣即第之東刊山樊圃  
引流種樹亭榭潔雅與賓戚相觴詠借謝傅之東山名之微恙不起公  
生於嘉定八年乙亥卒於咸淳七年壬申壽五十有八德祐元年乙亥  
藁殯於近里之萬竹至元三十年癸巳改葬于遂安龍耳峯之南公會  
祖墓在龍耳之北孺人吳氏生受恩封先七年卒墓在龍耳之西子一  
人即克紹與婦戴氏度公佳城二十餘年而後得卜安靈三丘密邇誠  
孝所感豈偶然哉孫男三人清正儀孟仲踰冠讀父書克家孝尤岐嶷  
孫女一人及笄許嫁婺源迴嶺汪氏銘曰



種德為根枝子葉孫來花食實若古桃源是為積善之門虛谷書云八十二字古文以簡為貴簡則可以傳遠愧回所作未能簡耳書與篆額得名士為佳仍須佳石則久而不泐回拜手

汪常簿復傳

洪杏庭

汪常簿復字晞顏婺源人登景定三年第舉遷監行在豐儲左倉朝議  
倒廩揚精鑿恩畿卒諸倉患之復抗辭謂邊士勞苦精糲何擇畿內卒  
驕久矣今又啓之脫一日給粗惡若曹能安平兵部侍郎吳革以白廟  
堂事遂寢初復之父嘗佐賈似道於鄂聞復已知名及賈專國宰相擬  
官見復姓名指之曰人望也見慕如此而復終不願附為太學博士司  
業盧鉞問復朝議弼七籍何如復毅然曰天下多事矣軍民業業皆有  
離心可又為此以失士心邪賈聞甚憾咸淳庚午除太常寺簿數月以  
臺論去仕至朝奉郎通判揚州至元甲申行臺訪求耆德江東得九人  
以復為首復潛使辭焉後部使者盧公摯至邑強請見因勸以仕復慨  
然曰亡國之大夫猶踽踽為世用公何取焉卒年六十八先是德祐末

家居兵至正坐不去兵欲執之子樵以刃拒一兵斃左右負復以走眾  
遂殺樵丞相馬廷鸞以書言曰能執干戈衛父母世不之童踦矣樵時  
年十四云馬碧梧丞相回汪晞顏常簿言十年與維友所歷者何人矣吾聞其語矣自天地化為鐵鑊以化至鳥禽化為君子吾聞其語矣  
生讀元次山化說自道德為嗜慾所以化至鳥禽化為君子吾聞其語矣  
未見其時也而乃今見之雖然吾見次山之所謂朋友為市利所化而次山又未見其語矣  
不足信何者其平生交游影滅烟散而浮溪之上有前太常書价在門  
於是信以次山之說為不足信矣晞顏有野民之學表聖之節幼安之知  
今家為天之遠民使滅其當年非據之處為執事今日則吾腹目矣何  
尤重炬者羞與訪問死生之幅蔡然奪自將為我賦十月之交以為壽  
朝何言與某偷生而不願生祈死而未得死者也最是造物留此區區  
執之非善哉未申錦標玉軸者比也其何敢忘

胡主簿復傳

洪杏庭

胡主簿復字濟鼎婺源人少孤家貧母氏策勵以學勸書不輟博覽  
強識魁江東混補在上岸公私試輒占高等登第授迪功郎湖口縣主  
簿以道遠祿養非便改授貴池縣尉既任簽憲郡幕錄五縣囚人稱平



允有鬼物懲毆死者獲伸於公德祐乙亥微服歸鄉或以宦進招之賦  
媒發問答詩以見志金華胡公長孺跋其詩曰宋疆於淮重兵在山陽  
盱眙合肥池岸江城惡渠盜淺荷戈不滿千人兵未及境都統制張林  
已納款降附與異意輒收殺之當是時濟鼎爲附城縣尉貴池羸尫弓  
手數十百人勢不得獨嬰城家寒親老無壯子弟供養際張出迎托公  
事過東流縣作冢其道周書木爲表識曰貴池尉死葬此下用杜張猜  
疑令不相尋迹歸婺源以易教授鄉里往來從學者常有百許人昔人稱  
慷慨殺身易從容就義難濟鼎蓋從容就義者歟

紫巖先生汪公

宗臣行狀

汪以質

公諱宗臣字公輔號紫巖唐端公十一代孫也曾大父諱夢徵號適安  
逸人晚年更號友鹿居七年十四父喪奮然自克務學愈力六中亞選  
補國學內舍免解屢試禮闈不第遂無仕進意乃遊江淮歷嵩岱走關  
洛以歸因賈茗于常不事產業紹定壬辰自荆溪息踵寧居於是關東

岡築亭上曰友鹿下曰侶魚娶俞氏生二子長曰居安次即公之大父  
也諱居易卓犖有材幹科舉不利復修常之別業增至千五百餘戶於  
所居之東偏闢池建書堂延族巨儒梅澗先生訓導親族子弟扁曰信  
齋因以自號晚授迪功郎兩浙運司幹官未任而卒娶胡氏無子查胡  
氏幼弟爲嗣侍妾數人時氏生有尚父諱有聞號坦翁嘗以書見聞帥  
立信公合宗譜爲之留款給榜曉示復卜居于祖屋之左名睦肥堂子  
孫同居六世矣享年八十歲娶江氏享年七十七歲二男五女公其長  
也次曰季洲公生嘉熙己亥十月二日爲人端慈好讀書賦質雖鈍勵  
志自修幼學于梅澗先生先生學于毅齋沈先生其學淵源實自考亭  
咸淳二年丁卯六年庚午兩中亞選遭宋末造引身不仕乃遊鄉校與  
海寧程運幹希尹父子交四十餘年無間自扁其游息之所曰寓所命  
族姪孫炎祖作記因與虛谷方使君甚善公爲撰運幹行狀請銘于方  
公回緘乞紫巖先生商畧公爲刪改三十餘字方公嘆伏父母有疾即



命醫檢方親製藥餌精誠所感服之良愈及卒哭之過哀三日而食一  
以禮自導親友交相慰曉爰攷諸史籍著爲世業窺斑一書辨論精明  
文思高古雲峰胡先生定宇陳先生深嘆美之又集曉音詩文爲四卷  
自序其始末以遺孫子泰定二年恩加父老錫以帛纒至順元年詔民  
間九十以上者有司無役其子孫故雲峰先生書中言公之耆年碩德  
爲不可及其略曰老先生年將百歲而有七十歲之子五十歲之孫曾  
孫年近三十且又見玄孫書聲滿家綵衣五世祖見孫而及見孫之孫  
孫養祖而逮養祖之祖端爲吾新安盛事庚午九月十二日忽感疾至  
晚屏退家人命諸子親與沐浴振衣正冠居于牖下謂曰吾學不名家  
何功於世吾沒之後治喪則稱家有無切不可過禮不可作道佛二家  
齋醮亦莫爲陰陽拘忌汝等切不可違命是吾死爲無知也吾亥時當  
長往與親厚決別至是遂終焉壽高九十有二歲葬後村娶游氏壬寅  
五月二十日生年八十六與府君同受恩帛後至乙亥又受表裏兩纒

孫得免戶役者十餘年歿于乙亥六月十七日壽高九十有四歲葬  
後村子男五人長曰勝娶游氏次曰同能讀父書娶程氏三曰元堂時  
大三帥幹有常寓行在屢書覓而爲孫有詩名世勅授平江路教授娶  
相府謝氏今居崑山趙家莊四曰定娶游氏五曰順繼六弟爲嗣乃父  
命也女來弟適里中游梅巖存德孫男六人曰泰壽娶游氏曰朋壽娶  
江氏曰眉壽娶游氏曰祖壽娶俞氏曰柏壽娶江氏曰臨壽娶詹氏曰  
元壽娶程氏曰翼壽娶游氏曾男孫十二人天祺天禧延安崧生修老  
儀生天全天貴漢老梧生皆公命名公歿後而震生魯生生焉實祖宗  
厚德所致也斌幼視公之行實爲審謹叙其大槩以託立言之君子圖  
不朽云時至正九年歲在戊子七月丙申姪孫斌謹狀

程義士楚翁傳

家乘

程義士楚翁發源彰睦人忠壯公之後也性倜儻喜問學豪年詩書悉  
請于須溪須溪稱其逸才必當名世德祐末元兵入臨安江東列郡皆



下楚翁憤憤散家貲陰結敢死士將復郡城因以舉事事洩被執榜掠  
幾死夜以金賂守者得脫去之番陽時碧梧馬丞相拜鸞義不仕元楚  
翁往投之碧梧義其爲人遂客丞相所久之聞豐山謝提刑枋得在閩  
又去之閩客疊山所會時事稍定潛歸婺源人有虞之者復走閩凡十  
年間關險阻一寓于詩有黍離麥秀之感讀之令人涕下疊山被執北  
去楚翁俵俵無所依亦死逆旅中其所著述經兵燹後片紙隻字無復  
存者惜哉○碧梧贈楚翁詩曰汗竹丹鉛側空花粉黛中尚懷丞相亮  
肯署大夫雄有客來今雨誇予邁古風幽情傾不竭渺渺碧雲東○疊  
山贈楚翁詩并序曰客閩十一年不敢談詩玩楚翁新吟猶有均春雲  
懷李白者堂前擊筑高漸離橐中亦可一出乎夜得絕句敬呈楚翁江  
東未覩舊衣冠腹有詩書行路難蒲柳春風且收淚五陵佳氣逼雲端  
慈母倚門曾教兒吾君何在汝何之堂前戲玩忘憂草聞說齊王歸有  
期近日人傳使嶺梅南枝落盡北枝開長安舊日元無此盡是江東人

送來○又跋楚翁詩卷曰五帝三王自立之國至德祐而滅有天地以  
來無此變也理之變氣隨之西北嚴凝之氣盛行於東南吾序陳月泉  
詩已言之後六年而驗又十一年程楚翁出詩一篇氣清和而志深遠  
有風人遺音王澤未竭民彝未泯豈與文士角技巧哉蛇豕豺狼怒其  
前梟獍喫偷仇其後楚翁置禍福死生於度外毅然以天地大義爲已  
責幾殞榜筆幸逃鋸鉞連播十年本志弗渝豈不真男兒哉黍離忠矣  
義氣不足以感人無衣勇矣忠誠不足以悟主周轍不西千古同恨安  
得楚翁之心見於彼時乎安得楚翁之詩作於彼時乎撫今懷往事可  
爲痛哭者多矣由後視今不知志士仁人之心亦可以快否乎善學詩  
者當自得之丙戌二月望日廣信謝枋得書于卷後



新安文獻志卷八十八  
行實遺逸  
故宋逸民草亭先生程公德萃述  
程潛夫  
自古介行之士或遭世變或不合於時必晦迹山林隱於巖穴富貴不  
以動其心寧沒齒而不怨嗚呼世降罕聞其人若吾草亭先生其庶幾  
乎先生生宋之季居楚郢之墟再世雄於貲家蓄巨艘往來貿遷歲靡  
虛曠產業綿亘儲積盈溢先生視之泊如一不介意惟悼世澤之微折  
節為學從師取友不遠千里與宗人徽菴先生若庸同游雙峯饒先生  
之門經史百氏洞徹微奧識趣超邁師友稱焉獨於科舉之學未嘗經  
於心口曰是義與利之辨爾間侍父避兵泛舟漢陽父沒逆旅喪葬盡  
禮從兄來居洪徽菴適長臨汝書院先生負笈往訪之益相嗟切慨然  
以斯道自任期於力行以造乎極未幾疾疢告終兄子擁旌旄旰先  
生乃挾仲子退居臨川長安鄉之池頭距城不百里樂其山水明秀峯

新安文獻志卷八十八

行實遺逸

故宋逸民草亭先生程公德萃述

程潛夫

乙集

自古介行之士或遭世變或不合於時必晦迹山林隱於巖穴富貴不  
以動其心寧沒齒而不怨嗚呼世降罕聞其人若吾草亭先生其庶幾  
乎先生生宋之季居楚郢之墟再世雄於貲家蓄巨艘往來貿遷歲靡  
虛曠產業綿亘儲積盈溢先生視之泊如一不介意惟悼世澤之微折  
節為學從師取友不遠千里與宗人徽菴先生若庸同游雙峯饒先生  
之門經史百氏洞徹微奧識趣超邁師友稱焉獨於科舉之學未嘗經  
於心口曰是義與利之辨爾間侍父避兵泛舟漢陽父沒逆旅喪葬盡  
禮從兄來居洪徽菴適長臨汝書院先生負笈往訪之益相嗟切慨然  
以斯道自任期於力行以造乎極未幾疾疢告終兄子擁旌旄旰先  
生乃挾仲子退居臨川長安鄉之池頭距城不百里樂其山水明秀峯



岫環翠構數椽以居父子日率僮奴耕鑿灌漑獲採以自給暇則幅巾杖履與田夫野叟雜坐隴畝互相問答登臨翺翔觴詠自適或談時事笑而不應士子來學謝以無聞諸侯交辟辭病不起剪茅作亭于室之右偃息佔畢遠近式其儀範咸稱草亭先生自號宋室逸民為詩文多不留意遺逸林下壽七十餘以終嗚呼若先生者其古人之徒歟豈沒世而名不稱者邪先生之長子來承大宗世稱雪樓先生者也寵命雖不加於先生而先生隱德益光大矣爵祿云乎哉先生諱德孝系出新安忠壯公之裔前代迭有顯人祖宥興自新安休寧遷于郢之京山父子明卒于沔葬于郢配嚴氏有賢行克相先生終著令名次子文煥讀書博聞行敦古誼自號愚莊至元大德中再仕而歸不俯仰於時雪樓嘗曰吾弟愚莊真愚也年七十五卒孫男六人曾孫若干人悉書于譜先生既卒子孫奉柩返葬吳城後遷池頭所居之後士友表曰雪樓生父之墓云從孫承務節衡州路衡陽縣尹無勸農事文淵拜述之

愚莊先生當宋季以城附元由是父子兄弟悉擁節旌至雪樓文憲公復大振之遂赫然為一時之望先生獨當其時退居池頭自號宋室遺民視富貴若將浼焉高風峻節不可及而傳宋史者乃不列之篤行懿範中使與謝龔淵明為伍非大闕歟考先生實與微菴同事雙峯衛

知縣權州宣叅軍公 折鳳墓誌銘

方虛谷

梧山先生畢公諱祈鳳字景韶以大德四年庚子十一月十五日卒以宋嘉定十七年甲申閏八月五日生享年七十有七宋孝廟重武舉上三人及前名率數年可得邊郡公入武學閱禮齋即升內舍咸淳元年乙丑省試第五人廷試亦第五賜紫袍金帶象笏進士及第授承節郎建康府駐劄御前諸軍都統司幹辦公事循修武郎公精通經學年十七亞鄉薦偶用七書將右庠寶祐五年丙辰也公之先唐末自永州徙歙州歙縣再徙休寧千秋鄉碧溪族益大以姓名村三遷藤溪曾祖德妣巴氏祖璘迪功郎妣楊氏父夢和學者稱晉齋先生舊臨安府學免解進士妣徐氏封孺人晉齋經賦無通尤精春秋左氏當羅高第不幸



卒年四十六在公入學十年前而迪功壽八十五見公得雋橋門迪功  
知名當世郡太守縣令下車必字而問畢良之士大夫鄉父老兒童走  
卒無不知有畢良之陰行善事勇為義舉掩疵揚美曲成後進平兩造  
兩劑之競代東矢鉤金至粥田弗吝用是鐘秀於公公初筮見知沿江  
制置使馬公光祖入其幕兼建康府學訓導欲厚其祿俾攝令溧陽固  
辭兩任六考制置使吳公革亦見知外射知澧州石門縣實榮登之入  
稔京湖四川宣撫大使朱公禎孫熟公才名屬幕客章公應下招公無  
宣參權辰州俟至聞奏為真公以親老一再辭亥子之間李銓戍吾州  
虎哮狼噬公潛調柔銷其暴民艱食賴公無饑李銓納土北覲未還其  
部曲李世達挾其子為變潰入閩草竊乘間屠燬歛世宦高貲禍慘  
甚公鎮以靜獨休寧無患婺源汪公元龍起知州事借總管趙公謙挽  
公一出至欲携具叩門公皆謝之慈闈早寡多病公夜必燃香告天願  
減筭壽毋侍藥次欲酒鑿難之公恍惚若見神人誦詩有可惜一杯之

急進酒病立愈壽至九十有三而公年近從心如衰幾毀刻像事之  
每祭必慟公早師兩科杜公禾崑肄業顏山佛廬嗜書如飴晚喜陶淵  
明詩教子及孫惟責之讀書而不責之仕諸公貴人屢請不許子元老  
與回筆說文諸孫能詩時與回書論詩法取友待士良謹塾客陳君櫟  
十年不易一日出集英殿命服周視之尋衣一新道服呼諸孫夾侍出  
揖客而入若訣別者明日稍怯寒食少減夜半丑時語諸孫曰吾去矣  
恬然而逝子一人即元老在杭聞訃輒足奔喪回寄詩哭公謂與回同  
生丁亥乃進士官年今讀前進士鄉達曹公涇所為行狀乃知公長回  
三歲元老已得曹公狀似不必回贅為誌銘然不敢固却公夫人汪氏  
長公三年今八十一賢淑康健女一人嫁將仕郎平江路長洲縣主簿  
汪次焱孫男五人昭祖弘祖正祖從祖壽祖曾孫女二人將以今大德  
五年四月四日癸酉遵治命葬于其里綺灘之源銘曰  
相種將種世常有聞不如書種源源高門家世與學詩禮典墳集英曰



科佐彼虎賁作縣守郡視如浮雲師表於家一子五孫既皆能詩又各能文何必萬金以肥後昆

孫上舍元京傳

朱禮侍

孫上舍高字元京楚山人貌恠奇趣尚幽潔以薦入太學宋亡歸隱海寧山中自號艮山示不復仕杜門賦詠淒斷淪絕以寄其沒世無涯之悲時婺源有制幹許月卿先生者亦宋進士宋亡歸隱製齊衰服之以居月卿婚江凱及婺源人汪公相皆絕意當世俱從高遊其詩悲壯激烈讀者可知其為人方回得高詩嘆曰持此以見朱文公可無愧矣高弟巖字次阜亦以詩名

滕星崖堞傳

汪路教

滕星崖名堞字仲塞質貌清古性度高遠不事產業財有贏餘即以濟窮困為文不蹈襲古人自成一家草書有晉人風度常命兄子舜夫求文丞相遺墨舜夫得所書過金陵驛詩以歸堞曰懸於堂焚香拜泣又

過西湖拜岳將軍墓賦詩以伸其鬱有相對含悲石翁仲老衰無淚落秋風之句其忠義蓋天性也黃文憲公潛誌李君與廉云聞滕先生堞會朱陸之學而得其同與廉率朋徒往就講學其見重如此及卒王茂伯為文祭之畧云才高明而不自有氣剛大而不自屈片言隻字散在斯世殆家藏而人誦之在先生則土苴耳

學賓菊存鄭公天麟墓誌銘

陳弗齋

公諱天麟字德甫自號菊存志隱也昔周宣王母弟友封于鄭子孫氏以國至漢高密有鄭公鄉通德門史冊尚之據吾郡夷濟王傳王少育舅鄭家則歛有鄭自隋唐始而長齡有鄭自文山始公會大父拱辰曰此兒與吾同命之曰同公頽然魁碩事親以孝聞平居履正葆醇恂恂然里閭有寬厚長者風不特同文山翁而已凡揆藻含章皆自洽博貫穿百氏出人曰此同鄭廣文也凡剖疑論事所議定如契龜好客過門翔棲浹日無倦容人曰此同鄭當時也凡勸隄防精禱祀序長幼有儀



穎源

賑貧乏有廩人曰此同鄭次公也歲乙亥人誅兵戎農釋耒耜民色若  
葉公匍匐救助遐邇畢粟以故人無搖心德之者萬喙郡侯寺丞王公  
積翁以其事聞累授職本路鈐階至武節謝曰吾安用此會本道提刑  
察使竹庵與屯先生希魯初行部卒勉多士於耆俊尤重予時分教鄉  
校亟奉命禮公作賓公曰乃吾志矣益屏繁務肇名勝義方之外與騷  
人課以詩有小藁曰梅竹拾遺方將繼處士於松庭尋予真於谷口俄  
嬰寒疾以果熟辭木自遣儵然而逝時年六十有七公以丁丑十二月  
四日生以癸未四月二十七日沒以己丑正月五日卜窆蓋歛縣中鵠  
鄉醴泉里穎源也公娶汪氏男孟孫世儒藉益大其家聲寔踵書學預  
一選充求盈庫官娶汪氏女三人次男可孫娶鮑氏三男岳出繼孫男  
二人弘紹暨孫女五人其孤以其先人之善予也願銘焉予思芹泮舊  
遊嘆菊存一生幼學而奮藝場屋僅三亞鄉書器其才而不柄於用其  
所安者天也銘曰

醴泉之里澤泓淳兮同穎之源實第芬兮巖突峻夷龍連蜷兮松蒼蒼  
晚竟遲遲兮是惟德甫之宅孔成孔安裕來昆兮

鮑雲龍傳

洪杏庭

鮑雲龍字景翔歙縣人幼嗜書至忘寢食義有未解即家寒憲戶靜坐  
默思比長博通經史易學尤精毋病革夜半陝西山層巖焚香祝天願  
以身代毋病尋愈從師閔俊甫試郡庠踰年積分格當陞職雲龍乞以  
讓其師郡博士嘉之遂同陞焉鄉試中亞選偕同里鄭芭待試國庠將  
入棘闈鄭疾卒雲龍不就試傾貲護芭喪以歸聞者義之次舉乃領鄉  
薦已酉省試不利因絕意科場居鄉教授生徒潛心理學有天原發微  
若干卷行世又有大月令筮草研幾未傳勸紫陽山之北黃山之江  
隱君子魯齋鮑公精於易學無書不觀妙年冠計嗜選年七十長回  
一歲與同兄弟交終其身客於同里廣西道儒學副提舉敬齋公之  
家交相得資之著書其書曰天原發微五卷二天如五篇天果有原乎  
曰有所謂形而上之道也漢儒曰道之大原出於天如此則是先有  
而後有道原本也宜當曰道者天之原而天之形象數萬物道之末  
也器也公之書首太極陰陽未生先有此道故孔子曰太極陰陽既生







歙縣二十九都於至大已酉十二月庚申以潘夫人並遂合兆庚戌十一月廿一日也築屋買田亦如閔口其地又巧與五世祖三三府君墓為一山之隔樂哉斯立祖考其安之矣謹按率溪之族派自黃墩遷自冷山念二府君始遷者也三世為四郡馬諱詢四世為公之祖諱勵勵生經畬公諱一麟公父也母夫人柯氏公諱心字字天懷自號肯堂娶潘氏生以甲寅五月二十四日歿以甲辰八月二十二日男三人湯忠相孫男十人眉壽椿壽榆壽山壽登壽趙壽廷壽仁壽崇壽相壽銘曰不偶于時公也有文不悖于時公亦有聞展也此墳其壘與璠是有餘芬有子有孫按心字五世祖敦臨在宋以殷碩行實重其鄉而族始盛嘗尊伊訓先立程氏說立宗會弘齋序之而又銘心字之墓蓋曹程世戚弘齋鍾儒節于展宗會之禮弘治初十世孫聯又合族人修復拓山故祠以重始遷之祀兩祠祭規悉用家禮參以時制而葬之十曾編訂刻辭以傳蓋敬宗睦族之舉在諸程中多稱率口而其講授淵源亦有所自云弘治毛子仲秋一日曉起因閱率溪程氏世澤編題心字誌後  
此陪郭族人敏政書

李隱君森墓誌銘

揭文安公

新安李宗奕以元統元年十月之望合葬其考妣于婺源之北泰紫橋之東至元二年宗奕至京師以書謁于銘其墓辭甚高而意甚悲也屬予未暇明年春乃按其鄉先生胡公炳文所為狀序而銘之君初諱辰祖後易名森字森高其先世有諱德鸞者始遷婺源之嚴田里是為唐德宗七世孫曾大父諱玘宋紹定間嘗貢于鄉大父諱洪父諱霆發世以明經聞君事親孝事長弟喪祭賓客必盡禮遇下有常喜怒不妄施同居七百指無違言與族子弟言必及其祖父艱難之狀而申以讀書為善之勸有善稱之有過訓之有慶弔必先焉國家治田賦濫或勸分之他戶寧受之不忍為火起其隣惟號泣求保先祠環祠皆火而祠獨不及乃徙居市市人夜風暑于門喧雜朝笑見君皆肅然起意不便之又徙故宅之西近其母之墓居之蓋厚德君子也以延祐五年十有二月十九日卒四十一卒配俞氏諱辛字柔新其在室有巨室求婚輒不



樂年三十四始歸李氏慈儉貞懿不尚珠玉華采服勤敬養謹身節用  
化行一家宗族稱其孝姊姪服其訓滅獲懷其惠夫婦相敬如賓其父  
母家在城北朝夕望禱祈二親之壽及居其喪哀毀如在室夫子既歿  
反築故宅以居教二子宗奕宗慶皆爲士故於俞氏爲孝女於李氏爲  
賢婦天曆二年秋九月九日以疾卒年五十九時宗奕試藝錢唐還及  
門而母方屬纊竟不得一語而訣此宗奕終天之痛無涯之悲也胡先  
生曰易家人之象稱嚴君象稱交相愛李君夫婦有焉夫以李君得修  
齊之道俞氏有內助之美宜能交相愛也李君早歿俞氏能教其二子  
以世其家非嚴而能之乎可謂知言矣銘曰  
有唐諸孫有輝其文宅朱子之鄉爲盛族德門夫義婦順昭于後昆百  
世其敦

處士鄭公行狀

鄭以孝

公諱椿字壽夫歿之永豐鄉人也曾祖諱禮重祖諱子儀世以貨雄不

樂仁迨宋末朝廷括富家以充軍實家減於初父諱璨從學魯齋鮑先  
生見義勇爲年十八九時聞宋靖康主和事心不平之恒以胡忠簡張  
忠獻爲山斗宋鼎既移自放于山水間絕口不談世務郡中名士若許  
山屋汪古逸滕星厓江雪石里人鄭貞白吳古梅咸推爲後進第一人  
邑宰鄭君安累薦之誓不仕元母亦出雙橋鄭氏公生九年而母亡鞠  
于祖母潘三年而潘亡繼母向杲吳氏也居七年而父疾作公奉湯藥  
日夕不離側及卒葬祭一遵禮度事繼母惟恐或缺母慈子孝人不知  
爲前子後母也居家勤儉而厚於賓客自奉粗糲樂施貧先業恐弗克  
荷負宗族恐不克敦睦終身忍讓有犯不較娶寒山方氏有兩子曰怡  
曰遠師未娶而亡妻亦繼卒五年三喪不堪其憂而公益力于善不輟  
有女不輕許配聞雙橋鄭勝德賢贅於公安其養育泣語之曰吾祖  
兄弟十五房子宏景定中任無爲軍教授子發子寵再世而絕子文子  
大子壽子震子衡子龍子麟子麒一世而絕惟吾祖子儀伯祖子肅兩



房爾今吾兩子又亡何天禍吾族之慘邪子肅傳五世有孫十四人矣  
非擇賢而繼其何以振吾先業遂以絃姪之次子鎮傑荒姪之次子朋  
笈姪之次子神保鼎繼怡後由是三孫日侍公側樂甚不數年而旱荒  
繼作紅巾倡亂祖孫避兵瀕死者十七八年

國朝龍興天下一而公七十矣步歸田園倡興水利告戒宗族守法奉  
公故村落之中無一人身犯徒配號為良民公之力也先是公卜地于  
平園山葬妻方氏虛鄉于左洪武十年戊午七月十三日無疾而卒去  
所生大德丁酉十月廿九日春秋八十擇以明年其月某日畢其葬事  
勝德與鎮傑踵門請予狀其行予其婿之族子雖不及拜公而聞其德  
善熟矣敢用摭述如右以為求銘之張本云洪武十年歲在戊午十二  
月朔里人鄭忠狀五世祖鮑元珍成娶鮑氏自遷沙溪始祖球三世祖  
不墜先君令君與君玉鮑元珍成娶鮑氏自遷沙溪始祖球三世祖  
從魯齋鮑先生遊君玉與其弟巴先在門下子以歛薦君玉為教諭予  
稱予為叔一無所挾一日先師語君玉兄弟曰故老相傳鮑也棠越并  
予豐山同出郡西門奈何死於五季世系無傳焉君玉得其言旁詢傳

訪由叔牙為齊桓公相功成九合業著一匡食邑於鮑世為齊大夫  
率德忘齊靈公而刑其足鮑牧見逐於齊公孫散居於齊齊即古  
州永嘉遷江南再遷于新安郡之西門隋廢郡為州治于  
西十五里神大業中始以十五里神為縣今縣前墓再遷今居以  
名地曰鮑屯蓋屯即聚也村亦聚也加邑為鄉如去鮑村也其祖自  
國始以下二十餘世墳墓生卒悉為錄註本圖之下用生卒葬娶向或  
所考據者寧缺之慎矣哉諸成請子序之忠壯汪公國於先師曰  
有缺况倍世者乎嘗見郡中直序鮑也一技其友大鄉國實於先師曰  
胡吳必祖少微疑其大今直序鮑也一技其友大鄉國實於先師曰  
與其泛也寧拘嗚呼拘豈中道哉顧人力量其友大鄉國實於先師曰  
士為親也寧拘嗚呼拘豈中道哉顧人力量其友大鄉國實於先師曰  
拘哉於是迷以師之意以為序夫又何辭而味之即為科後進拘豈徒  
鄭序

南山處士戴君墓誌銘

貢文靖公

士之卓然有志於成立者多出於憂患之餘有以見理之故其所行遂  
足以稱世苟能是豈待爵祿之貴然後以為榮哉君諱杞子字南山姓  
戴氏其世有可攷者始居亳之譙國後徙表之宜春至南唐保大間銀  
青光祿大夫檢校國子祭酒監察御史上柱國諱安遷徽之休寧邑由  
山鄉遂為休寧人於君為十四世祖曾祖諱一得建康府錄事參軍祖



諱杼江東提舉司幹官考諱登庸妣吳氏君年二十而卒生以至元甲申卒以大德癸卯葬于鄉之遐富源娶金氏卒之後二十有五日生子曰蘭金氏邑上桐岡公諱鳳之女為徽世家歸戴氏二年而寡年二十有一抱其孤越三年舅姑相繼卒一室孀然桐岡公挈其母子以來保抱鞠育稍長延名師教之經紀其家政無不至十三年而公卒諸舅氏撫愛猶已子金氏茹苦自厲盡出奩具買田於戴氏非旦夕謀蘭年十八歸故居克自樹立事叔父盡敬一日舅氏手君詩一編示之蘭得詩泣拜起哽咽不能讀泣不已請其師陳君樸曰先人葬久未得銘先生狀其事乞銘當世以託榮焉孤也忍言之其可哀也夫君生而穎悟年十二能詩文事父母以孝極力奉甘旨父晚歲多疾君嘗藥於內幹盡於外曲順其意嘗言二親未六十其方幾冠或者返哺之日尚長也其言豈謂止此乎孫男二人虎兒武康縣主簿程願學君之鄉人也以泰定丙寅春受其孤狀請銘於予予交金氏昆季陳君又予所取鄉進士

義不得辭予聞杜和公生於父卒之後朱文公學資外家其所成皆若是蘭能知所本以思榮其親庶幾有志者歟若夫爵祿之貴其來未量乃為之銘銘曰

碩果之義其中則全求本而木探源而泉吁嗟戴君綴祀復延後有昌者盍放其先我銘諸幽以伺表阡

青可墓表

陳定宇

葬書非惟無益於人乃深貽禍於人葬書非惟不靈於人亦未嘗靈於已郭景純以後之人迷於其說何其重不幸也景純忠於晉朝為王敦所殺然初焉曷不逆善其祖父之葬地而庇子孫免斫頭之禍乎自卜葬地後竟淪歿於大江心自謀如此何靈於人使葬書果可信也葬師紛紛曾無與其家者不過柄柄人門以禍福怵人誘人肆為欺誑而已葬也者藏也欲人之不得見也昔之賢者謂死不害於人擇不食之地而葬焉蓋欲擇無用不毛之地以不妨人之耕植未始欲擇吉地為後



人富貴利達計也愚人惑於葬師見某家富貴其家宦達必推其先其地出之此地遂有名於時名之以其美形盛之久必衰其衰也子孫挾此地以售於人貪者捐重資圖之圖之未得訟而廢者何限幸而得之奉以葬焉此有名之地遂如傳舍更代寄宿不保其家之久而不衰也衰則子孫又以售於人而後之寄宿者又來居於斯矣然後知不食之地果爲朽骨之末宅而有名之地不保其不爲貴勢所奪也葬有中道如楊王孫之裸葬固非矣過之者埋金自徇標所有以示盜或記之藉以示子孫又過爲計以防之子孫貧而自發者不少爲盜所發者尤多發之必鬻之未有不敗者敗者賣者必受禍夫始買者亦或遭誣厚葬之不特爲身禍其貽禍於人若此反不如裸葬之不及者爲無禍也昔之帝王厚葬莫如秦皇過於牢固極矣始不免項籍之發末不免未羊之煙薄葬莫如五季周太祖懲唐十八陵之無不發掘也遂紙衣瓦器以葬孰爲自全乎泥葬書以求福而不觀子孫之衰微而賣之以取禍

與厚葬以自取發掘之禍者其爲愚蔽一也蘇文忠公詩有曰是處青山可埋骨達哉言乎吾女兄適古墩吳氏其舅執敬公慕義好古君子也姊婚諱惟深字子靜與先姊同生於淳祐巴西三子長曰昌先卒次乳名冕定名彬不惟無力可圖風水亦雅不信風水葬其父母兄于所居之後山旣板當世先生君子各爲誌銘復諉舅表其墓其家世之詳履行之懿誌銘具矣今惟紀生歿葬之歲月昌生於咸淳壬申歿於至大辛亥享年四十歲子靜沒於延祐甲寅享年六十有六歲泰定乙丑六月葬父子同穴先姊沒於泰定丙寅享年七十有八歲昌以是年八月謝世墓塚相去一二尺許皆坐申向寅將取坡詩青可二字扁小亭於旁先取溪濱白石砌其塚擇石之稍大而勻者成青可二字於其上焉若稽古先賢之不信風水者夥矣章章者前有司馬文正公次有澹庵胡公繼有誠齋楊公胡楊二公之言比之司馬公尤爲深切著明楊公之說見於荅朱侍講書荅羅必先省幹書與春雨亭記閱其文集



可知不假詳述愚尤於胡公之言有感焉胡公乞斬老檜遠貶海外其配沒於家公書祝羅甥尚志令與子詠同擇葬地只於水北一帶家山取其土厚水深足矣世人未有不死死未有不葬何患無地九經十七史老舅皆涉獵並不說富貴由葬地俗儒不讀書不見古人議論溺於陰陽家說背孔孟之學戒之慎之若不從吾言勿踐吾門勿受吾教澹庵之於羅甥戒其泥風水尚恐其信風水不免危言痛鍼砭之豈如予之吳甥能自不信風水與予之定見昭合無間不待戒諭之費辭豈不加於澹庵之羅甥一等乎遂喜而為之書第前之云云高見遠識者寧幾人見而怒之者必多矣其慎無乏出之也哉

秋江黃君一清墓誌銘

黃文獻公

君姓黃氏諱一清字清夫徽之休寧人初李韓公以中書平章政事知貢舉潛用門生禮拜公里第君在焉別去二十有五年而君之子晉踵門泣且言君已沒持黃粉巡檢程君之狀以銘為請按狀君曾大父拱

大父振遠竝能施惠其軍中見謂長者父元珪蚤卒母吳氏守節自誓內事舅姑外資諸子使為學君亦痛自飭勵期無愧於古人年逾四十始游京師久之無所知名洎李公以舊學相仁宗賢才彙進而君以母老不忍去毋告之曰汝父夙有志四方而今已矣汝其忘之乎君乃幡然復入京師謁李公君古貌長身鬚髯如戟寬衣高冠容止簡率又作吳語左右多自笑之公望見大驚異即下執其手延之上座時公門下皆名人顯士而君以布衣居其間恒與公凡禮坐客莫出其右隱然名動京師君以秋江自號而李公自號秋谷遺君詩有君釣秋江月我耕秋谷雲逃名君笑我伴食我慚君之句朝野傳誦滿口內翰趙文敏公既為以為圖且謂不宜使清時有遺才力薦之當路諸公以君深於易通陰陽家言欲用為杭州教授君笑曰吾以布衣締交相國榮孰大焉持此足以復吾親矣竟辭歸築山房摘李公詩語為扁名以見志公欣然遣以錢助之宣徽王公奉使江東過君山房因圖其隱居十景以去



其爲當世所重如此君嘗以母病籲天願減已年益母壽夜夢人語之曰有老嫗來當得藥明日果有老嫗來授以咽唾法而無從得寤君往乞諸旁近村民家還遇虎君駭曰我死不足惜如母何虎熟視遂巡而去集賢大學士陳公言是家母爲節婦子爲孝子宜旌表以風四方事下有司署其家及里門皆曰節孝國朝繼人得旌表者自君母子始其後君有母之喪走京師乞銘於閣學虞公以葬張蔡公時當國問士於韓公式以君對且要與俱詣公恨相見之晚即欲擢實館閣君以葬母辭公知不可奪則爲詩以送之終喪復至京師通謝前爲銘及哀挽者趙魯公在中書素善君卒欲用之集賢亦舉君爲儒學提舉君嘆曰吾親在且不仕今尚須祿仕邪遂去入玉蓮山中構精舍將老焉故人完顏君守贛奉幣馬迎致郡齋居歲餘俄思歸艤舟未發適值始生之日飲而歡抵暮疾作旦起奄然而逝至元三年八月九日也享年七十有五贛守爲具衣衾買棺以斂而二子從行者奉柩以還卜其年某月某

日葬藍田山之原娶張氏前十三年卒子勇五人曰俊淮安屯田副提舉亦已卒曰晉有家學今爲徽州教授曰紹爲仲氏一鶚後曰勝曰芳女二人長適行金玉總管府知事汪洪次適俞榮孫男五人女三人君性疎曠好客不厭處鄉鄰有恩不喜言人短而常推禍福成敗之幾開人爲善其在京師所主皆朝廷重臣每有所諮訪未嘗出一語人所薦士亦不以爲己德累朝元老臺閣名公至於卑官下僚新進之士無不與之交其死也無不悲之潛竊觀昔人去就之際出者或未能無累於物處者或專務使影響昧昧不聞於人此二者皆過也若夫進不徇人退不絕物如君者善辭矣而潛安足以知之姑據狀所述爲之銘以紓其嗣人之哀思云爾銘曰  
士之懷才難得者時逢時之來患莫已知亦既有時又有知己胡有不爲而止於此處非吾介出非吾通自信不疑卒蹈厥中發揚在上其藏在下銘以昭之用慰來者



張隱君墓誌銘

揭文安公

宋南渡時有婺源張珪先生天下之孝友人也嘗有鄰人無故醉罵于門其異毋弟怒逐去之是夕隣人死明日有司捕弟急毋號泣不食曰必殺吾子張珪先生慮毋之傷也以身代弟就逮韓蘄王聞之辟幕府而去其籍後人名其所居曰昭義坊朱文公所稱四君子之一也其後百數十年有隱君子焉名桂字南榮自昭義徙居東溪之濱好讀書鼓琴善生產作業數應進士舉不中曰進士猶博爾博之勝負何足少多遂棄不為事重親以孝聞尤善事繼母如事其母涿郡盧肇按察江東南康燕公楠參政江浙皆折節下之每欲論薦以母老辭行省辟抗校官亦不赴唯日與賓客坐蘭坡之上援琴而歌音冷冷裝徊於蒼松翠竹之間倚墻而聽者不知有人世也遇梨棗摘袖之屬熟則就樹取以啖客客或笑而自取雖多曾無悞情有軍帥者思欲一見君使數至君不得已而往見之及門帥方瘡作聞君至急延入臥室語良久為之其

瘡明日瘡復作延入曰願一聞蓬萊妙音君為一鼓作飛僊環珮之音再鼓為秋風亭臬之曲帥醒然作而謝曰吾病去矣自是瘡不復作大德十一年正月朔夢行曠野中見一道士危坐石上意必異人也前揖而問曰吾壽幾何道士曰汝壽七十逆數一十一覺而曰後六年吾其死乎蓋是歲君年六十一皇慶二年十月君果卒某年月日葬于舟陽鄉深坑之原其外弟王儀邑之賢士也數欲狀君行弗忍也既狀而死儀之友王堦致君之子之意求予銘乃次序其事而為之銘銘曰惟南榮氏士之球琳曾大父默大父繼啟父曰應發世表儒林配江子燾德盛家肥程梧汪璉二女攸歸子復有子伯曰文在武仲季斌三鳳噦噦亦有朱淇寔為孫婿琴在人亡寧不興喟伯牙絕絃傷無鍾期伯牙死矣期在何為右揭文安公為此銘時文適自單懷入京在坐公問成至正壬午之春三月也後十有五年文奉詔來江南會先生之孫無存者矣猶幸安公但據狀而作而狀之作則在至治其志如其口授而書



正也吳才行腹美能世其家至

蔣市監宗元傳

程駁南

蔣宗元字善卿徽歙縣人唐歙州通判莘之裔也父世選蚤卒事母至孝魁梧木強有志氣從兄熹甫入京師懋遷為業時年尚少心計頗敏能辨物精粗相時利便賤入貴輒出中機會往往大獲雖老於市者莫能與之校然執義慷慨好施予貧負逋者不深責市人非理相干小者讓大者抗正色直言無所回互而中心慷慨忠厚不訐人之短不報人之怨與諸昆弟族人同財無纖毫私以是益見信重諸公貴人多折節與交若前戶部尚書廉公亮今尚書丁敬可故河南參政焦孝先淮南參政趙伯器今司農少卿賈得新刑部劉仲素諸有名士皆其知己也兄熹甫從子淮卿已得官去諸公引宗元使仕不可會京師歲大侵宗元發粟以賑餓者朝廷嘉之強畀之官宗元曰吾厭世人皆欲做好官不守廉節即官我願得一下職眾所不欲者以自試乃授莘市監宗元

欣然就職群少年賈胡宿蠹以宗元南人卑之蠶牛為姦利宗元縛其渠詣戶部戶部直宗元械渠徇諸市杖而遣之令宗元曰凡若是者其執以來郡少年大駭歛迹不敢窺于市潛伺宗元所為皆公無私相告曰是監不可犯也竟三年無陸梁者代滿之日市民商旅以頂戴斗焚香而拜于門者相屬父老歎曰自右市監未嘗見也遷秦州務使以隱疾不赴至正中家居京師日與故人長者相過從彈碁飲酒為驩無復仕進之意矣又築立本堂于江南故居黃山之下將以歸老焉翰林侍講學士揭文安公為文以記之朝之士大夫播之詠歌四方傳誦宗元次於諸族人親戚為長顧左右皆其從子孫行受約束嚴憚莫敢自縱治貨殖率以宗元為師歲時燕集宗元必至坐上坐長幼更起奉觴跪拜為壽盡歡極醉乃罷然以疾故閉門臥不多出子一人初蔣氏大族多富家宗元獨孤貧小屋數間茅茨母子幾無以為生夜鄰舍火宗元度不能自救挾鄰舍傭出其二女子火大熾房室皆焚燬四圍竹木盡



集而宗元之居獨無害若有鬼神護然鄉人驚異以為宗元事母孝故得天之佑後必昌達果如其言

程生曰善卿在諸將中最後出而卒居其上觀其所成立天性孝義豈繇學力哉不卑小官以能自見一時名卿大夫士亦自以為不可及世言東南地勢絕高俯視杭宣池饒諸郡有崇山深泉峭清多奇士秦漢間數稱列仙梁程忠壯唐汪越公皆死為神至今血食宋朱氏道學冒天下國朝汪良臣號鉄面御史布衣鄭玉隱師山今天子備玄纁遣使聘之下此者磊落不可勝數豈非風氣所都邪

許處士不墓誌銘

揭文安公

至順元年予以奎章閣授經郎與修皇朝經世大典新安程文實為史屬嘗言所親許氏有賢子出後於汪汪氏育之有恩教之有道許氏子亦事之有禮又慈予孝一不知父汪子許也及汪氏父母死汪氏之族立其同姓子為後許氏子曰立同姓禮也吾其歸奉許祠乎乃歸許汪

氏寸田尺宅無所幸遂以字取汪之右許之左合而名之曰許而字元思既奉許祠又別祠汪氏父母以報之德且以許出睢陽太守遠復建睢陽祠歲立春率五世以下子孫敬祭以始遷之祖配仍割田以奉祀事予與歐陽少監玄陳助教旅皆為文以述其事後十年予以集賢直學士家居程君以黃竹巡檢秩滿馳數百里會予里中問許元思何如則程君之行政以為許請銘故相對於邑乃發書讀之許新安婺源人也故盛德之後宋紹興時其高祖琳嘗活饑民萬餘眾朝廷旌之曰長者長者生贈朝奉郎大寧與魏文靖公為友朝奉生日卿月卿皆擢進士第月卿初授濠州司戶辟呂文煥幕以剛直忤呂呂欲殺之不得而殺其僕遂不復仕晚乃起為江西運幹以文章氣節聞天下有百官箴行世日卿揚州六合尉六合生允芳娶程氏皆以德行儀於鄉是生元思元思之學宗伯祖而敦重守法度元思之行本長者而力所及無不為延祐賓興賢能乃大治毛鄭及朱子之說以繼先業有司舉進士試



則以經未明行未修謝不敢欺七年而仁宗崩遂輟其學蓋傷之也既  
不取進士乃大築室長者故基中爲晉德堂以繩祖武左爲琴棊軒以  
復五世祖之舊蓋朱文公內弟程允夫所爲作記者右爲靜學齋以諸  
葛武侯自厲日危坐其中諸家政雖妻子不敢關說人莫知其意然自  
元思之歸許也子弟有終身之師賓客有忘歸之館隣里鄉黨無餒死  
之民無不舉之喪無後時之婚嫁陸無危道水無病涉人之戴之若父  
兄然後至元五年八月十有三日竟以疾卒年五十五自元思之喪也  
人皆曰君子死必有可法吾於是觀焉自元思之喪也夫人雖哀痛不  
夜哭子延壽延年面墨骨立行若思坐若遺哭泣多時孫師範嗣文蒙  
正禮降父一等而哀戚亦如之人皆曰君蓋能以身教者矣嗚呼元思  
庶幾有始終哉有季子一人曰延齡早卒女一人嫁張榮祖孫女二其  
葬也以至正二年十一月十有六日兆在沈村之原銘曰  
惟許受氏秦嶽之後循源之流有堂必構睢陽之忠長者之惠運幹之

節元思之義前既本之後復濟之惟其訓之是以順之我思元思蹈德  
執禮匪伊人只曷伊懷只

見山居士程君峴墓誌銘

管子瑜

至正甲午仲夏之五日休寧程君和卿觴客于所居之見山樓距君始  
生不一旬甚樂後五日君以疾卒衆爲之駭惜弔哭甚哀君之子思齊  
奉其塾師金伯明先生所爲狀泣拜請銘予不佞司教休寧所往還若  
君蓋不數人而君已矣義惡可辭邪按狀君諱峴和卿其字也所居曰  
陪郭故休寧縣尉諱隆之孫永盈庫副使諱忠甫之子方乳而孤母汪  
孺人以節自勵躬教育之然君亦闔爽秀發知自立以副母志稍長從  
學趙可齋先生及叔祖提舉孟敷讀書史務究知旨趣爲文亦純雅不  
事雕飾嘗一上秋試弗利遂棄去不復學曰亢宗豈在祿仕哉日具滄  
瀛率妻孥以奉母母安其養事兄仁卿如父每事必咨而行怡怡之風  
整者愧服縣尉公當國初嘗傾貲以解屠縣之禍家以中否而副使君



早世君竭力經營十餘年家道載興九田之被斂與先墓之見侵者悉  
追復之乃置祭田合族人建亭始祖墓下題曰末思具條約定儀則爲  
又計朱允升先生實記其成君以本宗出梁將軍忠壯公後且與伊川  
先生南渡子孫通譜互繼而譜未之續也會宗人歛西教授傅巖閩川  
官使樂齋及會里孝隱翁天經以口處士可大參考訂定爲程氏世譜  
三十卷又約爲程譜提要二十篇其末論治家之道本奢儉以爲興衰  
由婦言而生和競諄諄懇切讀者傾竦君爲人喜交游敦信義吳興唐  
君棟金陵楊君翮爲令簿率禮君或以疑政相委君每辭不應於所居  
作樓甚壯麗題曰見山日與名流吟眺其上自號見山居士而人亦以  
是稱之其中高清曠內行醇謹真無愧古所謂遺逸之士者歟君生至  
元庚寅仲夏之十四日享年六十有五配戴氏先卒繼吳氏皆有賢行  
子男三曰思齊曰思誠曰思禮孫男八曰光曰文曰高曰勝曰章曰同  
曰龍曰安君墓在縣二十五都西源金石塘銘曰

早孤而振厥家爲自子終隱而善厥鄉爲古士執素以傾軋弗齒君  
蓄孔多尚利其嗣



新安文獻志卷八十九

行實遺逸

祁門李君 與案墓誌銘

黃文獻公

君諱與廉字子常姓李氏其先唐宗室廣明之亂避地東南至歙之黃墩兄弟三人析為三族居祁門字谿之盤由者曰鴻若始祖也十世祖秀有子六人六子而下兩世合百有二人後益蕃衍遂為其鄉之望君曾祖諱俊祖諱聖任父諱如深因所居以為號曰盤隱宋末干戈未定之際里人皆賴以安母熊氏君於兄弟五人中最幼熊氏出也生而秀異既長躬行孝悌侍父疾衣不解帶者三年父沒四年而母亦歿君親之喪動必以禮俚俗誕妄不經之說悉屏去之昔先廬以奉其長兄而別為諸兄築室乃依山結屋而居焉長兄信池之青陽往省其疾越翌日兄卒其長子甫四歲次未辟奉寡嫂扶護其喪以歸次兄繼卒而兩庶兄亦卒為經紀其家事曾無彼此之間祖墓世遠多蕪廢率族人

石集



訪求而表樹之割已田若干畝立祠於十世祖墓而刻其譜系陷實壁  
間族人有子孫貧乏徙他郡而人竊賣其墓地者有夫婦俱死子幼而  
人竊賣其田土者悉爲出力盡復其舊外舅姑沒撫其二子至於成人  
又皆死爲立後而葬焉諸姊來寧而沒者則爲治喪而育其子嫁其女  
從夫遠宦而老且病者則迎歸而爲其子納婦俾職奉養夫與子俱亡  
而無依者生則養之死則葬焉其篤於倫理類如此君與人交無親疎  
各盡其情然剛直尚氣節臨事果敢歲饑民相率盜取人粟長吏庸庸  
畏憚託故避去君以爲稍緩將滋蔓而爲亂奮身勇往擒其首惡餘黨  
皆駭散因出所儲以賑其不能自食者人尤以是稱之所居有澗水出  
兩山間架石梁其上以便行者暇日則治東園蔕花卉作亭其中而於  
其外疏泉爲池構屋其上乃日與賓客以觴詠相娛樂不知老之將至  
也君平生最留意於大學衍義之書蓋有志於致君澤民之事矣慨念  
兄弟惟已獨存不忍遠去其親嘗親終服闋遂無復仕進意將終前一

歲語其子曰爲人子者孰無雨露之恩我旦夕且死其割田二十畝歲  
取所入給汝祖墓祭自汝祖而上歲時裝省不可廢也越明年春分家  
祭君沐浴更衣饋薦拜跪如禮祭畢而飲福至三爵卽命徹去若有不  
樂之色坐至夜分左右請以休乃入就寢席未溫而形神已離君生於  
至元二十九年正月甲寅卒於至正七年二月某甲子享年五十有六  
娶吳氏有賢行後君五月卒子男一人曰元孫男三人續綽總女四人  
以某年某月某日葬于向里石壁心田之原君初延致趙先生王先生  
而與爲師友旣又聞滕先生會朱陸之學而得其同時君年已四十率  
朋從往就講習焉建閣藏書將增廣以爲義塾志雖弗遂然與君游而  
接聞其師友之緒論者處則以善其身出則能以才自見君未始有德  
色也君旣葬宿昔朋遊之士念之不忘於是王君堦以狀來謁銘于衰  
病之餘久去筆研顧念其舉也以義請也以禮不得卒辭銘曰  
李氏在唐國之近屬散處東南爲三大族君生盛時不行而藏仁興于



家善遷于鄉詩書之澤覃及士類是亦為政豈必在位不居其功以遺後人孰為可徵石有刻文

草庭程先生鼎新墓誌銘

曾悔中

婺源北七十里有山嶷嵒其下為三溪里清源程氏之族世居之諱鼎新字晞說者篤行君子也是為草庭先生守同守是州到官日淺其風土人物徃徃未甚知而獨君之名日聞比至其鄉見所謂嶷嵒之山峰巒岿翠盤踞數十里是宜有異材秀士出於其間者雖不及識君蓋已知其人矣居無何而君卒其家以君行之足書者乞予銘新安程氏自忠壯公以勳業顯於陳十三世孫湘為唐檢校尚書始遷婺源之三溪里里之程氏皆其裔也君曾祖天益號友于祖中宏號肅軒父特震號南溪君娶張氏二子元端元理君嘗以二程夫子之先實出新安倡鄉人祠之學宮以風學者所著有隋筆葉復葉學葉讀書會見講義二十篇嗚呼若君其古所謂鄉先生歿而祭于社者歟銘曰

生貴遠達由命式究其行死貴名名已傳其或未賢行既篤賢有譽歸說父何嗟乎不遇嵒之陽封若堂吾銘其藏視萬古其茫茫

伯會先生汪君會行述

程黶南

君諱會字伯會姓汪氏徽之婺源村村里人世業儒徽在隋唐間為歙州其先有諱華者以才武知歙宣杭睦婺饒六州軍事隋亂籍其地與民歸之唐封越國公死而為神至今廟食不絕子孫最繁感居人汪氏十望八九始居苻村里者諱集距君十三世矣代有顯人君之曾祖諱之和祖諱彥得父諱彥卿連世不仕宦而彥卿以儒大有名於時學者稱之兩舟先生云君生而穎敏讀書一覽即暗記十五六時出與里中少年才士結交皆指目異之君亦意氣自許是時國家定江南未久士失其業而君家故貧里中又當孔道數經兵火兩舟先生性淡泊雅不事產業至無資借屋以居又好賓客君百計經營以奉菽水不使其親有一毫不足之憂兩舟先生晚多病客屢及門延話每移日修治藥物



具酒饌應無虛刻皆自君手或竟夕衣不解帶兩舟先生與夫人鮑氏甚安之亦自慰以爲有子也壯嘗買舟與商人出番陽過九江望荆湖之墟懷然思親而返遂專意於文學學益肆尤長於詩里之大家爭相延致使子弟師事焉君亦不屑屑得意樂其久則一就之意不樂非其人即舍去雖厚幣不顧也方科舉之未行也學者以辭章相高君與同里許小山飛騰叔野全祖汪又善先生俱擅名當時時人目爲四雋及科舉行始欲奮筆以取功名連試連不得志有司乃曰吾志豈不如古人吾命力不如人遂潛心經術稍變其舊業而一趨於周程張朱之學不切切於章句亦不汲汲於場屋有自得之趣焉見世儒好著述者病之謂其剝塞穴道及使先儒正大高明之說鬱鬱而不彰曰周公以後難言禮朱子之前可註書論者以爲雖有所激亦名言也君既卜築浯溪之上頗治田園以自娛賦隱居詩九章四方傳誦之家有橫經之堂林木蔚然人號橫經林嘗與許飛許許九日登牛丘山峭崖長嘯人

更號其山爲三子山其見慕如此集慶南臺所涖郡學六齋生徒尤盛非才德重碩莫宜爲之師君在吳中有以書幣迎君君至坐上齋從容爲諸生敷繹經義申規更約以類授業未數月六齋翕然尊信之御史郡縣長吏里巷老人寓公過客莫不稱其善是時君之下幼鳳先以進士貢春官出爲采石書院山長固迎養君君亦念諸孫欲歸教之遂如采石留久之題詩壁間以示志遂歸至正七年某月也明年七月八日年六十有九以疾卒于正寢君方疾而召醫醫數輩投藥不效旣而揮藥去不飲曰年老求活何鄙也因正席而臥越六日日正晝或見有白氣如練自身騰上須臾卒君倜儻夷曠過人恒疏目簡節而篤於大義母弟二人季弟弱冠得心疾君盡力視療躬抱扶盥沐不懈嘗舟過饒之德興因省其氏姑適姑家疫鄰人戒勿入君曰親親之義不可棄也即訪醫求藥以進之信宿而返姑家疫尋愈君亦無恙從兄無子而弟有子留淮且死屬君曰必以淮姪後我旣而利其貲者強起爲之後君



不聽卒迎淮姪歸以成死兄之託外家鮑府君無後君求為立後不得  
歲上其塚墓時節設位以祭之賓客至不問家有無傾倒欵洽極歡盡  
禮乃罷與人處嘻嘻善談謔無町畦或有過面責之不知人服其平往  
往有鬪爭是非者皆來求君自直解去無所恨其卒也雖疏遠哭之如  
至親平生為詩文至多輒棄其藁哀諸朋友中得散逸若干卷藏于家  
君娶同邑戴氏女有淑行先君二十六年卒于男四人皆有才學長伯  
麟次仲虎次幼鳳次無數無數出為舅氏後女二人長適同邑程顓次  
適俞福壽孫男八人大有少有東有大有舜有我有西有大有女三人  
以其年月日卜葬于鄉之環珠里環坑源予與君先世故有連君弟視  
予予嘗共君讀書許氏之見雲菴是時君之子未學也予入京師數年  
歸而君魁然為儒先長者諸子有以進士舉者矣予嘗謂君才氣磊落  
當見大用不恨遲暮而竟委棄如是抑將大其後邪君卒之二年諸  
孤因里人呂君誠舉進士來京師請述君之行將乞銘刻墓上以石且

曰諸孤寒微方自念何以得當代名公大賢一言以為先君重有胡默  
先生者來言一夕夢先君求筆問何筆先君以朱書廷心北筆四字于  
壁覺而莫曉其故蓋先君嘗遇今浙東僉憲余公於采石舟中辱與論  
詩先君未嘗意先君有知其啓諸孤以是乎問之胡君而信嗚呼生而  
學不得用於世死而神通於人亦異矣哉乃為叙次梗槩如右以俟立  
言君子擇焉

洪府君 味卿墓誌銘

程顓南

歙之南有大族洪氏予所銘者味卿府君之墓府君諱洋字味卿世居  
王千里其先十八代祖政自睦之遂安徙來至今環里中數百家皆洪  
氏無他姓府君之父諱雷韞以擒績溪山民之首為亂者為黃竹慈湖  
兩鎮巡檢比改官卒祖諱儒當至元初王師討叛將李世達儒以家財  
具牛酒迎軍皇額關主將嘉之辟令歛辭優游以壽終稱長者曾祖諱  
範宋處士府君生有大志儻好學為群兒豪稍長能飭斂代父巡檢



君持家凡調度酬應官府鄉閭出內錢穀之事具有條緒巡檢君賴之  
隱然爲一族之望矣巡檢君卒事母吳夫人益謹歲時節序盃酒堂上  
率婦子弟姪拜舞爲壽莫夜懸簾張燈笑語款洽吳夫人雖或至夜分  
不寐親嘗樽相勸美黜陰陽家言舉兩世四喪費皆自己出還仲弟復  
之出爲伯父後而生產素薄者于家同食與衣約與均財撫季弟英寡  
妻弱子使有所成立聘名師教子斌聞婺源胡君默之賢卽迎至家躬  
率子姪師事之胡君者跌宕不羈奇士也或夜半燃松明登山聽泉或  
祁寒着屐臨溪上翫雪少不如意輒求去人指以爲恠誕府君愈益禮  
敬不敢以主賓故與鈞故胡君樂爲之留斌學之成胡君力也素好賓  
客東西行過其廬者一以禮意傾之人人自以爲得所欲常養厩馬數  
匹以給迎送客至如歸初避宋末兵亂移居覆船山下逮府君始奉親  
還宅故址鄰大道云年四十又於宅東數百步規園一區決泉開涇手  
取住花美竹槐柳果蔬雜樹其中休則誦詩讀書以詠歌聖賢之道曰

用世非喜事也吾將老是焉已天曆元年四月十有五日以疾卒年四  
十有六府君平居辭氣嚴毅少許可人有是非曲直一處以公鄉閭訟  
爭者多詣府君求直其有私爲不善者輒相語曰洪公聞之寧無媿乎  
自府君之沒里中訟爭紛然強暴相陵弱寡不能伸一喙人始嘆曰安  
得復見洪公以白吾心也府君沒事有所欲爲與爲而未竟者于斌皆  
能成其志卒爲之娶同邑鄭氏女生男一人斌也女二人長適績溪高  
若泉次適鄭夫人兄弟之子元秀孫男四人華生善師萱慶慈壽生以  
卒元二十年正月十六日葬以後至元元年閏十二月十九日墓在里  
東之慈溪烏山後十有三年斌以鄭先生玉所爲狀來請銘予固辭斌  
固請拜且曰久願有待也予悲其志讀鄭先生狀謂曰子之先君子才  
足以用世局於山林之下無能知而起之者得鄭先生而益彰鄭先生  
狀約而文質而信予不能易鄭先生一辭乃綴之以銘銘曰  
一石之美遠或致之一木之良小或器之士懷奇抱異而世有不及用人有



不及知赤兔在野驚鞭而馳蕭敷艾葉委彼蘭芝天者斷可識而人者誠可  
悲嗚呼百世之下慈溪之上有式車下馬而過者非府君莫荷我銘其碑

處士黃公 考則 行狀

趙雲志

公黃氏諱孝則字誠夫號德菴歙之衮繡鄉人十六世祖璋自祁門左  
田徙歙西九里號黃屯曾孫茂唐孝子名見史傳後黃巢之亂舉族避  
兵渡溪北墓側居焉至公高祖邦俊曾祖慶長祖淵世有隱德父大受  
母程氏公自幼聰敏器業過人初就塾師大奇之長觀書悉能通大旨  
十有七歲父卒兄孝善亦蚤世獨奉母撫其姪金聲不幸又喪撫其姪  
孫泰俾成立俊聲日起由是鄉之事無巨細咸推公主維有訟者必先  
質之公正其曲直或相責而退或相諷而返里有父言子不孝者公告  
戒警諭父子感泣慈孝終身宋末李銓為徽州招討使公素與善欲辟  
從仕不起丙子夫朝兵至城附銓遁急女幼不能負以托公諾之撫訓  
成嫁之與已女同至元庚寅歙潛口松源等處盜賊並起居民駭散公

撫諭一鄉獨安避寇者多依焉監郡馬思忽公總兵來討公醜酒勞軍  
力言玉石不可俱焚遂留軍中擒其渠魁凌六乙而返餘黨復肆猖獗  
議進兵屠之公復諫曰殘寇未悛當諭之恩信示之禍福使其來降不  
降誅之未晚監郡感其言遂給招安旗幟命公單車入其營賊見之以  
爲官軍至播鼓進兵欲刃之公下車正色自道姓名曰汝元惡伏誅更  
復何爲吾念汝良民不得已而從逆今領將軍命至招汝來歸汝若改  
過當全汝父母妻子安業如故汝若不悛官軍復至無唯類矣賊知公  
名德皆羅拜曰更生之賜敢不聽命遂投戈感泣率其黨二千二百人  
各携妻子來降拘其器械數千納之官各鄉之避寇而他者皆復田里  
賴以安全監郡公議以功授巡檢使撫降民公笑曰吾豈屑屑爲此者  
辭不受時江淮行省委前徽州路總管許楫宣國權茶使司木八刺提  
舉到郡招諭歙境已平上功都省除命未下而公卒元貞乙未閏四月  
二十三日也年六十一男天麟有才德後公十五年卒孫儒壽觀壽長



省署有為程縣校官次從師曾孫塾亦幼慧類能世其家者公嘗營菟裘于所居之西北曰葉平以大德丁未二月奉匱歲為其右以公之室陳孺人附孺人進士夢松女儒家也既歸公事舅姑唯謹撫男女有恩待物寬和持身慎約後公十八年以皇慶癸丑正月二十一日即世女名友弟適許鵬南亦儒家子儒壽兄弟將乞銘于世之大手筆以若惺知公為詳俾狀其行自惟涼薄語言不足動人文辭不足乎眾屢謝不置叙其梗概以慰稱揚光美之盛心而實不足以盡之立言君子更詢里中耆舊則庶幾矣延祐五年十月 日里生趙若惺狀

鮑仲安元康墓表

鄭師山

仲安諱元康子友鮑景曾之子也予與景曾交時仲安方讀書家塾未嘗與人接予又以負薪之役奔走四方不遑家居故仲安未予識然仲安勤於讀書自經籍外諸子諸史以及山經地志岐黃醫書孫吳兵法與夫佛氏經典神仙家延年長生之說無不研究而尤以脩飭行義為

先及予終養優游林壑以故人子弟來從問學一見即曰前所學者皆誤也吾今而後得聞聖賢之正學矣於是月從事於五經四書而尤盡心於易日讀一卦周而復始玩索有得輒筆記之且曰上下繫辭夫子所以翼易程朱之說嚴謹簡略蓋引而不發學者宜盡心玩味使與六十四卦三百八十四爻相出入字字有所歸宿方為有得嘗語人曰自吾從先生游於體認道理識所謂活潑潑者於應事處變得經權之說焉景曾晚年仲安尚在幼冲已能出其智謀佐其家政及景曾之故仲安既除喪即曰先人勤苦起家蓄積有餘以及人况聚而能散禮經之善教也元康敢不力迺以其歲所入十分為率三分以膳老幼與凡家用三分以供公上貢賦及官府百費二分積蓄以待水旱一分賑恤族黨姻戚鄉鄰自親及疏各有等差又一分貯之別所以待親友之有患難者隨其輕重量力周之遣嫁孤女收養孤子義之所在知無不為休寧有務官以虧課粥二女陷倡家百計求贖之使復為良設立社倉



時其出內以濟里社之貧乏弛其息不取又嘗欲置坊局儲善藥以救疾病為不樂善者所沮朱文公舊有祭田百畝為族人之無藉者所盜賣朝廷既立文公之廟于婺源訟之有司數年不得決官民交相詬病景曾嘗語仲安曰他日稍有贏餘當以其價予民而歸其田于廟至是仲安追思景曾之語弼其材木之山得錢為中統鈔者一萬五千餘貫而文公之祭田始復其他濟人利物之事累數之不能終事母程夫人尤孝謹求新鮮於山澤取珍異於蘇杭時其食飲體其溫清無不得其志焉至正十有二年二月紅巾賊至饒州仲安與鄉人集丁壯結保甲捐財出粟以供費用及賊至婺源知官軍皆敗走度民力不可支乃藉鄉里之貧者計口給粟使携老幼入山逃避四月郡城陷賊購予甚急予將死之仲安謀於諸生曰家破可以再營先生死世豈可復得吾將傾家以解是難乃使其從子深與吾弟璉以計行賂諸賊予始得免九月大軍克復仲安與深璉首起義兵應之出入山谷勞苦成疾病且革

澹語唯云殺賊十一月十日卒年四十有四吾邑之人遠者奔赴近者  
外以待卜葬越三日賊復至家遂燬焉樞獨無恙人以為積善之報仲  
安天資高卓識見過人自其幼時為學已與流俗不類及從予遊講貫  
益精踐履益篤乃率同門為予築師山書院聚學者而肆習焉予方將  
以講授之事屬之仲安仲安亦將有不得辭者而遽死也豈天喪予乎  
天喪予乎乃余其梗槩立表墓上以識予之所深痛云

鄭府君以文墓銘

王忠文公

歛有隱君子曰鄭府君既歿之十有八年其子德裕始奉執友唐君桂  
芳所為狀以銘來請德裕之言曰先君子德有以成已而壽不及艾也  
才足以用世而名不及顯也惟是葬且久而墓上之石猶無文以刻先  
猷遺懿將無以暴於後世不肖孤之罪何以辭今幸獲交於執事不朽  
之託竊願有請也予惟自昔君子負其所有生不克表著於世死因泯



泯而無傳者衆矣今德裕獨能圖其親於不朽其可謂孝矣迺閱狀述其所列與德裕言合且唐君其鄉先生也爲言尤可徵則爲按狀序而繫之銘府君諱以文字彥章鄭姓世爲徽之歙縣人曾祖南鳳宋迪功郎江東提刑司幹辦公事祖申道宣教郎父昭祖元奉訓大夫江淮等處財賦都總管府副總管奉訓公先娶許氏生二子長曰淵承事郎平江等處財賦提舉次曰深再娶羅氏宋朝列大夫龍圖閣直學士吏部尚書汝楫之六世孫奉直大夫新安通守鼎之女生于二人長即府君也府君生而凝重狀貌偉然甫七歲氣象如老成人讀書過目即通大義爲詩歌語出人意表奉訓公愛之甚延名師訓教之常曰此真吾子矣不幸奉訓公遽捐館承事君方時京師縱橫金以結客父留備宿衛而深又蚤世於是府君獨奉羅夫人理家政內外井井有條遇事應物隨其鉅細急緩處之若絲理柳比不少紊年餘歲積三之一以振貧乏鄉黨宗族稱其厚德無間言而產業視舊日益加承事君之家食也

治園池構亭榭日與賓客盡觴絲竹以爲娛府君左右承順得其驩心而羅夫人春秋高且寢疾久府君奉湯藥惟謹夜則稽顙北辰願減己年以益母壽及居喪哀毀骨立人有所不堪撫承事君之子咸有成立女各得所歸其孝友純篤有如此府君識度明朗氣和而行夷雅不嗜仕進而樂從賢士大夫游與之游者咸服其德器自謂不及也至正癸未郡府列其行義上於行中書南行臺揚公衍飭曹公復亨皆名御史也復劾薦之當得官不報壬辰之大盜及其境以物色求之將強之出府君憂憤疽發於背而卒十二月某日也享年四十有九元配程氏浙東官尉副使相之女繼室吳氏子男二人長即德裕次德堅女三人適汪誠程輻戴琥葬以甲辰十二月某日葬在寧泰鄉小干山之原銘曰有豐以殖之孰奪而嗇之有振而擇之孰闕而抑之吁嗟乎維命實職之施之獲之子孫其食之我銘以勒之過者式之

南雄路儒學正白雲先生唐公桂芳行狀

鍾啓晦



先生姓唐氏諱桂芳字仲寔學者稱白雲先生其先始祖諱承明京兆人從宋高宗南渡爲新安太守子孫因家焉曾祖諱廷雋宋登仕郎祖諱虞治周禮以待補出身由婺源嚴田李氏繼登仕後配程氏無子側室有子二人長諱元字長孺號筠軒即先生考也博學攻古文名重于時徽州路學教授致仕妣徐氏端重柔淑爲閨門楷範先生生於戊申正月三十日甫十歲授業於鄉先達杏庭洪公潛夫之門日記經史穎悟絕人每篝燈夜讀喜伊之聲達旦雖隆寒盛暑疾疢不爲之輟教授公愛之甚每夜分以杖叩閣戶曰汝休矣勿過於勞也年十五待教授公游吳庠受毛氏詩於錢公水村龔公于敬卒業而歸期待之甚至弱冠貢于有司不利客金陵轉明道書院司訓再聘司訓于臬庠一時名公碩儒若李公青山其二子伯羽仲羽楊公志行丁公仲容李公晉仲陶公主敬接識之頃莫不器重之而高確詩文咸加推讓後主句容杜叔良家塾監丞御史楊公弘正以文行薦闕南教職御史曹德昭復催

舉遂擢建寧路崇安縣教諭始至生徒星散學宇傾圮於是重修孔子廟庭建齋舍秘書彭公炳元亮爲紀其績築杏壇自爲文以記之時右丞烏古孫公良貞榦卿僑寓崇安深加器重開東閣以延之而右丞子燁平章吳公可堂姪琰御史王公德美子通御史朝用子伯顏不遠千里從游講下師道嚴肅諸生雲集翰林待制杜公清碧擅知人鑑嘗曰內附以來崇安教官當以唐公清才懿德爲第一人以滿代去御史安公止善再舉入廣選銓南雄路儒學正未赴丁內艱先生居二喪哀戚號泣毀瘠若不能爲生嘗以報親未足買田附祀於西山庵又買田構祠於藤源以奉祀事未幾壬辰淆亂斬黃盜起挈家奔竄老幼匍匐僅全性命而已丁酉秋我朝龍興平定海宇

天兵東下而歛之版圖先入職方氏戊戌

太祖高皇帝駐驛于歛訪問耆儒而僉院鄧公愈以朱升唐仲實名聞召對稱旨有尊酒束帛之賜事載實錄鄧公嘗以禮羅之俾掌儒學



秋丁祀事牲醴蠲潔禮儀嚴整值三獻未終知府魏公均祥飲福受胙而悍卒遽攫其肉以出先生惡其瀆法盪禮立殿階上朗讀糾劾之文左右莫不震懾爲先生危而鄧公尤加敬焉退居槐塘上爲宋故相程公元鳳之鄉授徒家塾買田築室廬以爲終老計所居之園前列三峯乃扁其居曰三峯精舍提刑按察司僉事三洲陳浩記之舊文僉事喜山公行部下車延見相與叙話時昔酒酣先生大噱起舞太守李公訥命繪爲圖葺私謚晉淵明爲酒聖陶先生唐王無功爲酒賢王先生自稱酒狂唐先生凡歲時令節先生以圖像祭享設酒漿陳俎豆舉觴浮之不至沉醉不止或披衣哭泣歌笑以自放識者以先生有托而逃蓋佯狂云門人呂旭特著以傳于時居無何駙馬都尉王公克恭太守魏公均祥俾攝紫陽書院山長先是書院在南門外燬于兵燹先生謀度地移建於東關縣學旁凡士林中勸相木植瓦石構正祠三楹兩廡于楹門屋三楹中肖文公傍肖西山勉齋以配享焉宋理宗朝賜紫陽書

院四大字其二穹碑龜趺墮城濠中雖經兵革堯城垣而二碑巋然不毀衆以爲復興之兆也至是先生與初果驗戊申太守胡公善警同知何公翔卿禮延於紫陽書舍開講壬子千戶唐震朱興卜築於登瀛坊尊以師席訓其諸子甲寅夏復築室於烏聊山麓故居舊址扁曰文壽堂日以訓子授徒爲念雖蒼顏白髮而游心經史以自娛樂是年秋七月忽嬰下子夏左丘明之疾然而椎篇巨帙論議英發氣不少衰志不少挫毅然以道自任而不以育疾廢當時士大夫學者翕然宗之辛亥夏五月患腹疽之証伏枕幾七十日疾已小愈七月廿又一日申時子孫環侍作贊曰兩袖清風千里白雲蕭然而逝享年七十有三配江氏先卒三十年有男一人曰文虎以明經舉任四川瀘州江安縣丞秩滿調廣西鬱林州北流縣丞以疾卒于官女二人長順德適鮑添寧次愛德適張仲啓繼室全氏有男四人曰文鳳欽庠司訓以文學舉除江西興國縣知縣改 趙府紀善曰文麟曰文奎以能書徵纂修文淵閣送



吏部曰文楷孫男十有二人家慶江安家禎家興俊民永安保添民壽  
民信民祺民樞保牧民女孫十有一人長慶適汪慶師壽慶適潘某月  
德適程遇懿德適汪宗德淑德適汪討得靜德適程弋祖添貴適吳益  
閨秀適鮑某閨賢適吳綿遠曾孫男十有五人桐孫官孫實孫蕙孫芷  
孫佛蔭茂支希孫佛希茂端茂萱茂美榮孫茂英曾孫女十有二人以  
癸酉十二月廿又六日寔于孝悌鄉呂家林癸山丁向以全氏附先生  
身長六尺二寸美髯雙瞳如點漆面如紅玉氣豪邁老而彌壯雖遭  
困躋浩如也每富貴客廣會酒未酣清談娓娓議論風生座客傾聽不  
敢忤視人人畏服而尊敬之其為文一以氣為主辭嚴而理正及其成  
也神驚鬼愕意態橫出勃勃如春濤起涌令人歎賞其為詩清新流麗  
出語驚人而聲調格律鏗鏘瀏亮讀之琅然恆聽有武夷藁白雲集畧  
四十卷藏于家先生生平澹於利慾輕財尚義與人交洞見肺腑不事  
邊幅而性孝友最隆於教授公敬愛盡禮先生留金陵崇安凡遇生辰

嘉會必刻期而歸致遠方珍異異味以為親戚於諸兄弟怡怡愉愉克  
勤友恭於朋友危苦則朋誼之患難則扶掖之以協於義此先生履歷  
行事之大概也予未與先生之次子藩府交十有七年矣凡於議論之  
際文字之間得聞先生為詳而文鳳嘗以先生之行述未有能紀之者  
潛然以請予以僚友之誼不敢固辭文辭蕪陋固不足以發揚感德之  
萬一而當世宗公鉅儒顯而述之則有待也遂錄次其言為事狀一通  
以俟執筆者采擇焉未樂十二年歲在甲午春正月望日狀

自宣至數召故老者儒訪以民事有儒士唐仲實姚燾者不見  
上問之曰喪亂以來民多失業其心望治其於飢渴吾深知之仲實燾  
曰自問大軍去後民獲所歸矣又問曰節愈築城百城然乎仲實燾  
又問曰節愈築城百城然乎仲實燾曰此數君者皆以不嗜殺  
世祖此數君者平一天下其道何如仲實對曰此數君者皆以不嗜殺  
人故能定天下于  
主之公聖明神武兼數君之長驅除禍亂未嘗殺出民膏少措之於社  
席之上開創之功超於前代然以今日觀之民雖得所歸而未遂生息  
未嘗以此言是也我積少而費多所給于民甚非得已然皆為軍需所用



如堤岷不餓也蓋諱之仲實等拜謝乃賜諸父老布帛撫慰之而去

程先生平傳

汪容峯

先生名平字德正徽之績溪人也徽古新安郡程為著姓皆祖梁忠壯公靈洗簪纓不墜至平三十有六世矣先生幼失怙恃然稟性溫厚恭恕言貌恂恂與物無競鄉里稱之素與里人張德良友善武初德良坐監價事罹法呂凡百餘人而波及先生御史廉得其情喻之曰灑於眾則汝免矣先生起謝曰家世業儒非義不敢為平不幸為人所誣而又誣人欺天者天可欺乎寧以身待罪御史深歎異之尋謫延安與郡人朱仲杰偕行仲杰悍戾不以道相遇盛暑同休憩道傍樹下仲杰曰德正守行李我前問店乃趨酒家久不至俄暴雨水漂其行囊先生自救不暇仲杰還盛怒責償於先生先生如數償之不與校逮至延安仍與同處仲杰以醫自事梅百戶明年仲杰臥疾知不可療以其所有盡寄之梅曰必吾子至乃可付之既卒梅調守他郡仲杰死先生又

備棺擲衣衾而舉之或曰其人待子如是獨無憾於中邪先生曰彼自虧其德耳且與同郡而生同患難而來死無所歸於我乎殯聞者莫不歎服朱氏子德生以母命來省覲行至沐聞其父已死而囊篋又為梅百戶挈之他往中道還家給其母曰吾買地葬父于城東矣又出其所携衣曰此父遺物也越三年庚申先生子寔往延安省侍遂命負其遺骨歸績溪信報朱氏子令迎柩還葬德生怡然不復顧丙寅秋先生自延安歸知朱氏柩尚留殯後園不悅曰延安數千里尚為負之歸由績溪距休寧僅百里豈可九仞之山而虧一簣之功乎且其子既給其母必慚懼不來即命孫通為送至其家其接人待物存心忠厚每如此子寔字以誠亦剛直尚義有族弟以忠由河南來寧令轉知潮陽程鄉縣洪武乙丑以忠之子泰乙年稍弱屬寔與偕中途聞以忠因事繫獄借侶求回寔變色責曰汝父官所坐事正當捐生赴救舍之而歸獨何心乎借侶曰將如瘴癘何復叱曰但當力以赴援瘴癘非所恤也至潮陽



月餘乃還過文江果以冒瘴而殞年五十有一丁卯冬其子通冒風雪  
往奉柩歸葬通年二十二由邑庠升禮部試入監學  
論曰先生忠信人也古人有言忠信之人可以學禮孔子亦曰必有志  
信如其者焉夫忠信質之美者也由之以學焉斯可以為聖賢矣嗚呼  
急功利尚姦詐亦云極矣焉得有如平父子者之死不違信義者乎之  
死不違信義是宜作傳以傳不朽故為程先生傳

程氏國英墓誌

朱風林

士之立於世也莫大於報本善其親以及其族里達則施於一世斯可  
謂報本矣夫天地生我者也秀氣毓於山川慶源於宗祏而體託於父  
母斯四者有身之本也父母劬勞不忍言也已我之生也而立也族之  
人由親而疏邇而遠其愜我謂何妣祖之願於我者猶我之願於孫曾  
也存恤所以為不忘也顯揚所以為不辱也會是非顧念雖爵位屢朝  
著勛名滿天下可以不覲於族里可見翁媪於地下哉果無愧於天地

生我哉吾是以於里人程國英而有感也國英幼不好弄長而知向學  
既冠慕古人為壯遊商遊至滕薛城有任中丞某者致政里居國英  
事之數年道德之懿文獻之粹日有所得至正四年年踰三十南歸往  
役于縣縣宰唐子華名士也苦縣事煩弊不理歎曰安得一明快吏集  
吾事乎一日親國英於庭而異之與之語有契執其手以上曰吾事濟  
矣且使佐治詰捕事感英感激道不隱賢凡其學之所及而力可為者  
勉勉焉官若民咸賴之凡胥吏恒能官民所病者人不得以幾微疵議  
之也十二年勸黃女孫哥自是四五年間勝復者六七殺傷燬燼東  
奔西避所謂出百死得一生者而能間關委曲於勝復之間家之人無  
失所者里之人卒以保完無罹橫禍者風波既定縣之境內視平時不  
耗數如此鄉者百不一二焉故宅臨驛道既燬矣乃作新居於水東重  
屋面山正為屏樹名之方山樓居之右圃中有亭曰時止日灌蔬種花  
竹可憇也亂後有此可謂樂矣弟祐早亡孤遺三人長者亦不滿十歲



既成立之皆有家庭矣兵亂時縣之官有身罹禍而遺無依者二人亦既  
成立之矣新居且完祀有祠堂客有館矣里人之相處有禮俗供公上  
者有程下至爲舟以濟涉比皆有常惠矣於是郡縣舉之賢良以病不能  
行數月竟得終于牖下明年其子宗奉治命以葬以客陳鑿狀請叙以  
表其墓焉叙曰徽州休寧縣黎陽鄉懷仁里國英所居也仁其名靜翁  
其號也東晉新安太守元譚陳開府儀同三司忠壯公靈洗其上世也  
號南溪翁者其先祖也考諱端而妣之氏沈也壽童者子宗之子也嘉  
善者弟祐之子也張悅吳寧女子子之夫也趙庶者孫女夫也延祐甲  
寅九月二日其生之時吳元年六月一日歿之時也其配徐氏先年七  
十卒葬于時止亭右側國英所自營而今合葬焉者也嗚呼國英有田  
劣一頃家餘貲不一金僅效小用於邑之事而能知以報本爲大而力  
行之立其身善其親及其族里所就如此使其稍進於是效一官以展  
其才用得田祿以過不足必大有可觀者而止於是常情憮之矣昔鄉

先生鄂守羅公作忠壯公廟記首叙夫功名之士不可以歸見鄉黨家  
人者讀之感泣羞愧者十人而七八嗚呼吾國英持其所就可以見忠  
壯公於廟庭矣而又何憮焉故樂爲叙之而復頌之以詩也詩曰  
若稽田是穰黍貴者身身有本身之本道之存葛與藟比與根程君無  
官寡皆力鄉閭喪之踰親戚江濱之積謁數尺泊舟觀者勸爾德

故城縣丞汪先生德懋行狀

趙彥全

先生諱天應字德懋以字行姓汪氏世居新安唐初越國公華保鎮六  
州賜廟食其長子朗州法曹建二十二傳至良佐族益蕃衍自歛下族  
遷休寧羅墩距萬安不一里許先生七世祖也先生曾祖庚宋太學生  
元初不受徵而死妣朱氏祖鼎元浙東茶鹽都轉運司副使妣金氏考  
通饒州路稅司提領妣吳氏先生生六歲失怙母鞠育之比入小學發  
憤勵志雖隆冬盛暑未嘗釋卷久漸成疾乃闢家塾萬川之上延環谷  
汪先生而受業焉既又從學東山趙先生遍謁諸前輩若符制師山鄭



公學士風林朱公春坊貞一汪公東阜陳實卿隆阜戴尚文俱相師友  
同里任本初則相視若兄弟然講貫尤密於是學問大進經史悉通環  
谷先生嘉其篤志以清苦名其齋業益以精其究麟經尤深達其旨嘗  
以疑問諸質東山先生凡二十餘條究極性理之說遠近爭聘為師先  
生隨材施教不厭不倦子弟各有所成就至正六年縣尹唐棟徵各郡  
名儒賞試延前貢省元李庶為主文外郡來就試者五百人僅取二十  
五人先生與焉值疾作不果行元末兵興避地松蘿山中至正丙申院  
判汪公同兼保領鎮休寧起義學于商山延先生為訓導居數歲  
聖朝混一洪武辛未春以秀才被召擢故城縣丞抑強扶弱泣政廉平  
不苛以察私謁無敢闖其門居歲餘為通租事所累謫居鳳陽遺書戒  
子云古人處困而身儉德可以避難最是日用飲食要節儉我清苦自  
名故難中易過母以我言為迂所藏經史子集官珍藏之又寄詩以勉  
其從師講學雖居顛沛未嘗頃刻忘讀書之志二載而終詩五十四言

音之來聞者莫不哀悼生元至治二年壬戌正月十三日歿洪武乙卯  
九月十三日葬鳳陽府鍾離縣西南十五里曰西屯娶石嶺吳氏有賢  
德事姑孝能口誦孝經諸詩性弘雅人未嘗見其出傲言善理家不以  
勤先生無孑立兄恭二次男正宗為嗣二女長適邑南程公善次適同  
里邵彥實孫男二長諫次回回以俊秀選為邑率弟子員惟先生家世  
儒業孝友天至性資嚴毅衣冠整肅平居交接儀容儼然親族長幼莫  
不敬畏幼孤親訓之學底于成而先生事親雖流離之時養志不違安  
人歿於艱危之秋而先生喪葬盡禮清修苦節甘於淡泊客至終日危  
坐談論道義無倦色雖習舉業而古風近體尤典雅可追古人而不苟  
作環谷先生編春秋纂疏及輯通鑑綱目考異先生時與折衷及東山  
先生之歿尤篤契誼蒐其平日所作詩文編次成帙以傳鎖以先叔東  
山之故叨陪先生几席甚久勉勵訓誘受知惟深茲忘其固陋述先生  
履履大槩俾來者有考而立言焉昔洪武二十二年四月望日門生趙



鎖狀

徵士程君吉輔墓碣銘

薛兵書

太常卿兼翰林侍講學士程君以書告遠曰惟先高大父徵士君之葬  
 未有銘先襄毅公欲請于執事未果也故政不佞嘗撫棺遺行爲序表  
 一通然違世既遠事多漏書近考諸公牘家乘而論夫失爵之故謫成  
 之由尚未之白失今不圖則使先德遂將泯焉敢以爲請遠與襄毅公  
 同榜進士平生之託豈可孤也乃序而銘之序曰君諱吉輔字昌祐晉  
 新安太守元譚之後也太守十二傳至梁將軍忠壯公靈洗又十四傳  
 至唐御史中丞都使公濠子孫極盛其居休寧陪郭則自中丞次子南  
 節公始南節五世生宋開州團練使全死節于金子先孫永奇並受學  
 朱子永奇五世生榮秀君曾祖也元江浙儒學提舉妣劉氏彭城縣君  
 祖文貴饒州路德興縣銅冶場提領妣鄭氏考社用薦爲承奉班都知  
 不赴妣吳氏生二子長即君次國勝事

太祖高皇帝爲帳前管軍上萬戶死節僞漢追封安定伯加贈開國輔  
 運推誠宣力武臣榮祿大夫柱國安定侯諡忠愍廟食康郎山君生而  
 端慤氣宇不凡美鬚髯長及半體見者以爲異人從學陳實卿趙子常  
 二先生涉獵諸經史尤好立律星筮之學要必爲有用至正末紅巾盜  
 起婺源人汪同起義保州里忠愍侯發兵應之君悉力持家以佐軍實  
 會天兵下徽州衛國公鄧愈得君兄弟奇之送京師入  
 見君固辭乃留忠愍侯置帳下而釋君還洪武庚戌詔江南諸郡縣  
 大家一人赴闕君與行

上親御奉天門賜宣諭將留官之君復辭歸丁巳求諸功臣後而忠愍  
 侯無子有司以君應詔時汪公廣洋爲丞相汪公之先居休寧旌城  
 忠愍侯夫人其從妹也君因客其家汪公爲言于上將俾嗣爵而難  
 作君亦被繫獲免凡汪公建白一切報罷君既歸益韜晦郡邑累徵辟  
 皆不就子子黃公希范出守徽郡與休寧令有舊好令數遣君遺書黃



公黃公雅重君每事咨訪或屏人與語至夜分乃罷是歲  
太宗文皇帝入靖內難黃公被罪休寧人有憾于令者奏其事

詔俱逮之君之子杜壽亦上言其嘗以書箚在官與黃公致書者某也  
老父實不知由是令坐重辟而杜壽發從戎河間君居家嚴而有法尤  
篤于行義周貧郵賈至傾橐弗悵晚歲家益落去隱邑之葆真山不復  
問世事日與道流者居怡然自適初伊川先生子孫從南渡居池州一  
還居休寧與陪郭程氏互相擇繼君雖出南節實伊川之裔也永樂戊  
子十一月十二日終于家享年七十有五距生元至順庚午十二月十  
五日配吳氏同里人克相君子嫺鄙稱之卒年八十有五合葬縣東北  
三里水橋于子男三人長即杜壽累贈兵部尚書兼大理寺卿次元泰  
福建尤溪典史次道宗孫男五人長晟初贈吏科左給事中累贈官如  
其父次斌次昱次宣次旭曾孫男八人長信正統壬戌進士歷官中外  
為時名臣贈太子少保益襲毅次佑潘陽中屯衛指揮兼事次倫次儉

次偉次俊次傑次倫玄孫男十九人長敏政成化丙戌進士及第歷今  
官正學高文時論攸屬次敏德詹事府主簿改判蘄州卒次敏行敏功  
敏文敏通敏事敏聰敏時敏恕敏膺敏芳敏亨敏哲敏庸敏宏敏才敏  
堅敏道五世孫男八人長坦早世次填錦衣衛百戶次圻次塏次壘次  
壇次堂次煥銘曰

嗚呼蒼天報施善人不在其身必在子孫卓彼程君趾美韜真勳猷未  
建而發祥于曾玄者甚偉爵秩未加而延慶于武衛者方殷惟前之屈  
惟後之伸是宜執筆大書為來者勸而末其聞乎

孝則居士程君

可紹墓表

趙東山

君姓程氏諱可紹字致和徽之婺源人也其先世居邑之鳳嶺至君之  
高祖宋待補上舍子敬遷高安鎮西居焉曾大父仲賢大父震昌父子  
英皆鄉義士而君承先世詩書之澤幼從伯父林隱公復心與雲峯胡  
先生學修身謹行克自樹立鄉有不給者賜之有急難赴救之里有稅



場官每事咨君得無敗事他如葺橋舫以濟涉施湯茗以惠渴者一鄉德之中年由高安鎮西徙居中市溪北築亭水濱曰觀瀾爲延師教子之所危學士太僕爲書二大字揭之楣間至正戊子汪尚書叔志胡山長世佐朱進士公遷皆誅識之居之左起屋立龕奉先世神王取大雅詩語題曰孝則堂丹陽尹黃公子厚爲之記刻朱子孝經刊誤以勵後學鄉先生仲魯汪公伯武王公爲之序而林隱公與之編輯世譜勘訂經傳惟日不足歲壬辰紅巾盜起時下令民有擒賊首從者予爵有差趨今受爵者比比然君曰人生富貴各有命以人命而易功名亦奚安哉鄉之蜂屯蟻集者君以正道化之多屏息癸巳冬母孺人以壽終君居喪盡禮一門四世雍睦如初是歲旱遍野憂惶君齋禱于禾嘉潭龍湫而雨甲午又旱君發所積以賑不足則散所儲帑帛問糴他郡人以是益賢之丙申挈家避亂衢饒之境邑之豪士首辟君辭不赴語使者曰人生百年遭此厄偷生爲幸何意功名乎君避難德興之文港盧坑

臨終語諸子曰風塵瀕洞至此極矣謹身保族若等勉之言畢而逝君生元貞丙申三月二十一日沒至正丙申十一月十一日享年六十有一娶同邑中山隱者祝公壽朋友諱隆性慈惠篤孝故闔門肅然一宗慕之生大德丁酉四月十二日沒至正乙未十月二十五日子男二禮用達道女四柔德適潛潤德適呂意誠適張意德適李君墓在里之南岸之原噫君昔與予遊師山鄭先生之門情好深厚其婿貴武呂公西岷李公復以武備咸集雄峯翼繼又以文事會徽府而禮用達道明敏博達信君之德焉有後也一日達道過平東山精舍奉君行狀再拜曰先人捐世今已五年生不能致孝後發不能發幽光爲罪大矣先生於先人知之爲深願賜以文子旣悲君之未遇而又重其子之請也敬叙其梗槩如此庚子歲七月旣望書



新安文獻志卷九十一  
行實 遺逸  
高安處士程公達道 行狀  
祝彥暉  
公姓程氏諱達道字彥達中易敬之世居徽之婺源由鳳嶺遷高安曾祖震昌祖子英父致和人稱孝則居士公性資謹厚尤篤孝義識趣高邁議論不凡伯祖復心先生愛之教以四書大旨嘗侍外祖舅顯天說春秋從貢士胡先生仲彝學於松蘿又侍其族叔均度於高安溪上之觀瀾亭為學不倦所造益深事親行已待人接物一循於禮而有權度人敬憚之州縣儒學累興科舉即占名前列秋闈貢舉累試不利值世變侍親避亂山中父兄俱喪榮然獨立時天戈始至訪求高士公乃出奉命下德興招徠其邑之大家如李西岷王必先祝汝明葉貴明後皆顯宦於朝是時巨室多以豐財殞身惟公獨以恬退謹畏自守保其孤弱人莫能欺皆為學之效也有識者稱為獨醒翁先是軍籍多不役民

新安文獻志卷九十一

行實 遺逸

高安處士程公達道 行狀

祝彥暉

乙集

公姓程氏諱達道字彥達中易敬之世居徽之婺源由鳳嶺遷高安曾祖震昌祖子英父致和人稱孝則居士公性資謹厚尤篤孝義識趣高邁議論不凡伯祖復心先生愛之教以四書大旨嘗侍外祖舅顯天說春秋從貢士胡先生仲彝學於松蘿又侍其族叔均度於高安溪上之觀瀾亭為學不倦所造益深事親行已待人接物一循於禮而有權度人敬憚之州縣儒學累興科舉即占名前列秋闈貢舉累試不利值世變侍親避亂山中父兄俱喪榮然獨立時天戈始至訪求高士公乃出奉命下德興招徠其邑之大家如李西岷王必先祝汝明葉貴明後皆顯宦於朝是時巨室多以豐財殞身惟公獨以恬退謹畏自守保其孤弱人莫能欺皆為學之效也有識者稱為獨醒翁先是軍籍多不役民



以田糧私入軍籍官中徵斂毛起民役愈繁往往顛蹟衆不便將言之  
莫敢爲首公身任之有司以聞獲免役遂均民方甦息洪武八年秋郡  
縣以朱子廟宅傾頽檄公往佐之役公夙夜躬勤出已帑以給群工不  
日告成程氏始遷婺源祖自唐檢校尚書相公而下墓若干所公每春  
暮率族屬汛掃鑿石以示永久又與從子邦寧往歛拜始遷新安祖晉  
太守元譚公墓時民以太守之墓地爲園公率歛宗人仲寧仕徵贖復  
之求立石於墓前以志中歲築室南村有水石林壑之美號南村老人  
時樵墅韓公貞一汪公孝友葉公孀菴王公東山趙公甘一時老師宿  
儒公皆與之相遊處久之復還故址之南溪湖上更號已矣軒遵父命  
於居左狷孝則堂以奉先世神主神主之陰公各爲之贊臨溪起樓三  
間曰亦政刊朱子所書敬齋箴宋司馬公所書家人卦干壁積圖書先  
賢墨蹟于其上暇日編歷年紀實及程氏孝則堂家教輯錄一卷曰養  
子須教讀書曰嫁安先要擇婿曰娶婦必論家世曰田園貴能守成曰

持家務得其人曰生財務得其道曰立墓必以時省曰祭祀必以時修  
曰待宗親要當以禮而不失其親處鄉黨要當以和而不失其正責已  
必嚴謹責人放寬恕曰好師友必須親尚庶有講明見財利不可貪嗜  
防其陷已列爲十目各爲一章論之年五十即自營塚壙而誌其墓又  
自贊其像與神主之陰其言皆述全歸之理達死生之義類古之有道  
者公生元泰定三年丙寅八月九日終大明洪武十有四年辛酉九月  
九日壽五十有六配同鄉環硃里中山祝氏文學德夫之長女諱賢生  
至順元年庚午六月八日終洪武六年癸丑八月十五日壽四十有四  
孝和恭惠先君與吾母遇之最厚兵燹後與伯姆孫皆以木及事公姑  
爲大恨春秋克相祭祀事夫盡婦道鄉黨間競以取法其德性行實有  
不能備述者繼室湖南白氏側室同里黃氏子男邦直女深適德興文  
港李子同汪適中平江永春汶適文港李文岳祝氏出也沂洛黃氏出  
也洛適中山祝有常源白氏出也公葬里之南岸朱芻塢亥山巽向公



之行實多見諸儒文辭宜不可贅第以邦直乃彥暉姊氏之子而彥暉  
又與公為內外兄弟敢述其大槩以慰其子之請俾乞銘于當世之大  
手筆而誌其履行焉洪武丙寅八月望日中山祝彥暉謹狀

汪氏孝友二士

者天漢英傳

陳自新

汪者英漢英者休寧安樂鄉人也當元至正壬辰紅巾兵起斬黃亂江  
東剽掠村落者英與弟謀曰吾兄弟不幸生遭世變幸而年壯力強盍  
相與倡義保障一里以安吾親漢英然其言於是率勇敢士以拒敵者  
數矣一日倉卒寇至者英與角力不勝墜于陷穽大呼弟曰吾弗濟矣  
汝亟脫身以奉親漢英聞之奮勇死戰賊方散去遂援兄起俱全於難  
者英謂弟曰今居當衝要兵燹無寧日萬一蹈白刃誰奉親終乎不若  
隱遯以濟艱難遂相與奉親挈家索寓親故間關數年迨我  
高皇帝一天下再遷今之和睦鄉兗山居焉爰集武事耕讀為業養親  
以安或勸之曰以子之能當為 國家用何乃自屈為鄉人乎君曰遭

亂世而能保其身以全其親得為太平之民矣又安敢求榮哉知者  
以為遺安計也優游晚景壽考而終鄉人號曰孝友二士其子觀勝恐  
久而事泯求傳於予予惟自行莫先孝友書云孝乎惟孝友于兄弟自  
世亂道喪骨肉相殘求如二君者幾何人哉噫當墜身之際微漢英不  
能脫虎狼之厄微者英之謀豈能全父子兄弟之恩恩義無至可與古  
人孝友媲美矣抑予聞君之遠祖越國公當隋之亂保障六州廟食百  
世大有功德於民君之立心行事不愧越公後後必有顯融故書之以  
勵夫世之德錮縶紛膺者贊曰

元季亂離人民奔馳君獨倡義欲濟艱危力不能支墜于坑塹弟感兄  
言奮死一戰寇兵潰散我身得全相與謀議奉親東遷于孝于友死而  
不朽不顯其身必昌厥後

孝廉程公

孟思

墓誌銘

俞樵雲

程公孟思歿而葬且幾年嗣子敬夫自為狀來告曰先君子智足立事



不輕於有猷才足適用不屑於有為修身慎行獲保守領以歿三子惟  
仲方長懼無以昭先德敢請誌諸墓以示方來按狀公諱賓賜字孟思  
姓程氏徽之休寧人先世自休父為周宣王司馬雲仍駢蕃隱顯不一  
至東晉有元譚者為新安守卒官因家于茲十二世曰忠壯公靈洗梁  
陳間以拒侯景保障歿黃墩至十一世孫迪宋休寧簿有善政子照  
卜居山斗照九世孫安節宋季為京西招撫司義士軍副將兼統領生  
掌書峒即公五世祖也高祖華仕元為帥判會祖仁祖相卿生三子叔  
賢叔志叔祥叔志即公父也配陳氏公生嚴毅有志畧元季盜起舉家  
避地劔潭洪武甲寅還故居公甫十三即能率丁夫於池州砍海船木  
起赴郡咸譽其立事之早未幾朝議以戊戌自實田或未實改造洪  
發公言於衆曰朝拜慮豪戶詭寄賴貧弱吾輩豈可復踵前弊以  
蹈不測哉一秉至公毫髮不少假至今賴之石灰山之役公與兄子初  
偕往灰拆多謫漁子口種首着繼奉恩旨凡後工役者許西河納米

五十石贖罪公蠲已帑以倡諸父昆弟不期月初亦獲釋嘗自婺源伐  
巨木五千餘由饒湖抵京至安慶和賣之令下亟以狀聞請輸官  
太祖高皇帝嘉之命光祿賜饌又命內府給價酬其直公神清聲長面  
方耳聳事父母以孝聞志素嗜閒弗任家事一姊與弟孟達既長獨  
力為之聘娶邑令周德成舉公孝廉弗果行鄉人家遂稱之曰程孝廉云  
公於天文地理陰陽卜筮詩書六藝無不涉獵尤長於醫然剛直太過  
易與物忤每遇貧弱有橫罹強暴者身當之見雅德君子則和氣盎然  
如陽春然晚建觀稼步雲二樓督子孫耕讀又擇山斗佳勝處為八景  
播之聲詩以自適公生元至正丁亥歿永樂甲申享年五十有八配古  
林黃氏先公十五年卒葬十里金家山男三人長仲方即敬夫次季方  
禮方繼室西鄉畢氏後公數月亦卒孫男八人曰維崧維岳維崙維岷  
維嶽維嶷維巒維嶽孫女三人先是公族兄伯叙嘗謀葬於泰塘穴未  
啓也公歿敬夫請焉伯叙慨然曰昔二豎交攻蒙而父更生之德文未



獲報今乃若小即同穴而葬庸何傷命工鑿石為一穴而葬其左銘曰  
程氏著姓肇自休父總統六師克播皇武迨至元譚官于新安繼以忠  
壯功業桓桓盛德之後必有餘慶公之生也幼而脫穎器宇軒豁志氣  
超羣才邁於用德潤其身外隆師友內睦親族孜孜於善惟日不足伎  
藝畢給充長於醫弘濟天閑嶢嶢者順泰塘之原佳城鬱鬱宜爾後來  
子孫蟄蟄南山八景圖記新女大翻者以視諸邑為勝由邑而  
百變而尤勝者莫如龍清溪如練翻者以視諸邑為勝由邑而  
山天井在焉則莫如龍清溪如練翻者以視諸邑為勝由邑而  
為劍潭由所江而東注于海其出賦秀其西與北則則燕溪清溪而  
程孟思氏世居之好事者即其居大勝也然為八景曰景曰景曰景  
石生煙曰清溪柳色曰黃浦香曰方塘水活曰景曰景曰景曰景曰景  
歌曰龍華鍾韻又從而黃浦香曰方塘水活曰景曰景曰景曰景曰景  
燬于兵者大半而存者無幾其銅縱橫畧無寧歲其父老莫不相攜去  
之越五年除榛荒而修其垣墉易其田疇為之構植慈遷有道而富庶  
者亦既碎矣於戲重有典廢易其田疇為之構植慈遷有道而富庶  
又幾於一變滅是則所謂八景以奉公上所謂居歆歆之中族人之  
相與讀書足以繼先志治生足知縣李夢鵬書  
道者八景蓋有助焉宜流於未  
洪武乙亥冬十一月廿一日

吳處士墓誌銘

曾西野

吳處士既歿三十餘年其子向謁於予泣而請曰先人力為善而不獲  
施之當時顯於天下今墓木拱矣而石未有文恐終無見於後世孤之  
罪也幸為之銘予哀其志辭不可遂撰次而銘之按狀處士諱遠字希  
道桂林其自號也上世絲姑蘇來居休寧五季間有諱皓者復徙邑之  
璜源詩書相承代有顯者高祖申宋江淞漕試授登仕郎曾祖銖祖應  
紫領鄉薦補大學上舍生公君儀元饒州路醫學教授母汪氏旌城望  
族處士以至治壬戌十月二十七日生幼穎敏好讀書不啻飢渴之於  
飲食弱冠授徒于鄉屹如成人乃侍父宦游元都博學洽聞公卿貴  
人皆器重之里俗或乘喪嫁娶恬然安之不為異處士遭父喪聘而未  
娶宗族親戚皆強之處士出聲色以拒繼有來言者輒撫膺號慟欲絕  
強者慙而止苦塊居廬幾至毀歲元季兵興群盜蠡午處士周旋其間  
孫言危行未嘗為不義屈益亦無敢侮之者鄉民胡仲德聚眾攻剽執



里士黃伯宇金萬全吳善夫吳伯原將殺之處士馳赴謂仲德曰是善人也殺之不祥仲德即解其縛縱之後數人者望見處士輒舉手加額曰生我者父母也再生我者吳公也處士既沒皆為服喪三年處士嘗與弟希榮同隸戎伍既而轉戍永新而希榮留家田去籍為民處士獨任其役無一語怨對竟以長子代歸晚際天朝海宇寧謐而家道小替處士布衣蔬食居常欣欣然無不足之色平生謙退周詳動止有常度所過無後言所居無惡語雖宴閒獨處必正襟肅容凝然靜坐見子弟必具衣冠室廬狹隘必灑掃蠲潔鄉黨有孤嫠者必竭力賙之唯恐後貧不能葬者必資助之四年八十嘗感風疾數年處士治湯藥視天沒雖甚勞備終不委之家人洪武戊午五月二十八日終得年五十有七配汪溪金氏有賢行鄉閭稱之男四人權誼壽同權壽皆先卒孫男五人得符箒驥德徵德懋以庚申七月二十日葬里汪台坑之原處士好為詩春容幽遠渾然不見雕琢所著有桂林集都是春集若干卷歲于

家同字和中永樂初以善書選入內庭有文學克世其業銘曰吳氏之先與繇仲雍世家姑蘇克振厥宗分居休寧爰自五季皓遷瑣源有衍無替暨于處士炳蔚其文菑而不施厥聲以聞孰畀其材而嗇其壽畀將疇言嗇又奚咎所得則少其存孔多天實為之人其謂何蒼山我我墓道有石後有考者請視斯刻

金處士祖壽墓表

江正字

休寧南街之金公孟起卒卒之夕閭巷之人奔走而告哀者相屬於道邑為之罷市鄉之耆老宗親姻黨莫不咨嗟涕洟以為德人亡矣遠近是非孰與之辨願連孰與之恤強梗孰與之厭服其心吾黨將何所倚賴乎殯之日相率聚祭者五百餘人縣大夫泮庠與搢紳諸生與夫黃冠緇流肩摩踵接莫不追送於南門外百里之內三農士庶奔馳執紼而効虞殯之歌者又千餘人嗚呼孟起何修而能使人悲歌思慕於既沒之日若是是宜伐石而書之以告其後之人焉按公諱祖壽孟起其



字也姓金氏其先出漢稅侯弟侍中倫家世相傳遠有端緒曾大父道  
父大父伯高考仲善皆隱德不仕孟起爲人曾次明白不設機弄個儻  
好義與其弟孟賓同心克家歲時節朔拜奠其先世墓極孝敬見飢  
者與之粟寒者與之衣顛連困苦者與錢久則焚其券鄉間有訟紐結  
而不能解者縣大夫則命孟起孟起當稠人聚訟問曰其也直某也枉  
某也許衆莫不怙怙慰服陸梁遇諸塗亦加斂戢而加敬焉縉紳與冠  
蓋之士至其家則倒屣迎之無日不推羊醜酒自遠而至者爲經月留  
賓忘歸而主無厭也邑之寺觀庵宇有廢弛者孟起亦倡而修葺之未  
樂間邑令陳綬守已廉慎因他事負累發山東驛遞孟起遣人賫白金  
往助其困宣德初舉行鈔法監察御史何公文淵至下令通于一邑孟  
起蹙而進曰楮幣澁不行自古有之休寧之民商少農衆願出已鈔十  
萬貫以蘇一邑之人公納之衆莫不歌舞其德孟起風神灑落善談論  
貴義輕財皆此類娶程氏生宗道先卒繼呂氏同邑建昌令公大之女

生宗敬孫男六人温潤岩俊岩相岩英岩秀孫女五人孟起生前甲辰  
二月三日終於宣德戊申其卒之月日同其始生之辰享年六十有五  
葬於邑西五里葛川之原予嘗聞其邑之人曰仲善當

國初歸附時隸王駙馬幕下掾元季徵之民占籍爲兵者千餘家駙馬  
公得其籍欲沒入爲軍仲善委曲勸諫乃將其籍而焚之終身不以告  
人及生孟起名聞 朝著說者謂仲善陰德之報蘇文忠公有云善惡  
之報至其子孫而後定豈不信然嗚呼孟起沒矣邑士兵君以聲爲著  
其狀翰林侍講學士曾公鶴齡爲銘諸幽正統庚申秋予寓錢塘日又  
得其遺事於其鄉之父老其子宗敬復拜泣求予文表諸墓春秋之義  
發幽闡微予故竊取其義列其生平行事之實於石揭之墓道且以慰  
其鄉黨宗族之思云

徵士程公杜壽墓誌銘

王文端公

公諱杜壽字子齡姓程氏世爲徵之休寧巨族其先世詳見朱學士所



書公叔祖安定忠愍侯國勝之碑公高祖榮秀仕元爲奉直大夫江浙等處儒學提舉妣劉氏封彭城縣君曾祖文貴宣義郎饒州路德興縣銅冶場提領妣鄭氏祖社至正末用薦爲承奉班都知不赴妣吳氏考吉輔國初者宿也妣吳氏初者宿君禱于唐宰相杜黃裳之朝而生公故因以名公生秀穎異常者宿君鍾愛之遺從鄉先生游博習經史下及醫卜地理法律之學又從故詹中書希原學書決武中有司薦上京師公懇以疾辭歸專以研讀爲事每曰古無不研之儒亦無不學之農縣大夫將聘爲塾師而民與縣大夫交惡者上言及公詔俱逮至京謫役臨濠又北戍沁州轉徙衛輝所至登臨懷古畧不以夷險介意識者壯之未幾南戍桂林未行改潘陽中屯特河北亂後蕩無居人衛使率所部闢草萊初官府畫屯戍而主者武人一籍公贊之公考驗地誌酬答公移上下遠邇犁然有緒中也寓治河間自來樂宣德以來歷姜濤許侃廖謨三守皆賢而慎許可每獨造公竟日所語皆

先賢格言故事未嘗及私也公既植家河間而親闈祖域遠在江南歲時南望再拜揮涕已而父母相繼卒公匍匐走數千里奉養事絜其幼弟原泰與俱北教養之原泰遂以布衣從尚書黃公下交趾授縣官公見諸孫信有遠大器資遣爲學生躬督厲之曰先世多名德而中尼于吾所望以復振者在汝汝可不自力乎信果舉進士通朝籍公晚歲益端居自適方見曾孫受祿養而長子歿公哭之哀遂以正統丙寅六月五日病卒享年七十有五時信方以父憂家居舍遂贈斂悉依治命如禮配汪氏同邑名族女有賢行子男二長晟次昱俱先公卒孫男五長信今吏科給事中次恪次倫次儉次偉孫女五長適儒學生白瓚次適儒學生王哲餘在室曾孫男一曰敏政予聞之廖太守云公平居敦孝友教子弟嚴而有法與人必以善道不媿姻手所筆錄動成卷帙細書楷書雖老猶謹殆類乎古之篤行者其言蓋不誣也信將奉公葬河間城東金沙嶺之原以廖所爲狀請于銘銘曰



有歛程宗世德允隆荷嗟徵士孰關其逢不耀自躬有孫奮庸我作銘  
詩式昭其終

朱處士復得墓碣銘

楊刑書

永樂九年辛卯夏五月六日歛處士朱希生以疾卒于金陵寓所弟希  
同奉柩歸以是年十二月二日葬虎兒坵之原今四十有二年矣其孤  
惠奉書拜郡人吳以聲所述事狀遣其子長宗來請予書畧曰先  
人墓未有銘恐遂沈泯敢請刻辭用光泉壤而名永長存予先尚書教  
授徽庠時與希生文字友惠又予所知者今遺書數千里來予雖無陋  
銘惡可辭邪按狀處士諱復得希生字也上世居休寧之月潭後徙歙  
南之杏城因家焉曾大父景太父元凱父真佑俱隱德弗仕母共氏  
處士穎敏明達博涉羣書有大志尤篤於孝友年十四遭父喪時伯兄  
希潛先卒仲兄希仁客閩中而希同尚在室亂獨處士以幼年當大事  
衣衾棺槨盡禮衰麻哭踊中度雖老成人不之過也以未有葬所日徒

既從術人董得章者求之卒得吉地沙坵之陽葬焉復作堂墓南以時  
省祭其間又明年仲兄死閩中處士時年十六匍匐數千里歸其喪人  
以為難母孺人在堂奉養無不至務得其懽心事二嫂茶謹未嘗少違  
其志母歿喪葬一循禮制因作二嫂壽藏毋側後二嫂皆守節以終亦  
處士事之以道也撫希同底成立友愛純至處鄉里盡恩意濟人之急  
血人之患為之惟恐後里有程仲芳程勝三者舉家疫人莫敢近處士  
獨日至其家藥之飲食之一家賴以全活他事多類此嘗慮宗族日就  
踈遠子孫易忽忘乃更考定家譜支分派別有條不紊先尚書為之序  
後處士以子姪日滋改作所居雖朴不為華而規摹宏廣居旁構一小  
亭俯瞰溪流樹之花竹日與高人文士吟觴其間名曰止足取諸知足  
知止意也處士為人慷慨好義輕財利尤樂交文儒談古道人有善稱  
之不絕口有不善雖貴要直言不避蓋磊磊落落士也生於洪武甲寅  
十一月十四日享年三十八配同邑張氏有賢德子男五長即惠讀書



操行有士君子風次懋淑良貴皆克家女二人長適方公海次適汪孟  
洪孫男十三人長宗慎宗裕宗儼宗敏宗和宗富宗開宗高宗留宗玄  
護道宗偉宗惟處士年不配德而子蕃昌足以見積善之報為之銘曰  
錫爾賢宜永爾年嗚呼處士而胡不然積善在躬餘慶自天視此後人  
瓜瓞綿綿

簡直汪先生文亮墓表

胡廷慎

婺源汪簡直先生既卒且葬餘八十年于今其曾孫福建按察副使進  
懼其潛德久而就湮也躬具事狀徵予文以表墓予曩與副使聯官山  
西嘗預聞副使詢得治民言國初廷遣茂才官汪某者以給資獻  
獻治焉有聲焯未泯蓋識其為曾祖覆詰弗已屬予修山西通志將撫  
副使蹟副使尋遭難去罔獲履歷顛末未果載今徵狀不誣他行業充  
夥是宜汲汲圖暴諸而以屬予其容以不斐辭按狀先生諱文亮字用  
晦一字士晦姓汪氏初號困學以自勵晚更號簡直志平生也人因稱

簡直先生其先系出唐越國公諱華十三傳至兵馬使諱道安鎮婺源  
兵馬子團練討擊使諱漬分戩婺之三吳鎮皆有保障捍禦功團練子  
諱中元卜居鎮之上流鱗溪大畷自是世為婺源人又七世宋行省左  
司郎中諱廷植其配李郎中生竹友諱琮其配俞竹友生見山諱德慶  
其配江是為先生曾大父母大父母父母也始見山翁祈嗣於下田源  
夜夢神人指蓋盛水族具鱗甲者三顧謂曰斯若嗣也後果生三子伯  
曰士傑仲則先生季曰士展並有學行先生允頡出元季兵擾舉族避  
地浙西先生甫髫髻歷艱險所至之處皆識之不忘國朝始寧復故  
里見山以仲兄海樵諱仲恭之嗣以先生後之其於二天事之舉無違  
禮海樵歿其配俞挈其貲裝勝從依居外氏先生數迎養弗允虞外氏  
必因利厥有也書籍數讓與之力請俞歸養愛敬兼至終其身不衰先  
生善幹蠱故居撤以一新拓生業倍徙舊遺遂以貲雄于鄉豪猾倡賦  
闡縣無科山動以數十萬緡計先生集眾議不便亟論諸官得已故斂



市民構營舍材多腐縣官欲令鄉民代易之亦力勸止焉洪武歲丙子  
有司以茂才舉先生應詔朝拜試中官之未授秩銜是年  
命監造旗手衛工役明年命錄應天府獄究抑多所平反老穉株連  
者悉具以聞會大赦獲免凡數百人既又命往山西查將卒一視所  
立邊功為差錄所部獄如在應天不究一人比其民稱之至今有以哉  
尋命四川清麓課征蠲惟當還朝俄自引年遂得謝永樂改元乙酉  
有司復舉先生應徵賢之詔詣朝屢與一二大臣論時政皆合大  
臣有薦先生為同列先生力辭復請老歸時鄉有虎害先生為禱于神  
以息凡遇旱潦疫疹無不禱禱則應平居樂施與藥病瘞死食饑衣寒  
無少靳貸者未嘗取息負則不責其償尤嚴回正之辨汲引善類殊倦  
倦焉里人有爭求析片言各帖服去每疾堪輿家壞祖墓風水因悉究  
朱蔡諸家言相得吉壤葬其大父母及考妣凡三墓復中元及高祖七  
萬二祖墓若地之見侵於人者歲時戒族人各封樹其先塋惟謹有無

子夙銜先生乘鬻及啜逮繫金陵其子潯濡力訴之事幾白先生以  
疾不起未樂辛卯正月二日也距所生元至正甲申閏二月一日享年  
六十有八初娶于江生二子潼澄繼娶于胡生四子潯濡止漆側室潘  
生一子瀨女一適江祐年孫男二十一人曰棗者封刑部山西司主事  
曾孫六十人曰進者即副使也玄孫一百十五人曰儼者德興教諭曰  
璽者武昌知縣曰嵩者睢州同知葬以宣德辛亥十二月二日墓在武  
口鎮背兵馬使北次先生所預營也嗟夫有陰德者後必昌先生筮仕  
未顯其所託休于民乃克紹先世垂裕後昆且乘復始之機汪氏將來  
盛大其可量也邪故為最先生凡行文諸石以詔其後人俾知所自云

處士蘇公五行狀

蘇景元

公諱丑字叔武先世居開封宋參知政事易簡之後易簡長子壽知歙  
州遂居休寧十二世生聖公之曾祖也聖生恪恪生泰公之考也皆有  
隱德母孺人吳氏以元至正辛丑六月二十九日生公因以歲名焉公



生六閱月而孺人卒泰誓于陳村陳伯仁氏伯仁者邑老儒自新先生之兄也未幾泰亦卒陳孺人辛勤撫育一如已子公端重謹審自小如成人自新先生因收教之長益克自樹立因經喪亂有亢宗之志乃自陳村還居邑中依其從叔伯遠翁翁器愛之教以貨殖家日豐裕再遷北街藕池之西作大第鼎新而居識者稱嘆不意榮榮者中興若此公事陳孺人至孝如實生已痛二親早逝不逮養凡有作為必謹必慎恐貽父母之辱自新先生嘉之為扁其堂曰務本名公多為賦詠公以族大而蕃譜久未續乃重修之時從父守正為兩浙都轉運副使公奉以求正且請曰此終為一家私書願得都司印記庶可傳遠運副公然之印而序之以歸性愛古法書名畫不惜百金購之曰此亦足養心性非他玩好可比與人交率以誠慤人有善極口稱之有不善委曲開導貧不能存者假之財穀不計其能償與否見族子姪必獎勵誘掖俾進于善待僮僕未嘗疾聲厲色有慶弔必躬往不使兒輩鄉黨有急難盡力

扶持有紛爭必為解釋晚歲氣益壯髮不白八十有四卒以正統甲子正月二月初配陳氏先公四十二年卒繼配東門汪氏先公六年卒子六人男二長瑜庶出次瑞汪出先公五年卒女四長贅朱章其二嫁汪武祥汪愷陳英仁孫男八昭旭暉昌明昉曉晉以卒之明年十二月七日葬里仁東鄉周村先塋之次又明年其孫昭昌及公之甥汪英以大為公族姪請述其平生為狀將以乞銘于當世大人先生噫人生兩間有道德于躬足以顯揚有功烈于時足以惠利載之史冊傳諸不朽宜也然考之古史人有一行一善在所不遺豈非亦有繫于德勸哉公以孤童子起家而能孝親睦族勤生務本周貧負筆慕善謹禮斯數者於今之士大夫亦或歎焉而公有之是可書也已立言君子尚表章之

順天府照磨汪君有祥墓誌銘

張文信公

汪君有祥以順天府照磨疾卒于京其子璉琛侍官所得以躬湯藥含歛將扶柩歸葬哀經奉兵部郎中吳君末清狀泣拜請銘墓石君數從



予往來有斯文好銘可辭乎君諱有祥字永華越國公之裔世居徽之  
休寧父士輝母夏氏自父而上比世皆隱德弗仕然能承守禮法為望  
于鄉君幼穎敏早喪母事父與繼母黃克盡孝道友悌于兄武祥甫十  
歲讀書即通大義未冠屹如成人御史何公巡部見而奇之欲補邑庠  
生其父難之乃止君曰學豈為利祿哉貴在知義而適道耳學愈自力  
嘗遨遊江湖所主輒與賢士大夫交聞善言必服膺之觀善行則思欲  
與齊故其材器日就歸結書屋于東崖之傍將卒所業適有  
詔俾郡邑舉才德兼備之士知縣石首周君亟薦之君固辭不得則來  
京而鎮遠侯顧公得以乞君于 朝而教家塾君於訓誨有方師道尊  
嚴與公論議主賓意相洽公受 命總神機營六擇人贊畫戎務曰宜  
莫如吾家塾師也即以名 聞君於是得官照磨從贊公事君効其勤  
能而又守之以廉日從營中回輒閉戶靜坐取經史以觀或吟詩或揮  
毫為草書情自適也衆方期其顯用而遽沒世莫不致深惜焉春秋四

十有五君疾革時呼二子告之曰吾不求仕其俛而從仕者將在親逮  
祿養之為榮也今祿方得親幸康寧而吾氣息奄奄若此分不起矣為  
謝吾親不得終盡于職天也奈何泣數行下遂瞑目而逝實正統乙丑  
六月二十有二日配葉氏有婦道子男二即璉珠也女二孫男一君氣  
清體癯而自腴于文藝秩雖未崇而敢焉弗勝者使假之年則其所至  
抑何止於斯哉是宜致所深惜於人也邪為之銘曰  
車也可以任重何始輒而即止舟也可以利涉何始楫而遽已天實為  
之物胡能與吁嗟乎君兮尚德音之末著

百歲程君 實墓表

家乘

貴三公富萬石文章功業名一時者人皆可致之惟壽則有不可強焉  
者况壽而至于百有餘歲者哉非上有建極錫福之君而斯人之得于  
天者獨厚且完烏足致此若吾宗以道君之壽豈直一家之盛哉固海  
內之所鮮也君與予同出梁將軍程忠壯公之後所居汭川其族以宋



端明殿學士洛水先生益顯曾祖煥祖連父安皆力善不仕安娶于吳  
生君諱實字以道一諱詩其為人淳樸涉獵書史少客江湖間嘗以木  
易粟至姑蘇貧人值歲侵悉棄不取而歸歸更事畝畝不復出力勤孔  
時所入恒倍家居率晨起呼子弟督佃傭各職其職無侈以肆夜即課  
諸孫鳴琴讀書抵夜分乃寢客至張燕雄談雖老不倦既老取貲產立  
券不與子而與孫曰如此庶幾可均也君處已待人若易直然皆不失  
拜度一門百口馴馴怡怡號詩禮者或不能及君狀貌頽然兩目如漆  
耳幾垂肩中有毫長二寸許齒髮變矣而白者黑脫者生年九十五歲  
以恩例授冠帶每鄉飲必禮爲大賓君多辭不至年百有一歲乃終  
終時盛服呼諸孫語之曰我將與汝等求訣言訖而蛻君生無疾疾未  
嘗延醫請禱步履如飛終其身不杖殆異人也君生洪武乙亥閏九月  
十七日終於弘治乙卯三月十九日前後三娶初姚次黃次吳舉和順  
不盤族黨稱之子男三人德龍德思德良皆先君卒女三人皆有歸孫

男九人孫女三人曾孫男九人曾孫女六人玄孫男一人予又聞君壯  
歲在吳一過雨渡而溺自念非除衣韉無以獲生卽伏水中褫衣去韉  
一躍而起江行遇盜衆潛伏莫敢動君曰如此示弱舉將不免矣奮出  
直前搏之盜披靡散去然則君所稟之厚且完而加以伉健若此宜其  
壽之過人也因并書之貽其孫俾刻諸墓上之石嗚呼我  
列聖休養涵煦之澤被海內久矣而有人瑞焉乃出于新安之程氏得  
不謹著之以昭其盛于無窮也哉

處士李君有政墓表

錢文通公

處士諱有政字士忠姓李氏其先唐宗室曰德鴻者德宗七世孫也居  
鄱之睦親院唐季避地新安居祁門夫溪之新田至昭三者又徙溪東  
五里許鄉人以其族鉅號李源昭三生全於處士爲高祖曾祖武祖昌  
伯父宗厚承樂初爲刑部主事父宗榮處士生卽秀偉不凡喜問學以  
婺源朱子闕里多名師儒得游彥祥先生者授業焉彥祥語人曰此子



雖幼言行正大他日必有過人者處士學成不樂仕歸蒞家務以身先  
之正色法言內外斬斬且立規約俾男女各職其職率有賞悖有罰未  
幾產拓戶殷甲于一鄉然足跡不一至城市宣德末豐城孫曰讓主教  
祁門其第大吏曰恭以事過縣聞處士名力致之來與語連日夜恨相  
見之晚曰孔子謂施於有政是亦為政子真可謂顧名思義者矣處士  
性至孝宗榮君及生母方氏前後下世喪祭一以禮祖居險僻而高曾  
祖壠皆在梓木山乃一地山麓構新第借其兄士智弟士成居焉久之  
兄不自安處士泣相諭且作券貽子孫共之無異議族黨間有不和能  
而譁者聞處士聲歎即止訟爭與年不決得處士一言無不退聽曰官  
府不及也景泰中歲侵有勸分之令處士曰噫朝廷以義倡民出粟賑  
饑而因之徼冠帶之榮是利之也何名為義哉於是大發廩助官而辭  
冠帶不受太守福山孫公其重之里有虎石嶺林深谷幽多猛虎時出  
傷人處士募人捕之幾盡又懸人于絕崖鑿其巖為砥道行者無恐處

士亦有識隘內姪葉琦方  
成琦十八中南畿秋試第  
處士偶見之曰此福胚也  
子怡舉成化辛丑進士為  
大賓晚自號務本鄉人皆  
卯十月丁亥卒其生洪武  
子一曰璨女一順之妻以  
郭園葬十年矣予觀漢志  
懷抱材德之士非若近山  
家孝友居鄉信厚與夫  
官効一事雖古所謂一  
以為其鄉之勸

董稚即異之曰此子不凡助其學費而勗之  
一人舉天順甲申進士休寧孫順早孤而危  
不在其身必在其子贅于家順果有立而其  
刑部主事皆如其言縣令每舉鄉飲必禮為  
以務本翁稱之年七十有七以成化七年辛  
二十八年正月庚申娶葉有賢行琦之姑也  
之母也孫三曰濟汛溥處士墓在里長洲花  
者鄉舉里選之法而唐宋以來亦置科以求  
之專務詞章法律而已考李處士之平生持  
誦慮之明遠設施之經遠使之稍見于世治一  
州之善士豈多讓哉予故因怡之請為表其墓

岐隱孫處士春

啟傳

家乘



處士諱春殷字士和姓  
裔也曾祖良祖與父忠  
程伯奇氏愛賢之館于  
漢也處士為忠原第二  
有子八人有孫十有九  
以川之孫遂大以蕃忠  
處士竭心力作大第收  
子百用所需咸備無闕  
非邪處士以其先在宋  
意子弟俾嗣其業而第  
以文學名一時蓋處士  
表裸遇客謙異而內淵  
為之解紛或弗率則吟

孫氏世居休寧雷溪蓋唐金吾上將軍萬登之  
原皆以行義重其鄉忠原尤雋爽眉材藝以川  
貳室因家焉以川之程則宋端明殿學士珍之  
寸忠原既定居以川餘子似續多寡弱獨處士  
人頎然壯齡角立參從課耕貿易爭先元宗而  
原不偶于仕構一軒以泉石自名業未就緒也  
以川之人咸嘖嘖嘆異曰克家之子如士和者  
元有霽容及良山爽山芝田諸先生皆碩儒注  
春陽士輝質美嗜學一不以家務致之士輝果  
之所立如此處士初甚馴謹持已他不自為  
慙如聞客處子既壯稍出其長以自見里有急  
之道義皆服無退言雖大殖有家而憂人之憂

扶孱拯困恒患不及又類古之賢豪者里東有岐山極幽勝處士晚築  
室山下號岐隱日坐其中讀易自適而以家事付諸子則又若幽人逸  
士與世相忘者處士以永樂丁亥二月八日生壽七十八而終八子者  
存仁存禮存智存信存英存心存讓存澤皆遵遺訓共譽不私蓄婚喪  
之費公衆給之男婦百口庭無間言  
史官曰棠樾鮑先生言古之人有借隱以為高有終隱以為潔若孫處  
士其知所隱而隱者邪昔者成周之盛鳳鳴于西岐今  
聖人在上至治邁古安知無鳳鳴于南岐邪吾見處士之子若孫必有  
交被五采出而大鳴于清朝者豈終隱而已邪鮑先生不妄人也其言  
固有徵於異日哉

清隱汪處士墓誌銘

魏文靖公

新安清隱汪處士既卒後十六年實成化丙戌歲其子護等持其親程  
昇所為狀來予門泣且拜求銘以著壙中義不得辭因誌之處士諱寧



字以清號清隱故新安舊族系出唐越國公華越國有功於唐士人祠  
之其中葉頌以儒振世有聞人多顯仕者至宋竹山尹諱體仁七傳而  
至諱仲衡者嚴毅有才幹別號靜一鄉儒飽謚齋爲作記稱其能樂天  
命處士之父也有諱順德者處士之大父也諱彥暉者自邑西門移家  
紫雲溪居焉讀書明理學若風林朱學士趙東山先生皆與之往來風  
林題其齋曰養晦處士之曾大父也母吳氏生處士自幼穎敏異衆屹  
如成人既長益聰斷董稱門戶賦斂得宜勤先一邑綜理家務克盡其  
道比壯遊江湖薦紳多見器許家益饒裕勤儉如一既而告其父以所  
居讓伯父別初室以居後用父命復以新居讓諸弟再營室以處親在  
堂則備甘旨竭誠敬親有疾則不寢櫛躬湯藥親歿則極哀毀厚殯殮  
親遠則歲時潔菜盛豐祀事鄉閭式之室中有忿爭者必以禮喻豪橫  
斂容怨者冰釋復能出其贏餘以週困乏母歿事繼母劉益恭謹又嘗  
集先世遺翰以貽子孫名傳芳錄鄉儒蘇大爲之序書成而處士不祿

矣時景泰庚午九月十七日也處士生洪武己卯正月二十六日享年  
五十有二配謝氏子男四長即護次仁存端女四長適程慶祥次適程  
彥詵次適吳泰初季適程惟本孫男九護子三曰長宗嚴宗賜宗仁子  
三曰德宗厚宗實宗存子二曰衍宗勝宗端子一曰亢宗孫女八以又  
明年戊子十二月丙申厝岐山之陽遵治命也嗚呼人孰無死死而無  
聞者多矣處士仁聞一鄉富甲井里爲善之力而子孫蕃衍且賢可謂  
無忝先儒之胤者又能推讓其居以篤天倫孝友之愛使後人視効克  
念天顯之美又豈不由處士儀法始邪因爲之銘銘曰  
惟先世之德臧俾尔子孫之昌矧躬行之德良宜尔名聞之彰生而有  
益儀法於鄉歿而吾寧允矣揚其芳勒銘堅璞百世幽光







